

Jém wibic aṇmaṭi jém ijayñewiip jém Mateo

Jém Jesucristo jém ijatuṇwewe jém
wiñicpiyaj
(Lc. 3:23-38)

1 Jaycámnetā yim jém lista de
jém Jesucristo ijatuṇwewe jém
wiñicpiyaj. Jém Jesucristo jém
David iocmaṇic y jém Abraham
iocmaṇic.

²Jém Abraham imanic jém
Isaac. Jém Isaac imanic jém Jacob.
Jém Jacob imanic jém Judá con
itíwítam. ³Jém Judá imanic jém
Fares y Zara, iapa jém Tamar.
Jém Fares imanic jém Erson. Jém
Erson imanic jém Aram. ⁴Jém
Aram imanic jém Aminadab. Jém
Aminadab imanic jém Naasón. Jém
Naasón imanic jém Salmón. ⁵Jém
Salmón imanic jém Booz, iapa jém
Rahab. Jém Booz imanic jém Obed,
iapa jém Rut. Jém Obed imanic
jém Isaí. ⁶Jém Isaí imanic jém
rey David. Jém rey David imanic
jém Salomón, jém iapa jém Urías
iyomo ídic. ⁷Jém Salomón imanic
jém Roboam. Jém Roboam imanic
jém Abías. Jém Abías imanic jém
Asa. ⁸Jém Asa imanic jém Josafat.
Jém Josafat imanic jém Joram.
Jém Joram imanic jém Uzías.

⁹Jém Uzías imanic jém Jotam.
Jém Jotam imanic jém Acaz. Jém
Acaz imanic jém Ezequías. ¹⁰Jém
Ezequías imanic jém Manasés. Jém
Manasés imanic jém Amón. Jém
Amón imanic jém Josías. ¹¹Jém
Josías imanic jém Jeconías con
itíwítam. Jeetim tiempo cuando
nanicyajta preso itumpiy jém
Israelpic pixiñtam hasta jém
naxyucmi de Babilonia.

¹²Jesic cuando nanicneyajta
wum jém naxyucmi de Babilonia jém
Jeconías imanic jém Salatiel. Jém
Salatiel imanic jém Zorobabel.
¹³Jém Zorobabel imanic jém Abiud.
Jém Abiud imanic jém Eliaquim.
Jém Eliaquim imanic jém Azor.
¹⁴Jém Azor imanic jém Sadoc. Jém
Sadoc imanic jém Aquim. Jém
Aquim imanic jém Eliud. ¹⁵Jém
Eliud imanic jém Eleazar. Jém
Eleazar imanic jém Matán. Jém
Matán imanic jém Jacob. ¹⁶Jém
Jacob imanic jém José, jém Malía
iwiḍaya jém icnayñewiip jém Jesús,
iñiyítim CRISTO.

¹⁷Jesic íc catorce jém Abraham
iocmañictam hasta David. Íftim
catorce jém David iocmañictam
hasta cuando mu ininicyajta

preso jém Israelpic pixiñtam jém naxyucmi de Babilonia. Ífíim catorce jém Jeconías iqcmāictam dende nanicyajta preso jém naxyucmi de Babilonia hasta cuando mu iñay jém Cristo.

Jutsap iñay jém Jesucristo

(Lc. 2:1-7)

¹⁸Jesic yíimpic nay jém Jesucristo. Cuando jém José iniwatneum trato jém woñi Malía iga napicyajtap, antes que danam napicneyajta, manicomcaneum jém Malía con Dios iAnama ipimi. Da je jém José imaníc. ¹⁹Jesic jém José, jém iwatnewiip trato jém Malía iga napicyajtap, como wibic pixiñ, da ichaawattooba jém Malía. Jeeyucmi iyamtsactoooba jém woñi iga jém pixiñtam odoy ijodóñayajiñ. ²⁰Jesic iganam ijispa jempic jém José, imawñix tum siñyucmipic pixiñ jém icutsatnewiip Dios. Iñímáy jém José:

—MiJosé, jém rey David miqcmānic, odoy cñi iga impictsonpa jém Malía. Porque jém imaníc, jém ijúmpacnewiip, inimiñ jém Dios iAnama. ²¹Jém woñi icnaypa tum jaychixi. Accámaayi iñiyi iga JESÚS porque iciacputpa jém ipixiñtam, iwítsagáypa jém ítánca iga odoy ipictsonyajiñ jém castigo.

²²Jempigam iñasca jém Malía iga cupaguñ juuts nimpa jém wiñicpic añmatciwiñ jém ipiimiyñewiip jém tanJatuj Dios iga iñmañiñ. Nimyajpa:

²³Manicomca tum woñi jém dāpic jaayiy. Da queman ijitypát pixiñ.

Icnaypa tum jaychixi.

Accámaytap iñiyi iga Emanuel. Taichítam tanañmatimi nimtooba: tanwaganaiítampa Dios.

²⁴Jesic cuando yus jém José iwat juuts iñímáy jém siñyucmipic pixiñ jém icutsatnewiip jém tanJatuj Dios. Ipictson jém Malía. ²⁵Pero da inimoñ hasta que icnay jém icoponmanic tum jaychixi. Jesic jém José iccámáy iñiyi iga Jesús.

Miñ ijóyayaj jém tsixi jém sabioyaj

2 Nay Jesús jém atebet Belén jém naxyucmi de Judea cuando injacpa jém rey Herodes. Jesic jeetím tiempo núcyaj Jerusalén jém sabioyaj. Miñyaj añjamquímmi. ²Mu iñúcyaj, acwágoyajpa. Nimyaj:

—¿Jut ít jém tsixi jém nayñewiip, jém tsíypáppic juuts Rey iga injacpa jém judíos? Ánixayta imatsa jém añjamquímmi. Amiññeta iga acosteeñaytampa y anjístampa.

³Jesic cuando jém rey Herodes ijodóna ti iñímáy jém juumipic pixiñ, agui cñi, da icutiíyiy ti iwatpa. Cñiyajtím jém pixiñtam jém ítayjwiip jém atebet Jerusalén.

⁴Jesic jém Herodes injtuumawat ítumpiy jém cobacpic panij añjagooyiyaj con jém escribaspic maestroyaj. Jém Herodes icwácpa jém panij añjagooyi jut naypa jém Cristo. ⁵Jeeyaj iñímayyaj jém Herodes:

—Naypa jém atebet Belén jém naxyucmi de Judea porque jempigam ijaychacne jém wiñicpic añmatciwiñ. Nimpa Dios:

⁶Mich miattebet Belén, miitwiip jém naxyucmi de Judá,

agui mixufu, pero michíypa juuts tum mijpic atebet porque mimichíamanjom naypa tum mijpic anjagooyi.

Iwatpa cuenta jém ampixiñtam jém atebet Israel.

⁷ Jesic jém Herodes iyámanwejáy jém sabioyay. Icwác iga juchis moj iixyay jém matsa. ⁸ Jesic ocmi jém Herodes icutsat jém sabioyay jém atebet Belén. Nimpa:

—Nictaami jemíc. Wímétstaami jém tsixi. Jesic cuando impátnetámum, miñi acjodónajj. Ich nicpatim aņcosteeñáy.

⁹ Jesic cuando yaj imatorjay tí nimpá jém rey Herodes, moj niqiyay jém Belén. Anjagoyñeeba iñic jém matsa jém iixñeyajwiip anjamquímí. Núc juť it jém xufu tsixi, jemum teeñanjac. ¹⁰ Cuando iixyay jém matsa juť teeñanjac, tsam pimi maymayyay. ¹¹ Jesic cuando tigiyay jém ticjom, iixyay jém jaychixi con iapa Malía. Jém sabio icosteeñayyay jém tsixi. Ijisyajpa. Íñáy jém ibaúl, ixaiyyajpa oro, jém wibic incienso y jém mirra jém aguipic cįpa. ¹² Ocmi Dios icmawíñá jém sabioyay iga odom nicyajiñ eybic juť it jém Herodes. Píimiyta iga sedíñ tunğac tunjom hasta núcpa ífícmi.

**Nicyajpa Egipto. Poyyay
jém José y Malía**

¹³ Jesic ocmi mu iñicyajum jém sabio, jém José imawíñix tum siņyucmipic pıxiñ jém Diospic icutsatne. Iñímáy jém José:

—Napoyi jém xufu tsixi con iapa. Nictaami jém naxyucmi de Egipto. Jemum tsíyfaami hasta que ich

mannímáypa iga mixeđiñ porque jém Herodes imétspa jém xufu tsixi iga iccaaba.

¹⁴ Jesic tsucum jém José con jém Malía. Inipoyyay jém xufu tsixi tsuucim. Nicyay jém naxyucmi de Egipto. ¹⁵ Jemigam tsíyyay hasta que ca jém Herodes. Iñasca jempic iga cupaguiñ juuts iñímáy Dios jém wiñicpic aņmaťciwiñ: “Tch anaņwejáypa ammanic jém naxyucmi de Egipto.”

**Jém Herodes ipiimíy iga
accaayajtañ jém tsixtam**

¹⁶ Jesic tsam jóy jém Herodes mu iix iga jém sabio dá icupicyay juuts iñímáy. Ipiimíy jém isoldado iga iccucaayajiñ itumpiy jém jaychixtam jém ityajwiip Belén con jém ityajwiip nocojom. Ijısne jutsan mayooyi oyñe íamyay jém sabioyay jém tsixi. Jeeyucmi iccucaayyay itumpiy jém iniiťwiip dos amťiy hasta jém ďapic núcne dos amťiy.

¹⁷ Jempigam cupac jém aņmaťi juuts ijaychacne jém wiñicpic aņmaťciwiñ jém Jeremías. Nimpa:

¹⁸ Matontap tum jįyi jém atebet Ramá.

Tsam weyjajpa, tsam anyácneyaj. Tsam weyjajpa jém Raquel, jém Israelpic yomtam, iyaachanjampa jém imañictam. Da ixunpa iga acpocsayťap ianama porque accucaáyayyajta imañictam.

¹⁹ Jesic ocmi cuando caaneum jém Herodes, tanjatun Dios icutsat tum siņyucmipic pıxiñ iga icmawíñaiñ jém José jém naxyucmi de Egipto, nímayta:

²⁰—Siip settaami jém iñficmi Israel. Naseti jém jaychixi con iapa. Porque siip caaneum jém anjagooyi jém iccaapáppic idic jém xuúu tsixi.

²¹Jesic mojum sefi jém José. Inisetpa jém xuúu tsixi con iapa jém naxyucmi de Israel. ²²Pero tsam cin jém José iga nicpa jém naxyucmi de Judea porque ijodóna iga jém Herodes imaníc jém Arquelao injacpa jém naxyucmi Judea juú injacpa idic jém ijatuñ. Jém José mawíña iga odoy niguiñ Judea. Ijjspa iga nicpa jém naxyucmi de Galilea. ²³Jesic núc jém Galilea, nic íti jém atebet Nazaret. Iñasca jempic iga cupacpa juuts nim jém wiñicpic aḡmaćciwiñ iga Nazaretpic pixiñ jém Jesús.

Najíyóypa jém Xiwan jém acchínoypaap titsinaxyucmi

(Mr. 1:1-8; Lc. 3:1-9, 15-17; Jn. 1:19-28)

3 Núc jém jama iga moj najíyooyi jém Xiwan jém acchínoypáppic. Najíyóypa jém titsinaxyucmi juú dá tí idíyíy, jém naxyucmi de Judea. ²Nim jém Xiwan:

—Tsaci iga immalwatpa, cucaci iñjixi porque núctooba jém tiempo iga injacpa Dios yíp naxyucmi.

³Jém wiñicpic aḡmaćciwiñ jém Isaías inmat de yíptim Xiwan. Nimpa:

Matontap tum aḡmaćciwiñ jém tsampic najíyóypa jém titsinaxyucmi.

Nimpa iga:

“Wĩtsagaayi jém tánOmi ituñ. Áḡaayi tum tuñ numapic.”

⁴Jém Xiwan iyooíi tacne con jém camello ipic. Jém icinturón tum

tsococuero. Icutpa jém awu. Iucpa jém jimñi chiñu. ⁵Tsam jáyañ pixiñtam nic imatoḡyaj jém Xiwan juú najíyóypa. Miñyaj jém atebet Jerusalén, icuwiñi jém naxyucmi de Judea, con jém ifyajwiip nocojom jém río Jordán. ⁶Jém pixiñtam inmadayyajpa Dios ifánca iga agui imalwatne. Ocmi jém Xiwan icchiñpa jém río de Jordán.

⁷Jesic cuando jém Xiwan iix iga chiḡtooba wati jém fariseopic pixiñtam y jém saduceopic pixiñtam, iñímáy:

—¿Que michtam impóyaytámpatim jém Dios icastigo? ¿Que injucpicpa iga ich wiap mañciacputta? Mijex juuts jém tsañ agui poypa cuando miñpa jém iccaapáppic. ⁸Siiga numa iñchacneum jém immalajixi, jesic wati juuts ixunpa Dios, jesic quejpa iga numa injucacneum iñjixi. ⁹Odoy jistaami iñanamanjom iga mimichtam tsam wibic mipixiñtam dá mimalotam porque jém Abraham mimanictam. Dá wĩ iga iñjístampa jempic porque Dios wiap icset yíp tsa juuts jém Abraham imanictam. ¹⁰Wĩtsacneum jém hacha. Accámnetawum jém cuytichicyucmi. Itumpiy cuy dápic tmap, tinquímtap, nooquettap juctjom. ¹¹Ich numa manacchiñpa con ni iga quejiñ iga iñchacneum iga immalwatpa. Pero ocmi miñpa tuḡgac pixiñ antuuñiancñim. Je más wiap que aich. Dá wiap annasca. Dá wiap aḡcuwijáyáy jém iciac. Micchiñpa con Dios iAnama y con jucti. ¹²Imatspacneum jém iyemcuy iga icutippa jém trigo. Cuando yajum icutip, iccáypa jém trigo

granerajom. Nooquettap jém trigo ipuchi juctjom juř đá nunca píchpa.

Acchiŋta jém Jesús

(Mr. 1:9-11; Lc. 3:21-22)

¹³Jesic Jesús put jém naxyucmi de Galilea. Nic jém río de Jordán iga icchíŋiñ jém Xiwan jém acchíŋoypaap. ¹⁴Pero jém Xiwan đá icchíŋtooba Jesús. Nímayta Jesús:

—Más wí iga mich anacchiŋpa aich. ¿Tíiga mimiŋpa iga manacchíŋiñ?

¹⁵Jesic Jesús icutsoŋ. Inímay jém Xiwan:

—Pero siip wí iga anacchiŋpa. Wí iga tanaccupacpa itumpiy juuts tapimáy Dios.

Jesic jém Xiwan icchiŋ. ¹⁶Cuando yajum icchiŋta jém Jesús, put jém niicim. Jesic aŋáy jém siŋ, Jesús iix jém Dios iAnama. Quet juuts tum cuucu. Nummiñ, núc Jesúsyucmi. ¹⁷Jesic jém ityajwiip jem imatonyaj tum jiyi siŋyucmi. Nimpa:

—Yíp ich amManic jém tsampic antoypa. Tsam amaymay con je.

Cutítsta jém Jesús

(Mr. 1:12-13; Lc. 4:1-13)

4 Ocmi jém Dios iAnama ininic Jesús jém titsinaxyucmi juř đá tí idíyí. Nanicta iga icutíchiñ jém Wocciwiñ.

²Đa wíc Jesús cuarenta jama y cuarenta tsuu. Jesic ocmi tsam pimi yuap. ³Jesic jém Wocciwiñ icunúc Jesús iga icutítspa. Inímay:

—Siiga numa Dios miManic, acseti yíp tsa iga caxtánañi.

⁴Jesic Jesús inímay jém Wocciwiñ:

—Nimpa jém Dios inmatí jém jayñewiip: “Jém pixiñtam đá itpa no más con jém caxtánañi iga icútpa. Wíitpa jém pixiñ siiga iwatpa itumpiy juuts inímay Dios.”

⁵Jesic jém Wocciwiñ ininic Jesús jém atebet Jerusalén. Iniquim jém mijpic masticaŋcobac. ⁶Jesic jém Wocciwiñ inímay Jesús:

—Siiga numa Dios miManic, yóyanqueti. Porque nimpa jém Dios inmatí:

Dios icutsat jém siŋyucmic
pixiñtam
iga mimatstsoyajiñ iciijom
iga odoy coowaiñ impuy
tsaayucmi.

⁷Jesic Jesús inímay jém Wocciwiñ: —Nimpatim jém Dios inmatí: “Odoy cutiñtsi jém tanJatuj Dios siiga numa wiap.”

⁸Jesic jém Wocciwiñ eybic icutítspa jém Jesús. Ininic tum mijpic cotsicyucmi tsam yucmi. Inquejáy itumpiy jém atebetay icuwíti yíp naxyucmi iga tsam wibic lugar. ⁹Jém Wocciwiñ inímay Jesús:

—Manchiiba itumpiy yiimpic manañquejáy siiga aŋcsteañáypa y anjísipa.

¹⁰Jesic Jesús inímay:

—Nicsim, miWocciwiñ. Nimpa jém Dios inmatí: “Jistaami tanJatuj Dios icutum. Odoy cuyoxataami tungac.”

¹¹Jesic nic jém Wocciwiñ. Ichac iga icutítspa Jesús. Jesic miñyaj jém siŋyucmic pixiñtam iga iyoxpátaypa.

Mojpa iwat iyoxacuy jém Jesús Galilea

(Mr. 1:14-15; Lc. 4:14-15)

¹²Jesic cuando Jesús imatoŋ iga pajta cárcel jém Xiwan, set

eybíc jém naxyucmi de Galilea.

¹³Da tsíy jém attebet Nazaret. Nic ífi jém attebet Capernaum jém laguna aḡḡaca jém naxyucmi de Zabulón y Neftalí. ¹⁴Iñasca jempíc iga cupacpa jém aḡḡaḡi juuts ijaychacne jém wiñicpic aḡḡaḡiwiñ jém Isaías. Nimpa:

¹⁵Jém naxyucmi de Zabulón con jém naxyucmi de Neftalí dende jém lamar aḡḡaca hasta jém Jordán iḡwiñtuc, jém naxyucmi de Galilea, juḡ ítyaj jém pixiñtam jém dápic je de Israel,

¹⁶jém ítyajwiip piichciim; iixyajpa tum wibic juctiaḡtsoca. Tsíyyaj juuts caaneyaj idíc. Cupiichane ífi, pero iyicquejyajpa tum wibic jucti.

¹⁷Jesic cuando núc jém Capernaum, moj iḡmat Jesús jém Dios iḡmaḡi. Nimpa:

—Tsaci iga immalwatpa, cucaci iñjixi porque núcneum jém tiempo iga injacpa Dios yíp naxyucmi.

Moj iḡwejay Jesús jém icuyujciwiñ

(Mr. 1:16-20; Lc. 5:1-11)

¹⁸Jesic naspa Jesús jém laguna aḡḡaca iñiyi Galilea. Iix tum pixiñ con ífiwi. Tum jém Ximój, iñiyíim Peto; tum jém Anti. Síp ipatsyaj ired jém laguna iga imatspa tiipi. Jeeyaj tiipteroyaj. ¹⁹Jesic Jesús iñímáy jém wisten:

—Atúñiytaami. Nicpa tamméts pixiñ juuts tiipi.

²⁰Jesic jeefi rato ichacyaj ired, nic ítúñiyaj jém Jesús.

²¹Jesic nic Jesús uxaj más juumi, ipát tunḡac wisten pixiñ. Jém

Jacobo, jém Zebedeo imanic, con ífiwi jém Xiwan. Ítyaj barcojom con iḡatuj. Síp intótsyaj ired. Jesic Jesús iḡwejay. ²²Jeefi rato ichacyaj jém ibarco y jém iḡatuj. Nic ítúñiyaj Jesús.

Jáyan pixiñ acpisyajta

(Lc. 6:17-19)

²³Jesic nic Jesús icuwiḡi jém naxyucmi de Galilea. Accuyujópa cada lugar jém sinagoga juḡ icuyujcayajpa jém Moisés iḡquímayooyi. Iḡmadáypa jém pixiñtam jém wibic aḡḡaḡi iga núcpa jém tiempo iga injacpa Dios yíp naxyucmi. Icpis jém mimneyajwiip jém imatsneyajwiip ítumpiy jém caacuy. ²⁴Jodóḡata icuwiḡi jém naxyucmi de Siria iga agui wiap jém Jesús. Jesic namíñayta Jesús ítumpiy jém mimneyajwiip, jém imatsneyajwiip caacuy y jém toya. Namíñaytatim jém iniiḡwiip mal espíritu, jém imatsneyajwiip ataque y jém tusacanewiip. Icpis ítumpiy. ²⁵Tsam jáyan pixiñtam ítúñiyajpa jém Jesús. Miñyaj de jém naxyucmi de Galilea, de jém attebet Decápolis y de jém attebet Jerusalén. Miñyajtim de jém naxyucmi de Judea y de jém Jordán iḡwiñtuc.

Accuyujópa Jesús tum cotsicyucmi

(Lc. 6:20-23)

5 Jesic cuando iix Jesús iga aḡtuumayajpa tsam jáyan pixiñtam, quim tum cotsicyucmi. Jemum coñ Jesús. Jém icuyujciwiñ icunúcyaj. ²Jesic Jesús moj iḡquejay. Nimpa:

³—Agui maymay jém ijodóḡaneyajwiip titam ífógoyayaj

iga núcpa juí íf Dios porque jeeyaj núcyajpa juí íf Dios.

⁴'Agui maymay jém anýácneyajwiip porque Dios icpocsáypa íanama.

⁵'Agui maymayyaj jém pixiñtam jém dápic nacujítpa iyaac porque jeeyaj ipíctsonyajpa yíp nas, jém ijíycámayñewiip Dios iga ichiiba.

⁶'Agui maymay jém tsámpic iwattooba juuts ixunpa Dios porque Dios iyoxpátpa iga wíaiñ iwatyaj jempic.

⁷'Agui maymay jém iyaachanjamyajpáppic jém ííwítam porque Dios iyaachanjámpatim jeeyaj.

⁸'Agui maymay jém cuáyñewiip íanama porque jeeyaj iixyajpa Dios.

⁹'Agui maymay jém pixiñ jém injíyjacpáppic jém áñayajpaap porque tsíypa juuts Dios imanic.

¹⁰'Agui maymay jém tsámpic yaachwattap iga iwíwatpa juuts ixunpa Dios porque jeeyaj núcyajpa jém wícom juí injjacpa Dios.

¹¹'Maymáyataami cuando jém malopic pixiñtam tsám mimalnámaytámpa, tsám miyaachwattámpa y tsám micumígoytámpa ich añcuyucmi. ¹²Maymáyataami. Odoy anýáctaami porque impíctsonjtámpa tum wibic xaja sinyucmi. Jístaami iga jém wiñicpic añmatciwiñ tsám pími malwadayajtáim.

Jém çana y jém jucti

(Mr. 9:50; Lc. 14:34-35)

¹³'Mimichám mijex juuts jém çana para yíp naxyucmipic pixiñtam. Pero siiga dá paac jém çana, éjutsap tanwítsac?

Da ti mejcuy. Tampatsáypa. Icunepnepquetyajpa jém pixiñtam.

¹⁴'Mimichám mijex juuts tum wibic jucti iga iñyicquejpa jém ítyajwiip yíp naxyucmi. Tum mijpic attebet lumuyucmi dá i wiap ignéc.

¹⁵Da i iñooba tum nooquejucy iga icujappa tum cooñcucim. Ítunpa yucmi iga iyicquejpa ítumpiy jém ítyajwiip jem. ¹⁶Jesanetim mimichám wítsocataami juuts tum wibic jucti iga iñyicquejyajpa jém pixiñtam. Wíwattaami jém píxiñtamanjom iga cuando iixyajpa, tsám icujípyajpa tanJatuj Dios jém ítwiip sinyucmi.

Da accaytap jém wiñicpic añquímayooyi

¹⁷'Odoy jisi iga ich miñ anaccáy jém Moisés injquímayooyi, ni dá anaccáypa jém wiñicpic añmatciwiñ injquímayooyi. Ich amiñ anaccupac ítumpiy juuts nimpa jém wiñicpic añquímayooyi. ¹⁸Numa, mannímáypa, dá i nunca iccáypa jém wiñicpic añquímayooyi. Ni tum punto ni tum jiti dá togoypa. Da cuyajpa jém sinj ni jém nas hasta que cupacpa ítumpiy cosa juuts nimpa jém añquímayooyi. ¹⁹Siiga tum píxiñ dá iccupacpa tum jém añquímayooyi dápic juchañ y inquejáypatim jempic jém píxiñtam, jesic dá ti mejcuy jém píxiñ. Da tigíypa juí injjacpa Dios. Pero siiga tum píxiñ iwatpa ítumpiy juuts nimpa jém wiñicpic añquímayooyi, y siiga inquejáypatim jém píxiñtam, jesic jém píxiñ tsíypa juuts tum mijpic añjagooyi cuando injjacpa Dios yíp naxyucmi. ²⁰Pero mannímáypa mimichám, siiga

da más inḡwīwattámpa que jém fariseoyaj y jém escribaspic maestroyaj, jesic da wiap inñúic juḡ inḡacpa Dios.

Siiga tananí jém malopic jixi tánanamanjóm, tammalwatpa

(Lc. 12:57-59)

²¹ Michám immatoḡneta iga jém wiñicpic tanjatunḡwewetam nımyaj iga: “Odoy accaooyi porque chiıtap castigo jém accaoyapaap.”

²² Pero ich mannımáypa, siiga i ijóyixpa jém itıwi, ipıctsonḡpa jém castigo juuts tum accaoyapaap. Siiga i imalnımáypa jém itıwi, ciıpiḡtap jém cobapic anḡagooyiciım, jém Sanhedrín; chiıtap castigo. Siiga i inımáypa jém itıwi iga tsam bruto, jesic jém pıxiñ wiap icnıcta jém infierno, jém juctjom juḡ da nunca pıchpa.

²³ Cuando ininıcpa tum ofrenda iga inñiıba Dios jém altaryucmi, siiga inñıspa iga immalwadayñe jém inñıwi, ²⁴ jesic odoyñam tsacı jém ofrenda jém altaryucmi. Wiñtı nıgi cunucsaayi jém inñıwi, jesic wiap inñchac jém ofrenda.

²⁵ Siiga i mijóyixpa y miquejajwadáypa, jesic wıtsacı jém inñasunto antes que miñúctámpa jém juezcıım porque una vez miñúcnem jem, micııjuncottap jém policıa icııjom, mipajtap.

²⁶ Mannımáypa iga da miputpa hasta que yajpa inñyoj.

²⁷ Michám immatoḡneta iga jém wiñicpic tanjatunḡwewetam nımyajpa iga: “Odoy pejooyı.” ²⁸ Pero ich mannımáypa siiga i iámpa tum yomo iga tsam icusúnıyapa, jesic pejóyapa inamanjóm.

²⁹ Siiga jém inñıxcuy, jém anḡwımıpic, micwatpa tánca, topı, patsaayi. Más wi iga togoypa tum parte jém immıjtay que iga micottap inḡcumıj jém juctjom juḡ da nunca pıchpa. ³⁰ Siiga inñı, jém anḡwımıpic, micwatpa tánca, jesic jacı, patsaayi. Más wi iga togoypa tum jaca jém immıjtay que iga micottap inḡcumıj jém juctjom juḡ da nunca pıchpa.

Da wi jém ichacpaap iyomo

(Mt. 19:9; Mr. 10:11-12; Lc. 16:18)

³¹ Wiñıgam nımyajpaıtım: “Siiga i ichacpa iyomo, tienes que iwatpa tum acta iga ichacneum jém yomo.”

³² Pero ich mannımáypa siiga tum pıxiñ ichobıychacpa iyomo da pejoyñe, jesic icpejóyapa jém yomo siiga ipıcpa tungac pıxiñ. Siiga tum pıxiñ ipıcpa jém yomo jém tsacnetawııp, jesic pejóyapaıtım jém pıxiñ.

Jesús inquejáypa iga odoy tanwadiñ jém juramentos

³³ Immatoḡnetaıtım iga jém wiñicpic tanjatunḡwewetam nımyajpa iga: “Siiga miñımpa, wıjodios, jesic accupacı fıtam inñıycámayñe Dios.” ³⁴ Pero ich mannımáypa iga odoy tsacı ni tum cosa juuts testigo iga da mimıgóyapa. Odoy tsacı jém sııj juuts tum testigo iga da mimıgóyapa porque sıınyucmi inḡacpa Dios. ³⁵ Odoy tsacı jém nas juuts tum testigo iga da mimıgóyapa porque jém naxyucmi icteññe ipuy jém tanjatunḡ Dios. Odoy tsacı jém Jerusalén juuts tum testigo porque je jém más Mıjpic Rey imııchi.

³⁶ Odoy tsacı juuts tum testigo jém

inçobac iga dá mimigóypa porque ni tum jem inçway dá wiap inicpooba ni dátim wiap inicýiga. ³⁷ Cuando miñmattámpa, nimtaami “numa” o “dá”. Siiga inçhacpa algun tí juuts testigo iga dá mimigóypa, jesic dá wi porque jexpic jixi miñne de jem Wocciwiñ.

Nimpa Jesús iga odoy cianseedaayi

(Lc. 6:29-30)

³⁸ Michítam immatoñneta iga nimyajpa wiñigam: “Siiga i inçascutedáypa iixcuy tum pixiñ, jesic jem pixiñ icianseedáypa, inçascutedáypa tim iixcuy. Siiga i inçaxquímáypa itits tum pixiñ, jesic icianseedáypa tim, inçaxquímáypa tim itits.”

³⁹ Pero ich mannímáypa: Siiga i mimalwadáypa, odoy cianseedaayi. Siiga i micótsáypa inçapac, jesic jígaayi iga micótsáyin tim tunçac lado. ⁴⁰ Siiga i miquejajwadáypa iga mitóbáypa jem inçyoóti, jesic chiñtim jem inçchamarra.

⁴¹ Siiga i mipimíypa pimimi iga ininígayin algun tí tum kilómetro, nanigaayi dos kilómetro. ⁴² Siiga i miwágáypa algun tí, jesic chi. Siiga i miñucsáypa alguna cosa, jesic acnúcsi, odoy nímaayi iga dá manchiiba.

Wi iga tantoyámiñ jem tánenemigoyaj

(Lc. 6:27-28, 32-36)

⁴³ Immatoñneta juuts nimyajpa jem pixiñtam: “Toytaami jem inçamigo, pero jóyixtaami jem inçenemigo.”

⁴⁴ Pero ich mannímáypa iga: Toytaami jem inçenemigoyaj.

Odoy malnímayfaami jem mimalnímayñewiip. Wiwadayfaami jem mijóyixpaap. Ançwejpáttaami Dios iga iwíwadáyin jem pixiñtam jem mimalwadayñewiip. ⁴⁵ Siiga inçwattámpa jempic, jesic michíyftámpa juuts tanJatuñ Dios mimanictam jem itwiip siñyucmi. Porque jem tanJatuñ Dios icpijpa jama para jem malopic y para jem wibic. Dios icchijóypa tuj para jem tsampic táñcaíy y para jem dápic táñcaíy. ⁴⁶ Siiga nada más inçtoyftámpa jem mitoyyajpaap, ¿que inçjisa iga Dios miwíwadáypa? Porque jem malopic pixiñtam, jem ichécyajpáppic impuesto, itoypa tim jem iamigoyaj. ⁴⁷ Siiga inçdioschiiba nada más jem inçiwitam, ¿que inçjisa iga inçwíwatpa? Jem dápic iixpicpa Dios idioschijaypa tim jem itiwitam. ⁴⁸ Siempre wíwattaami juuts iwatpa jem tanJatuñ Dios jem itwiip siñyucmi.

Jutsap tanyoxpát jem tantiwitam

6 'Odoy nímançtaayaji iga inçwatpa juuts ixunpa Dios iga miixyajiñ jem pixiñtam porque siiga inçwatpa jempic, jesic jem tanJatuñ Dios jem itwiip siñyucmi dá michiiba jem inçoñwiyooyi. ² Jeeyucmi mannímáypa cuando inçyoxpátpa jem yaachayajpaap, odoy i ançmadaayi iga inçwíwatne. Jem malopic pixiñtam, jem nímançtaayapaap iga icupicyajpa Dios, siiga iwíwatayajpa, tsam inçmadayajpa i quej iga cujíptaiñ. Inçmatpa tim ançicmi y jem sinagoga títam iwatyajpa. Tsam iwiançjamyaj iga cujípyajtaiñ. Numa mannímáypa iga jeeyaj

ipictsoñneyajum jém icoñwiyooyi.
³Cuando inchiiba algun tí jém
 yaachayajpaap, odo y jüci iga jém
 aññaymipic inçi ijodoñ tí iwatpa
 jém añwimipic inçi. ⁴Yamwati, jesic
 tanJatuñ Dios icuñum miixpa. Je
 michiiba jém inçoñwiyooyi.

Jutsap tanajwejpát Dios

(Lc. 11:2-4)

⁵Cuando inijwejpáttámpa Dios,
 odo y wattaami juuts iwatyajpa jém
 nímantaayapaap iga icupicyajpa
 Dios. Tsam iwianjamyajpa
 iga injejpátyajpa Dios jém
 sinagoga o jém calle aññaca iga
 iixyajiñ jém pixiñtam. Numa
 mannímáypa iga ipictsoñneum jém
 icoñwiyooyi. ⁶Pero mimichítam
 cuando inijwejpáttámpa Dios,
 tigiyi jém inñicjom, añpaji jém
 inñic, añwejpaati Dios jém
 miwaganaitwiip juñ dá i miixpa.
 Dios iixpa itumpiy cosa jém
 inyamwatnewiip, michiiba jém
 inçoñwiyooyi.

⁷Cuando inijwejpátpa Dios,
 odo y nñimi jeetím jeetím aññati
 jém dápic tayoxpátpa juuts
 iwatyajpa jém tunçac pixiñtam jém
 ijisyajpaap jém tunçac dios jém
 watnas. Ijisyajpa iga imatónjáypa
 jém watnas porque wañciy nimpá
 jeetím jeetím aññati. ⁸Odo y wati
 jempic juuts iwatyajpa jeeyaj
 porque tanJatuñ Dios ijodoñ títam
 mífogóyáy antes que inwágáypa.
⁹Jeeyucmi mannímáypa, cuando
 inijwejpáttámpa Dios, nimtaami
 yiimpic:

ManJatuñ Dios, miitwiip
 siñyucmi,
 agui cuáyñe mich inñiyi.

¹⁰Wi iga míñiñ jém jama iga
 ininjacpa yíp naxyucmi.
 Wati yíp naxyucmi juuts mich
 inwianjam, juutsfím inwatpa
 siñyucmi.

¹¹Achiifaami yíp jama títam
 añçúttámpa.

¹²Awadaytaami perdón jém antañca
 juutsfím aichfam añwadayñeta
 perdón jém amalwadayñewiip.

¹³Awattaami cuenta iga odo y i wiañiñ
 acutítsta iga acmalwattámpa.

Agui miwi, manJatuñ Dios.
 Mich más mijpic minjagooyi.
 Iniiñ itumpiy jém impimi.

Dá nunca micuyajpa. Amén.

¹⁴Porque siiga inwadáypa
 perdón jém mimalwadayñewiip,
 jesic miwadáypatím perdón jém
 tanJatuñ Dios jém itwiip siñyucmi.
¹⁵Pero siiga dá inwadáypa perdón
 jém mimalwadayñewiip, jesic
 tanJatuñ Dios dátim miwadáypa
 perdón jém inñañca.

Jutsap tañwat jém ayuno

¹⁶Cuando injwattámpa ayuno odo y
 añyáguñ inñámooyi juuts iwatyaj jém
 nímantaayapaap iga iixpicyajpa Dios.
 Odo y nañquejtaji iga inwatne ayuno.
 Numa mannímáypa iga jeeyaj iniñum
 jém icoñwiyooyi. ¹⁷Pero mimichítam
 cuando injwattámpa ayuno jetstaami
 inway, jíñtaami inwiñpac, ¹⁸iga jém
 pixiñtam odo y icutiñiyiñ iga inwatne
 ayuno. Jém tanJatuñ Dios icuñum
 ijodoñ iga inwatne ayuno, jesic
 michiiba jém inçoñwiyooyi.

Jém siñyucmipic riqueza

(Lc. 12:33-34)

¹⁹Odo y añtuumawati jáyan
 riqueza yíp naxyucmi juñ icútpa

jém wechi, júf tsam jómpa, júf tigíyyajpa jém númyajpaap.
²⁰ Añtuumawati jáyan riqueza sinyucmi júf da icútpa jém wechi ni dátim jómpa, júf da tigíyyajpa jém númyajpaap. ²¹ Porque júf inñtuumawatne jém inriqueza jemím íf inñanama.

Jém tánixcuy tum jucti para jém tammijtay
(Lc. 11:34-36)

²² Jém inñxcuy jex juuts tum wibic juctiantsoca para jém immijtay. Siiga wí jém inñxcuy, jesic itumpiy jém immijtay íf jém juctiantsocajom. ²³ Siiga da wí jém inñxcuy, itumpiy jém immijtay íf piichcim. Siiga píchne jém juctiantsoca, tsam pimi piichcim miif.

Da wiap tañcuyoxap Dios y jém tumiñ
(Lc. 16:13)

²⁴ Da i wiap icuyoxa wisten iomi. Porque siiga itoypa tum, jesic ijóyixpa tungac. Siiga iwīnanigáypa tum, jesic tungac da iwīnanigáypa. Da i wiap icuyoxa Dios siiga tsam itoypa jém itumiñ.

Dios iwatpa cuenta jém imanictam
(Lc. 12:22-31)

²⁵ Jeeyucmi manmáypa iga: Odoy jisi júf impicpa títam inçútpa ni títam inucpa para miifpa yíp vida. Odoy jisi júf impicpa jém impuctucu para jém immijtay. Más wí jém imvida que jém inwícuy. Más wí jém immijtay que jém impuctucu. ²⁶ Ixi jém jonyaj jém quecpaap. Da ñipyajpa, dátim

ipiñyajpa jém cosecha iga iccáypa tum ticjom. Pero icwícpa jém tanJatuñ Dios jém ífwiip sinyucmi. Mich más miwí que jém jonyaj. ²⁷ Siiga tsam inñispa, ¿que wiap inñyon uxaj más?

²⁸ ¿Tiiga tsam inñispa júf impicpa jém impuctucu? Jistaami jém wibic moya jém nayñewiip copjom. Je da yoxap ni da pitpa. ²⁹ Pero ni jém rey Salomón cuando tsam wícuyajne, da ictsíypa iwí juuts jém wibic moya. ³⁰ Dios tsam iwíaccuyajne jém moya, jém itwiip copjom, pero joymi jípsquetpa. Mimichtam da inwícupicne Dios, pero je más mítoypa que jém moya. ³¹ Jeeyucmi manmáypa odoy jisi júf impicpa títam inçútpa y títam inucpa. Odoy jisi júf impicpa jém impuctucu. ³² Porque jexpic jixi iniif jém dápic icupicyajpa Dios. Tsam imétsyajpa itumpiy jexpic cosa, pero mimichtam iniif tum inñJatuñ sinyucmi. Ijodon títam mítogóyáy. ³³ Wiñti méstaami jutsap inñtigiyta júf injacpa Dios y jutsap inwatta jém wítampic cosa juuts ixunpa Dios, jesic ocmi Dios michiiba títam mítogóyáy. ³⁴ Odoy jisi títam mítogóyáypa para joymi porque joymi íf tiempo iga inñispatim. Cada jama iniif jém da wibic cosa.

Odoy jisi iga tsam tañcaíy jém inñiwi
(Lc. 6:37-38, 41-42)

7 'Odoy jisi tungac pixiñ iga tañcaíy, jesic Dios dátim mijisáypa mich inñañca. ² Siiga tsam inñispa iga tañcaíy tungac pixiñ, jesic Dios mijisáypatim mimich inñañca. Miquípsayapim con jeetim quipsóycuy jém impicnewiip

iga inqúips. ³¿Tíiga iníxáypa jém iníťwi tum xufu puchi iixcom? ¿Que dá injampa jém mijpic cuy iníxcom? ⁴¿Jutsap iníńmáym jém iníťwi iga mantobáypa jém puchi iníxcom cuando michgacti iniíťim tum mijpic cuy iníxcom? ⁵Tsam minimigóyayťap inyaac. Wińti topi jém cuy iníxcom, jesic inwíixáypa jém puchi jém iníťwi iixcom.

⁶Odoym chíi jém wibic cosa jém Diospic imiichi jém malopic pixińtam juuts jém chimpayaj. Porque dá iwíixayajpa jém Dios imiichi, mimalwadáypaťim mex mimich. Odoym coti jém perla, jém wibic tsa, jut ityaj jém yoya. Wiap icunepnepquetyaj.

Jutsap tampictsoj tífam tatogóyay

(Lc. 11:9-13; 6:31)

⁷Wágaytaami Dios tífam mífogóyay, je michiiba. Métstaami jém wítampic cosa, jesic impáttampa. Ticstaami jém tic ipuerta, míńáyayťap. ⁸El que iwágáypa Dios algun tí, chíiťap. El que imétspa jém wítampic cosa, ipáťpa. El que iticspa jém tic ipuerta, áńáyayťap.

⁹Siiga miwágáypa immanic tum caxťánańi, ¿que inchiiba tum tsa? ¹⁰Siiga miwágáypa immanic tum tiipi, ¿que inchiiba tum tsañ? ¹¹Mimichťam tsam mimalotam, pero injodon jutsap inchi immanic jém wítampic cosa. Pero jém tanJatuj Dios, jém itwiip sińyucmi, je dá malo; ichiiba jém imanictam jém wítampic cosa jém iwágaypáppic.

¹²Jesic mimichťam wíwadayťaami jém tunjac pixińtam

juuts mimichťam inxunpa iga miwíwadáypaťim mex jeeyaj. Siiga inwattámpa jempic, jesic cupacpa itumpiy jém Moisés inquímayooyi con jém anmaťi ijaychacnewiip jém wińicpic Dios inmaťciwiń.

Jém wayaypic puerta

(Lc. 13:24)

¹³Tigiytaami jém wayaypic puerta. Porque wíťi jém puerta y tsam wíťi jém tun jém nicpáppic jut togoyajpa jém pixińtam. Tsam jáyan nicyajpa jem. ¹⁴Wayay jém puerta y wayayťim jém tun jém nicpáppic jut ipictsojajpa jém vida jém đapic cuyajpa. Da waťi jém pixińtam ipátyajpa jém tun iga tigiyajpa jem.

Ixpictap jém cuy por jém itim

(Lc. 6:43-44)

¹⁵Nawattaji cuenta iga odoy mimigóyayíń jém malopic pixińtam, jém nímanťaayapaap iga icuyoxap Dios. Mińpa juuts tum wibic pixiń, pero mińpa imalwadáy jém Dios ipixińtam. Juuts jém lobo icunumpa jém borrego. ¹⁶Mimichťam wiap iníxpicta juutspic pixiń cuando iníxtámpa tí iwatpa. Mich injodon iga dá tantúcpa wibic uvas chicxchayyucmi. Dá tantúcpa tsuj apítcuyyucmi. ¹⁷Jém wibic cuy dá chióypa malopic tim. Jém malopic cuy dá chióypa jém wibic tim. ¹⁸Jém wibic cuy dá wiap ichiów jém malopic tim. Jém malopic cuy dá wiap ichiów jém wibic tim. ¹⁹Itumpiy jém cuy, jém đapic chióypa jém wibic tim, tinquimťap. Nooquettap juctjom. ²⁰Jesic mimichťam iníxpictámpa juutspic

píxiñ cuando íñixpa siiga iwíwatpa o imalwatpa.

Da ífumpiy tigiypa juť injjacpa Dios

(Lc. 13:25-27)

²¹Wafi jém píxiñtam anímayyajpa iga: “MánOmi, mánOmi”, pero da ífumpiy tigiyyajpa juť injjacpa Dios. Nada más tigiyyajpa jém iwatneyajwiip juuts ixunpa tanJatuñ Dios jém ítwiip siñyucmi. ²²Cuando núcpa jém jama, jescic jáyañ jém píxiñtam anímayyajpa: “MánOmi, mánOmi, ¿que da anañmatta jém Dios inñmáti mich inñiyimi, que da antopta jém mal espíritu mich inñiyimi, que da añwatta jáyañ jém wibic milagro mich inñiyimi?” ²³Jescic ich annímáypa jeeyaj: “Da mánixpicpa. Nicstaami mimichám, tsam immalwatneta.”

Jém wisten tic ibase

(Mr. 1:22; Lc. 6:47-49)

²⁴Jém píxiñ imatoñpa ich anañmáti y iwatpa juuts annímáypa jex juuts tum píxiñ tsampic jixiíy iga iwatpa tic. Icpimápa tum tsaayucmi. ²⁵Ocmi tsam pími chijóypa tuj. Compa jém ni. Tsam pími poypa jém sawa. Ictsiypa jém tic, pero da cutiñpa porque pímane tsaayucmi. ²⁶Tuñgac imatoñpa ich anañmáti, pero da iwatpa juuts annímáypa. Je jex juuts tum píxiñ dápac jixiíy. Iwat tum tic, pero icpimápa pooyucmi. ²⁷Ocmi tsam pími chijóy tuj, compa ni, pími poypa jém sawa. Ictsiy jém tic, iccutiñ, da fi tsíy.

²⁸Jescic cuando yaj inñmat Jesús jém inñmáyooyi tsam

ipooñañjamyajpa jém píxiñtam, ²⁹porque inñquejáypa juuts tum añjagooyi da jex juuts jém escribaspic maestroyaj.

Jesús icpis tum píxiñ jém iniítwiip jém lepra caacuy

(Mr. 1:40-45; Lc. 5:12-16)

8 Cuando quet Jesús jém cotsicyucmi, itúñiyay jáyañ jém píxiñtam. ²Jescic miñ tum píxiñ tsam mimne, cupúgayñe inñaca, iniít jém lepra. Icosteñáy jém Jesús.

Nimpa jém mimnewiip:

—MánOmi, siiga inñwianjam, wiap anacpis.

³Jescic Jesús ichicunuc jém píxiñ, inñmáy:

—Añwianjam. Micuáyñeum.

Jescic yaj ními jém Jesús, pisum jém píxiñ, witsiyum jém inñaca.

⁴Jescic Jesús inñmáy jém píxiñ:

—Odooy i anañmáya iga ich manacpis, pero nígi añquejaayi jém panij iga michacneum jém caacuy. Jescic chiñ Dios jém ofrenda juuts nimpa jém Moisés inñquímayooyi iga miixtáp iga numa mipisneum.

Acpišta jém capitán imozo

(Lc. 7:1-10)

⁵Jescic núc Jesús jém atebet Capernaum. Tum Romapic capitán icunuc Jesús, moj icunucsay.

⁶Nimpa jém capitán:

—Maestro, mimne actiñ tum wññajchixi anticciim, tum jém añcuyoxapaap. Tusacane icumuma. Tsam pími yaachap ixí.

⁷Jesús inñmáy:

—Nícpa anacpis.

⁸Nimpa jém capitán:

—Maestro, da wı iga miñicpa anticciim porque mich agui wibic mipixiñ, ich tsam atáncafy. Nada más piimiyi jem caacuy iga ichaguñ jem aŋcuyoxapaap, jesic pispa. ⁹Porque ich anaitim tum ananjagooyi iga apiimıyapa. Ich anaitim soldado jem ampiimiypaap. Siiga annımáyapa jem ansoldado iga niguiñ, jesic tienes que nicpa. Siiga annımáyapa iga miñiñ, jesic tienes que miñpa. Siiga ampiimıyapa tum jem acuyoxapaap iga iwadiñ alguna cosa, jesic tienes que iwatpa.

¹⁰Jesic mimatoŋ jem Jesús junimpa jem capitán, agui ipooñanjam.

Iñımáy Jesús jem itúnıyaypaap:

—Numa mannımáyapa, icuwıti tannación de Israel da ampát ni tum pıxiñ wiap icupic Dios juuts yıp capitán. ¹¹Mannımáypatim iga tsam jáyan pıxiñtam jem dapic je de Israel miñaypa juťquej yıp naxyucmi. Miñaypa aŋniisaumipic y aŋyomsaumipic. Iwaganacoñaypa jem wiñicpic aŋmatciwiñ jem Abraham, Isaac y Jacob juť injacpa Dios. ¹²Pero waťi jem Israelpic pıxiñtam jem iniitwiip derecho iga tiğıyapa juť injacpa Dios, quebacputyajtap. Tsacyajtap aŋsıcmi jem piichciim. Jemum tsam weyaypa, tsam iñichaypa ífits.

¹³Jesic Jesús iñımáy jem capitán:

—Nicsim iñticmi. Mich iŋcupic iga Dios miwadáy juuts mich iñxunpa. Jempam iwat.

Jeetı hora pisum jem icuyoxapaap.

Pis jem Peto imiidapa

(Mr. 1:29-31; Lc. 4:38-39)

¹⁴Cuando núc Jesús jem Peto ificciim, iix iga wone icheesmi jem

Peto imiidapa. Tsam pımi jawanfy.

¹⁵Jesic Jesús ichigáy jem yomo ici. Ichac jem jawan, jeetı rato tsucum, moj icwıcyaj jem Jesús con icuyujciwiñ.

Jesús icpis jáyan jem mimneyajwiip

(Mr. 1:32-34; Lc. 4:40-41)

¹⁶Jesic piichawum itı, jem pıxiñtam inimıñayay Jesús jáyan jem iniitwiip jem mal espíritu. Itop jem mal espíritu, nada más ijfyáya iga puđiñ. Icpis itumpiy jem mimneyajwiip.

¹⁷Jempam iwat Jesús iga cupacpa jem aŋmaťi juuts ijaychacne jem wiñicpic aŋmatciwiñ jem Isaías. Nımpa: “Je iyaac ipıctsoŋ taichıtam taŋcaacuy. Ipıctsoŋ itumpiy jem yaachajı.”

Waťi itúnıyfooba Jesús

(Lc. 9:57-62)

¹⁸Jesic cuando iix Jesús iga aŋtuumayajpa tsam jáyan pıxiñtam, iñımáy jem icuyujciwiñ:

—Tanıctámpa jem laguna aŋwiñtuc.

¹⁹Jesic miñ tum jem escribaspic maestro. Iacunúc jem Jesús, iñımáy: —Maestro, mantúnıyapa juťquej juť miñicpa.

²⁰Jesús iñımáy jem pıxiñ:

—Jem zorra iniit ijos juť moŋpa. Jem jon iniitım ipeeñi. Pero ich, jem aMiñnewiip Siŋyucmi, da anai juť anaczejpa aŋcobac.

²¹Jesic tungac jem icuyujciwiñ iñımáy jem Jesús:

—MánOmi, ajıgaayı iga wiñı nicpa aŋcum jem anjatun. Ocmi mantúnıyapa.

²²Pero Jesús iñımáy:

—Miñi atúnıyı. Tsacı jem caaneyajwiip iga nacumyajtap jeeyaj.

Jesús icteeñanjacpa jém sawa y jém niipoa

(Mr. 4:35-41; Lc. 8:22-25)

²³ Jesic Jesús tigiy tum barcojom. Tigiyíim mex jém icuyujciwiñ.

²⁴ Ocmi moj poyi jém sawa jém laguna. Tsam pimi poypa hasta tigiypani jém barcojom. Pero moñpa Jesús. ²⁵ Jesic jém icuyujciwiñ nic ichicyus. Inímayyaj:

—Mánomi, aciacputtaami porque tacumonjampam niicim.

²⁶ Jesic Jesús inímay:

—¿Tiiga tsam micijntampa? ¿Que dá incupicpa ni uxaj iga Dios miyoxpátpa?

Jesic tsucum Jesús, inímay jém sawa y jém niipoa iga teeñanjaguiñ. Jesic teeñanjac jém sawa y jém niipoa. Dam ti tsigóypa. ²⁷ Jém icuyujciwiñ agui ipooñanjamyaj. Nanímayyajta entre jeyaj:

—¿Iapaap yíp pixin iga inímay jém sawa y niipoa iga teeñiñ y icupicpa?

Jém Gadarapic pixin jém imatsnewiip jém mal espíritu

(Mr. 5:1-20; Lc. 8:26-39)

²⁸ Jesic cuando núc Jesús jém laguna anwiñtuc jém naxyucmi de Gadara, ipát wisten pixin jém imatsnewiip jém mal espíritu. Putyaj jém camposanto, icunúcyaj Jesús. Tsam pimi maloyaj juuts tum jimñi animat. Tsam pimi icinyajpa jém ityajwiip jem, dá i wiap inas jém tunjom. ²⁹ Jesic pimi jiyajpa jém wisten. Nimyaj:

—¿Tiiga miñigycúmpa con aichfám? Mich miJesús jém

Yucmipic Dios miManic. ¿Que mimiñ yim iga anyaachwattampa antes que danam núcpa jém inajpic jama?

³⁰ Jesic dá más juumi ityaj tsam jáyan yoya. Wícpa ixiiyaj. ³¹ Jesic jém mal espíritu icunucsay jém Jesús. Nimpa:

—Siiga antoptampa, ajigaytaami iga atigiypani jém yoya inamanjom.

³² Jesic Jesús inímay:

—iNicsim!

Jesic putyajum jém mal espíritu. Tigiyyaj jém yoya inamanjom. Jesic póyanjsucumyaj jém yoya. Poyimi quetyaj jém tejajyucmi, actinyaj jém laguna, jicjicayaj niicim.

³³ Tsam pimi ichiganjécya jém iwatyajpáppic cuenta jém yoya. Poyimi nicyajpa iticmi. Cuando núcyaj, moj inmadayyaj los demás ti inasca jém imatsnewiip idic jém mal espíritu. ³⁴ Jesic itumpiy jém ityajwiip jém attebet, nic iamyaj jém Jesús. Cuando iixyaj, icunucsayyajpa iga cáyiñ de jém naxyucmi de Gadara.

Acpiatap tum pixin tusacanewiip

(Mr. 2:1-12; Lc. 5:17-26)

9 Jesic tigiy Jesús tum barcojom, eybic jac jém laguna anwiñtuc. Nic iticmi. ² Jesic algunos inimíñayyaj Jesús tum mimnewiip, tusacane icumuma. Wone tum tseesyucmi mu inimiñyaj. Cuando Jesús iix iga tsam icupicyajpa iga Dios wiap icpis, jesic inímay jém mimnewiip:

—Manic, maymáyajji, miwadayñeta perdón jém iníñanca.

³ Íftim jem jutén escribaspic maestroyaj. Ijisyajpa ijixianjom:

“Yíp p̄ixiñ icujiypa tanDios.” ⁴Pero Jesús ijodoᵋ ᵋi s̄ip ijisyaj, jesic iñímáy:

—¿T̄iiga iniit̄ jém malopic̄ jixi iñanamaᵋjom? ⁵¿Júp más ᵋa táᵋca iga annímáypa yíp p̄ixiñ iga: “Manaccáyápa iñt̄áᵋca”, o iga annímáypa: “Tsucumi, wífim”? ⁶Nimf̄im Jesús:

—Pero iga iñjodóᵋata iga jém Miññewiip̄ Siᵋyucmī iniit̄ jém ip̄imi iga wiap̄ iccáyáy jém p̄ixiñ it̄áᵋca yíp naxyucmī (jesic iñímáy Jesús jém tusacanewiip̄): Tsucumi, p̄iᵋim̄ jém iñchees, nic̄sim̄ iñt̄icciim̄.

⁷Jesic tsucum̄ jém p̄ixiñ, nicum̄ it̄icciim̄. ⁸Cuando iixyaj̄ jém p̄ixiñtam̄ ᵋi iwat̄ Jesús, tsam̄ ciᵋnyaj, icujípyajpa Dios iga icutsat̄ yíp naxyucmī jém ip̄imi.

Jesús iᵋwejaȳ jém Mateo

(Mr. 2:13-17; Lc. 5:27-32)

⁹Jesic moj̄ niq̄ui Jesús. Iix iga jemum̄ coñ̄ jém calle aᵋᵋca tum̄ p̄ixiñ ichécpa jém impuesto. Iñiyi Mateo. Jesic Jesús iñímáy:

—Atúᵋiyyi.

Tsucum̄ jém Mateo, nic̄ it̄úᵋȳ jém Jesús.

¹⁰Jesic ocmī iganam̄ wícpa Jesús jém Mateo it̄icciim̄, núcyaj̄ jáyaᵋ jém ichécyajpaap̄ impuesto con tunᵋac̄ jém táᵋcaiywiip̄. Miñ iwaganacoñ̄yaj̄ jém Jesús con jém icuyujciwiñ. ¹¹Jesic cuando jém fariseoyaj̄ iixyaj̄ ᵋi iwat̄ jém Jesús, iñímayyaj̄ jém icuyujciwiñ:

—¿T̄iiga wagawícpa jém immaestro con jém ichécyajpaap̄ impuesto y jém tunᵋac̄ táᵋcaiywiip̄?

¹²Cuando imatoᵋ Jesús ᵋi nimyajpa, iñímáy jém fariseoyaj:

—Jém ᵋapic̄ mimne ᵋa ixunpa jém tsóyíoypaap, pero jém mimneyajwiip̄ ixunpa jém tsóyíoypaap. ¹³Nigī cuyujcaī ᵋi nimtooba jém Dios iᵋmaᵋtī juᵋ jaychacneta: “Más w̄i iga iñt̄oyiñ̄ jém iñfiwitam̄ que iga iᵋwatpa jém sacrificio.” Jesap̄tim̄ aich̄ ᵋa miñ̄ amméts̄ jém ᵋapic̄ táᵋcaiy. Miñ̄ amméts̄ jém táᵋcaiywiip̄ iga icucacyajiñ̄ jém ij̄ixi.

Iᵋmatpa Jesús de jém ayuno

(Mr. 2:18-22; Lc. 5:33-39)

¹⁴Jesic miñ̄yaj̄ jém Xiwan̄ icuyujciwiñ̄ jém acch̄iᵋoypaap. Miñ̄ icwácyaj̄ jém Jesús. Nimyaj:

—¿T̄iiga aicht̄am̄ con jém fariseopic̄ p̄ixiñtam̄ tsam̄ aᵋwatt̄ampa ayuno, pero mich̄ iᵋcuyujciwiñ̄ ᵋa iwatyajpa ayuno?

¹⁵Jesús icutsoᵋ. Nimpa:

—¿Que wiap̄ iᵋyácneyaj̄ jém aᵋwejayñetawiip̄ juᵋ it̄ tum̄ aᵋcoom̄yóycuȳ iganam̄ it̄ jém yoomiypaap? Pero núcpa jama cuando accáyᵋap̄ jém yoomiypaap, jesic̄ n̄uma iwatyajpa ayuno.

¹⁶Jesic Jesús iᵋquejaȳtim̄ iga jém jom̄ipic̄ aᵋquímayooyī ᵋa iw̄inanigáypa jém wiñ̄icpic̄ j̄ixi. Nimpa:

—ᵋa ī iᵋtót̄spa tum̄ pecapic̄ yooᵋī con tum̄ j̄aca jom̄puct̄ucu. Porque siiga iwatpa jemp̄ic̄, nian̄xichpa jém jom̄ipic̄ puct̄ucu, más p̄imī j̄acpa jém pecapic̄ puct̄ucu juᵋ aᵋtót̄sne.

¹⁷ᵋa ī icucompa jom̄vino jém pecapic̄ cuero bolsajom̄. Porque siiga jemp̄ic̄ iwatpa, tojaᵋsajpa jém pecapic̄ cuero bolsa, cutegáypa jém vino, togoypa jém cuero bolsa. Jeeyucmī cucomᵋap̄ jém jom̄vino

jém jomipic cuero bolsajom, jesic
 da togoypa jém bolsa ni jém vino.

**Jém Jairo iyommanic y jém yomo
 jém ichigaywiip jém Jesús ipuctucu**

(Mr. 5:21-43; Lc. 8:40-56)

¹⁸Iganam inmatpa Jesús, núc tum
 Israelpic anjagooyi. Icosteeñáy jém
 Jesús. Inímáy:

—Yaguiñ ca jém anyommanic.
 Nigi tsiccunuuci jém anyommanic
 iga pixiñ.

¹⁹Tsucum Jesús. Iwagananicayaj
 jém anjagooyi con jém icuyujciwiñ.

²⁰Iganam niquiyaj, tum yomo
 icunúc jém Jesús ituññañcim.
 Tsam mimne. Doce amtiy imatsne
 jém caacuy iga quetpa inñipiñ, da
 nunca teñpa. Ichigáy jém Jesús
 iyooñi ignaca. ²¹Ijjspa jém yomo
 ijixianjom. Nimpa: “Siiga nada más
 antsigáypa jém iyooñi, jesic apispa.”

²²Jesic ámsset Jesús, iix jém yomo.
 Inímáy:

—Miyomo, odoy cñi. Tsam
 incupicpa iga Dios wiap micpis,
 jeeyucmi mipisneum.

Jeeti rato pisum jém yomo.

²³Cuando núc Jesús jém
 anjagooyi iticciim, iix iga it jém
 susyajpaap iga nicpa icumta. Agui
 anyácnayaj jém pixiñtam. Agui
 wejyajpa. Tsam it bulla. ²⁴Inímáy
 Jesús jém ityajwiip jem:

—Mimichtam puttaami anjicmi.
 Da nunta caane yíp woñi. Nada más
 moñpa.

Pero tsam ixiccayajpa jém Jesús.

²⁵Cuando cupudayyaj, jesic tigiy
 Jesús jém ticjom. Imatsáy jém
 woñi ici, tsucum jém woñi. ²⁶Jesic
 icuwíti jém naxyucmi jodónata tí
 iwat jém Jesús.

Jesús icpis wisten cáchtí

²⁷Jesic nic Jesús. Nas juñ íf
 wisten cáchtí. Moj itúnjyyaj. Pimi
 anwejyajpa. Nimyaj:

—Mich mirey David mimanic,
 ayaachanjami.

²⁸Cuando tigiyñe Jesús tum
 ticjom, tigiyajtim jém cáchtí.
 Iacunúyaj Jesús. Jesic Jesús moj
 icwác jém cáchtí. Inímáy:

—¿Que incupictámpa iga ich
 awiap?

Nimyaj jém cáchtíyaj:

—¡Jí, mánOmi!

²⁹Jesic Jesús ichigáy iixcuy jém
 wisten cáchtí. Inímáy:

—Siip manwadáypa jempic
 porque mich tsam incupicpa iga
 Dios wiap miyoxpát.

³⁰Jesic toj jém cáchtí iixcuy.
 Wítsiyum. Jesic duro inquímpa
 Jesús iga odoy i inmadáyñ. Inímáy:

—Odoy i anmadaayi iga manacpis.

³¹Pero cuando nicneyaj jém
 cáchtipic idíc, inmadayyajpa i quej
 tí iwat Jesús icuwíti jém naxyucmi.

Jesús icpis tum uma

³²Cuando yaj niquiyaj jém
 cáchtíyaj, namíñayta Jesús tum
 uma. Iniif tum mal espíritu jém
 pixiñ. ³³Cuando tobayta jém mal
 espíritu mojum jiyi jém uma. Agui
 ipooñanjamyaj jém ityajwiip jem.
 Nimyaj:

—Da queman tánix yicxpíc cosa
 yíp naxyucmi Israel.

³⁴Pero jém fariseoyaj tsam
 jóyñeyaj. Nimyaj:

—Yíp pixiñ wiap ítop jém mal
 espíritu porque iniif jém Wocciwiñ
 ipimi.

Jesús iyaachanjampa jém pixiñtam

³⁵Nic Jesús itumpiy jém attebetyaj y jém tiganjoj. Accuyujóypa jém sinagoga juť icuyujcayajpa jém Moisés inquímayooyi. Inmadáypa jém miññeyajwiip jutsap itigiyyaj juť injjacpa Dios. Icpis itumpiy jém mimneyajwiip y jém iniitwiip wafi jém caacuy. ³⁶Pero cuando iix Jesús iga tsam jáyan miññeyaj, agui iyaachanjampa porque tsam yaachaneyaj, agui uuguayajim juuts jém borregoyaj cuando da i iwatne cuenta. ³⁷Jesic inímáy Jesús jém icuyujciwiñ:

—Numa, juuts tum mijpic cosecha, tsam jáyan jém pixiñtam icupictooba Dios, pero jém yoxaciwiñ, jém inmatyajpáppic jém Dios inmati, da wafi. ³⁸Jeeyucmi mannímáypa, wágaytaami jém cosecha iQmi iga icutsadiñ jáyan jém yoxaciwiñ iga ipinyajpa jém cosecha.

Jesús icupij jém doce icuyujciwiñ

(Mr. 3:13-19; Lc. 6:12-16)

10 Jesic Jesús inwejay jém doce icuyujciwiñ. Ichi jém pimi iga wiañ itopyaj jém mal espíritu y iga wiañ icpisyaj itumpiy jém mimneyajwiip y jém imatsnewiip caacuy.

²Yipyaj iníyi jém doce icuyujciwiñ jém apóstolyaj: Wiñti jém Ximoj, iníyitim Peto; jém Anti, jém Peto itíwi; jém Jacobo, jém Zebedeo imaníc; jém Xiwan, jém Jacobo itíwi; ³jém Felipe; jém Bartolo; jém Tomax; jém Mateo, jém ichécpaap idíc impuesto; jém

Jacobo, jém Alfeo imaníc; jém Tadeo; ⁴jém Ximoj, jém itwiip con jém partido cananista; jém Judas Iscariote, jém iwadaypaap atraición Jesús.

Cutsatyajta iga inmatyajpa Dios inmati

(Mr. 6:7-13; Lc. 9:1-6)

⁵Jesic Jesús icutsat jém doce icuyujciwiñ iga inmatyajiñ jém wibic anmati. Inímáy ti wiap iwatyaj. Nímayyajta:

—Odoy nictaami juť it jém tungac pixiñtam jém dápic je de Israel. Odoy tigiyaami jém Samariapic iattebetyaj. ⁶Más wi iga miñictamiñ juť it jém Israelpic borregoyaj jém togoyñewiip. ⁷Iganam miñicpa, anmati iga noco it jém tiempo iga Dios injjacpa yip naxyucmi. ⁸Acpiastaami jém cupúgayñewiip inñaca con itumpiy jém mimneyajwiip. Acpiastaamitim jém caanewiip. Tobaytaami jém mal espíritu jém iniitwiip jém pixiñtam inamanjom. Da mantségáy cuando manchiita ampimi, jesic odoy tséctaami cuando inicpispá.

⁹Odoy nanictaami tumiñ; ni plata, ni oro, ni cobre imbolsajom. ¹⁰Odoy nanictaami immorral, ni wisten inyoofí, ni tungac injciac, ni imbastun, porque jém yoxaciwiñ wi iga chiifap jém iwíccuy.

¹¹Cuando miñúctampa tum attebet o tum xufu tiganjoj, métstaami tum wibic pixiñ juť miñúctampa. Jemum tsíytaami hasta que miñictampa tungac tiganjoj. ¹²Cuando miñigiytampa tum ticjom, dioschi jém ifyajwiip jem. Wágaayi Dios iga ichiñ

bendición. ¹³Siiga wibic p̄ixiñ ítyaj jém ticjom, jesic Dios ichiiba jém bendición. Pero siiga malopic p̄ixiñ ítyaj jém ticjom, jesic Dios da ichiiba bendición. ¹⁴Siiga da mipictsonpa ni da imatontooba títam ininmadáypa, jesic cuando miputtámpa jém ticjom o jém tiganjoj, cunebaayi jém impuy ipótpót iga quejiñ iga da i mipictson. ¹⁵Numa mannímáypa cuando núcpa jém jama iga Dios ichiiba castigo jém malopic, jesic más mijpic castigo chiítap jém dápic ipictson ich anañquímayooyi que jém ítyajwiip jém atebet de Sodoma y Gomorra.

Nímayyajta jém doce iga tsam malwadaytap

¹⁶Amatontaami. Mimichám mañcutsatpa juuts tum miborrego juú tsam it jém pajo. Wi iga agui mijáyayanjichich juuts tum tsañ. Pero naiítaami jém wibic jixi juuts tum cuucu dápic malo. ¹⁷Nawattamtaji cuenta porque jém malopic p̄ixiñ tsam mimatstooba, micijjucotpa jém Sanhedrín icijjom. Micótstap jém sinagoga. ¹⁸Mininictamtap hasta jém más mijpic anjagooyiciim hasta juú it jém gobernador y hasta juú it jém reyyaj ich ançuyucmi. Jempigam wiap ininmadáy ich anañmaí jém anjagooyiyaj y itumpiy jém tunçacpic p̄ixiñtam jém dápic je de Israel. ¹⁹Pero cuando mininictamtap jém anjagooyiciim, odoy jisi jutsap inçutsonpa jém anjagooyi o tí inñímáypa porque jeefi rato Dios michiiba jixi jutsap inçutson jém anjagooyi. ²⁰Cuando

inçutsonpa da mimichám mijiyapa. Jiyapa jém Dios iAnama, michiiba jixi, jesic wiap inçutson jém anjagooyi.

²¹Núcpa jama iga algunos iwadáypa atraición jém inuntatiwi iga accataiñ. Jém jatunpic iwadáypaítm atraición jém imaníc. Jém manicpic iwadáypa atraición jém ijatun o jém iapa iga accataiñ. ²²Itumpiy jém p̄ixiñtam tsam mijóyixpa ich ançuyucmi. Pero siiga inyaachýpa cuando miyaachwattap y da inñacpa ich anañmaí hasta jém inañpigam jama, jesic miciaçputpa Dios. ²³Cuando miyaachwattap tum atebet, jesic poytaami, nictaami tunçac atebet. Numa mannímáypa iga antes que da yajpa inñasca jém tiganjoj de Israel, núcpa jém Miñnewiip Siñyucmi. ²⁴Tum maestro icuyujciwiñ da wiap inñasca jém imaestro. Tum esclavo da wiap inñasca jém iomi. ²⁵Itum wi siiga jém maestro icuyujciwiñ tsý juuts jém imaestro, siiga jém esclavo tsýpa juuts iomi. Siiga nímaytap jém jatunpic iga Beelzebú, jesic malnámaytaptim jém ítyajwiip iticciim.

I wiap tañcin

(Lc. 12:2-7)

²⁶Odoy cñtaami jém malopic p̄ixiñtam. Dios inquejpa itumpiy jém jixi jém anyamnewiip. Jodónatap itumpiy jém jixi jém anñcnewiip. ²⁷Títam manyamnímáypa, mimichám anmattaami jém p̄ixiñtamanjom. Títam manyamnímáypa, anmattaami juúquej iga imatonyajjiñ

ítumpiy jém pixiñtam. ²⁸Odooy cñtaami jém pixiñ jém wiapaap miccaáy jém immijtay porque jém ñanama da wiap miccaáy. Más wi iga iñcñtampa Dios jém wiapaap miccaáy immijtay y jém ñanama icotpa jém juctjom juí da nunca pícha.

²⁹Maytap wisten xuxú jon por tum centavo, pero ni tum de jém jonyaj da cutijpa naxyucmi siiga jém tanjatuj Dios da ijépa. ³⁰Dios imayñe ítumpiy jém iñway jutén iniit jém iñcobacyucmi. ³¹Jeeyucmi mannímáypa, odoy cñtaami. Más mítoypa Dios que jém xuxú jonyaj.

**Jém dápic iñnécpa iga icupicpa
Cristo**

(Lc. 12:8-9)

³²Ítumpiy jém iñmatyajpápic jém pixiñtamanjom iga acupicpa, jesic ampictsonpa siñyucmi jém anjatuj Dios iwiñjom. ³³Pero siiga tum pixiñ iñnécpa iga acupicpa jém pixiñtamanjom, jesic da ampictsonpa siñyucmi jém anjatuj Dios iwiñjom.

**Nawécyajtap jém pixiñtam jém
Cristo icuyucmi**

(Lc. 12:51-53; 14:26-27)

³⁴Odooy jisí iga amiñ yíp naxyucmi iga anañjijacpa jém añayajpápic. Da anamiñ jém paz, anamiñ jém espada. Ich añcuyucmi tsam añayajpa yíp naxyucmipic. ³⁵Ich miñ anactsucum iga añayajiñ tum pixiñ con ijatuj, iga añayajpa tum yomo con iapa, iga tungac yomo añayajpa con ixaquí. ³⁶Jém ítayajwiip iñfcjom tsíyyajpa iga ínenemigoyaj.

³⁷Siiga más iñtoypa iñjatuj o ñapa que antoypa aich, da wiap iñchíy juuts ich mammíchi. Siiga más iñtoypa jém iñjaymanic o iñyommanic que antoypa aich, da wiap iñchíy juuts ich mammíchi. ³⁸Jém dápic ijépa iga yaachwattap juuts ich ayaachwattap y atúnjyapa, da tsíyapa juuts ich ammiíchi. ³⁹Siiga tum pixiñ tsam ijépa jém ivida iga odoy togóyíñ, jesic togoyapa jém ivida. Pero siiga togoy tum pixiñ ivida ich añcuyucmi, jesic iniitpa jém ivida.

**Chiiyajtap wibic coñwiyooyi jém
ipictsonpápic jém Dios iñmatciwiñ**

(Mr. 9:41)

⁴⁰Jém mipictsonpaap mimichíam, apictsonpatim aich. Jém apictsonpaap aich, ipictsonpatim jém anjatuj Dios jém acutsatnewiip yíp naxyucmi. ⁴¹Jém ipictsonpaap tum jém Dios iñmatciwiñ porque icutsat Dios tienes que ipictsonpatim jexpicím coñwiyooyi juuts ipictsonpa jém Dios iñmatciwiñ. Jém ipictsonpaap tum wibic pixiñ iga iwíwadáypa, je tienes que ipictsonpatim jexpicím coñwiyooyi juuts ipictsonpa jém wibic pixiñ. ⁴²Siiga i ichiiba tum taza pagac ni tum jém añcuyujciwiñ ich añcuyucmi, numa mannímáypa iga je ipictsonpa tum wibic coñwiyooyi.

Jém Xiwan jém acchíñoyapaap

(Lc. 7:18-35)

11 Jesic cuando yaj iñímáy Jesús jém doce icuyujciwiñ í wiap iwatyaj, moj niqui Jesús. Nic iñquejáy jém pixiñtam ítumpiy

jém attebetayaj jém naxyucmi de Galilea. Inmadáy jém Dios inmáfi.

²Jém Xiwan jém acchíñoypaap pajnetá cárcel. Cuando imatoŋ tí iwat jém tánOmi Cristo, jesic icutsat wisten jém icuyujciwiñ iga níguiñ icwácyaj Jesús. ³Cuando núcyaj juí íf Jesús, moj icwácyaj. Nímyaj:

—¿Que micham jém miCristo jém miñpaap yíp naxyucmi o ananjóctámpa tunḡac?

⁴Jesús icutsoŋ. Inñímáy:

—Nígi nímaayi jém Xiwan tí inñixñeta y tí immatoŋneta.

⁵Aŋmadaytaami iga ixixóypam jém cáchtí, wíŋpam jém cuxujpic idíc, písneum jém cupúgayñewiip idíc inñaca, matóŋópam jém chajca, písneum jém caaneyajwiip idíc y jém yaachayajpaap ipictsoŋyay jém wibic aŋmáfi iga Dios iciacputpa.

⁶Agui maymay jém píxiñ jém dápic ijícpa iga í ictsacpa ich anañmáfi.

⁷Cuando nícyaj jém Xiwan icuyujciwiñ, jesic jém Jesús moj inmadáy jém píxiñtam iga wibic aŋmafcíiwiñ jém Xiwan. Nímayyajta:

—¿Tí oy inñámta jém titsinaxyucmi? ¿Que oy inñámta tum píxiñ dápic wiap juuts tum póc jém aguipic ictsigóypa sawa? Da je. Oy inñámta tum píxiñ wiapaap. ⁸¿Que oy inñámta tum píxiñ agui wícuyajne? Da je. Tanjodontam iga jém wícuyajnewiip ífyaj jém rey íficcíim. ⁹¿Que tí oy inñámta jém titsinaxyucmi? ¿Que oy inñámta tum Dios inmafcíiwiñ? Numa tum aŋmafcíiwiñ más wiap que íŋumpiy jém wiñicpic aŋmafcíiwiñ.

¹⁰Nimpa jém Dios inmáfi tí iwatpa jém Xiwan:

Dios icutsatpa tum aŋmafcíiwiñ iga iwítsagáypa jém Cristo ítuŋ.

Jém aŋmafcíiwiñ aŋjagoyñeeba inñic.

Ocmi ítuññaŋcím miñpa jém Cristo.

¹¹Numa mannímáypa iga icuwífi yíp naxyucmi da í tunḡac píxiñ más wiap que jém Xiwan jém acchíñoypaap. Pero cuando núc jém tiempo iga injacpa Dios, jém más xutupic jém Dios ipixiñtam más wiap que jém Xiwan.

¹²Dende núc jém Xiwan, jém acchíñoypaap, hasta siip jém píxiñtam tsam tigiyajtooba píimimi juí injacpa Dios. ¹³Jém Moisés inquímayooyi con íŋumpiy jém wiñicpic aŋmafcíiwiñ inmatyay tí miñpa. Cuando núc jém Xiwan, moj iccupac tí nim jém aŋmafcíiwiñ.

¹⁴Yíp Xiwan, jém acchíñoypaap, jeeŋim jém Elías jém miñpáppic; siiga michtam incupicpa. ¹⁵Siiga mitatsigiyta, matonŋaami.

¹⁶Siip manañquejáypa juuts tí jém píxiñtam jém ítyajwiip siip. Jex juuts jém tsixtam jém mýchayajpáppic plaza. Inñimayyajpa jém iamigoyaj: ¹⁷“Mansusáypa jém flauta, pero da mietstámpa. Ocmi manwánáypa jém wañi anyácnewiip, pero dáŋim miwejtámpa.” ¹⁸Porque cuando miñ jém Xiwan, da icútpa caxtánāni ni da iucpa vino, pero mimichfam miñimtámpa iga iniíŋ tum mal espíritu. ¹⁹Ocmi ich anyaac amiñ siŋyucmi. Awícpa, ánuca jém vino, pero mimichfam miñimtámpa iga tsam awícpa, tsam ánuca jém vino y tsam ánamigo jém malopic

pixiñtam con jém ichécyajpaap impuesto. Quejpa iga wí jém jixi siiga wíputpa jém yoxacuy.

Jém attebetyaj jém ďapic icupicyajpa

(Lc. 10:13-15)

²⁰ Jesic jém Jesús moj iwogáy jém ítyajwiip jém attebetyaj juť oy iwat jáyaŋ jém milagro porque jeeyaj ďa ichacyaj iga imalwatyjpa. Nímpa Jesús:

²¹—iAgui miuuguyťim mimichťam miitwiip jém attebet Corazín! Agui miuuguyťim mimichťam miitwiip jém attebet Betsaida. Jém ítyajwiip jém attebet Tiro y Sidón ďa iixñeyaj jém milagroyaj juuts šiip íñix. Pero meega iixñeyaj, pecam ichacneyaj jém imalajixi, agui aŋyácneyaj iga táŋcaťy. ²²Jeeyucmi mannímáypa, cuando núcpa jém jama iga Dios iciipinpa yíp naxyucmipic pixiñtam, jesic más pimi michiitap castigo mimichťam que jém ítyajwiip jém attebet Tiro y Sidón. ²³Mimichťam miitwiip jém attebet Capernaum tsam micujípyajpa jém pixiñtam, pero tienes que mininictamtap jém piichciim juť íť jém caaneyajwiip. Porque meega aŋwatne jém milagro jém attebet Sodoma juuts aŋwatne mimichťamanjom, jesic ďa idic togoypa jém attebet hasta šiip.

²⁴Numa mannímáypa iga cuando núcpa jém jama iga čiipínóypa Dios, más pimi michiitap castigo mimichťam que jém ítyajwiip jém attebet Sodoma.

Miñtaami con aich, manacjejpa

(Lc. 10:21-22)

²⁵Jesic jém tiempo nim Jesús:

—ManJatuŋ Dios, mich iniŋjacne jém siŋ y jém nas, tsam maŋcujíppa. Mich iniŋnéc jém wibic jixi iga jém tsampic icutiíyiyajpa yíp naxyucmipic jixi ďa wiap icutiíyí. Pero iniŋquejayñe jém wibic jixi jém pixiñtam jém ďapic icuyujcaneyaj yíp naxyucmipic jixi. ²⁶Jempigam iŋwat, manJatuŋ Dios, porque jempigam iŋwianjam.

²⁷Jesic Jesús iñímáy jém pixiñtam:

—Jém anJatuŋ Dios aciijuŋcodáy íťumpiy jém wítampic jixi. Da i ijodoŋ jém Dios iManic ijixi, icutum ijodoŋ jém iJatuŋ tí ijispa iManic. Datim i ijodoŋ jém anJatuŋ Dios ijixi, icutum ijodoŋ jém iManic con jém pixiñtam jém iwianjampáppic iManic iga icjodónap jém Dios ijixi. ²⁸Miñtaami yim iñťumpiyťam mimichťam jém tsampic miyoxane, jém tsampic michiimane, manacjejpa. ²⁹Pictsonťaami jém yugo jém ichpic manchiiba iga tawagayoxap. Cuyujcataami ich ananquímayooyi porque je ďa táŋca. Ich da malo ánanama. Manyoxpátpa. Impátťampa juť wiap ijej jém iñanama. ³⁰Ich anyugo ďa táŋca. Ich antsimi xejciy.

Jesús icuyujciwiñ íťúcyaj trigo jém jejcuy jama

(Mr. 2:23-28; Lc. 6:1-5)

12 Jesic tum jejcuy jama widaŋnaspas Jesús juť ñipnetā jém trigo. Jém icuyujciwiñ como tsam yuaneyaj, moj ijudayyaj jém trigo ipac, icútyaj. ²Pero cuando jém fariseoyaj iixyay tí iwatyaj jém Jesús icuyujciwiñ, nímayťa jém Jesús:

—Ixí jém inçuyujciwiñ.
¿Tíiga iwatyajpa contra jém
tanañquímayooyi jém jejcuy jama?

³Jesic Jesús iníímáy jém
fariseoyaj:

—¿Que dá queman immay tí
iwat jém David cuando tsam
yuaneyaj con jém icompañeroyaj?

⁴Tigíyyaj jém Dios itícjom. Icutýaj
jém caxtánañi jém tsacnetawíip
altaryucmi. Tanjodoñ iga jém
tanañquímayooyi dá ijcpa iga
icutýajpa jém David ni jém
iwaganamiññewíip. Nada más
jém panij wiap icutýaj.

⁵¿Que dá
immayñe junimpa jém Moisés
inçuímayooyi iga jém panij dá
jejyajpa cuando yoxayajpa jém
mijpic masticjom jém jejcuyjama?
Pero dá táñcawatpa siiga dá
jejyajpa. ⁶Numa mannímáypa iga
jém itwíip yíim con mimichám
más mij que jém mijpic mastic.

⁷Mimichám dá inçutiíyíyá tí
nimpa jém añañti juť jaychacnetá.
Nimpa: “Más iwianjam Dios iga
iñyaachanjamtámiñ jém inñiwítam
que iniccaaba jém animat iga
iñchiiba ofrenda jém altaryucmi.”
Meega inçutiíyíyá, jesic dá
iñchiiba castigo jém pixiñtam
jém dapic tí iwatne. ⁸Ich, jém
aMiññewíip Siñyucmi, wiap
anañquejáy jém pixiñtam tí wiap
iwat jém jejcuyjama porque anaít
jém autoridad.

Jém pìxiñ jém titsnewíip ici

(Mr. 3:1-6; Lc. 6:6-11)

⁹Jesic nic Jesús, tigiy jém
sinagoga juť icuyujcayajpa jém
Moisés inçuímayooyi. ¹⁰Jem
íí tum pìxiñ titsnewíip ici. Jesic

jém fariseoyaj icwácayaj jém Jesús.
Nímayta:

—¿Que wí iga tanacpíspa tum
pìxiñ jém jejcuyjama?

Porque tsam imétsyajpa jutsap
iquejajwadayyaj jém Jesús. ¹¹Jesic
icutsoñ Jesús. Iníímáy:

—Siiga tum de mimichám iniíí
tum borrego actiñne josjom tum
jejcuyjama, ¿que dá inñtoppa jeefi
rato? ¹²Tum pìxiñ más wí que jém
borrego. Jesic quejpa iga wí iga
tañwíwatpa jém jejcuyjama.

¹³Jesic iníímáy jém pìxiñ jém
titsnewíip ici:

—Tíimi inçí.

Jesic itím ici. Wítsíyum juuts
jém tungac jém ici. ¹⁴Jesic putyaj
jém fariseoyaj. Moj ijísyaj jutsap
iccaayaj jém Jesús.

Jém wiñicpic profeta nim tí iwat jém Jesús

¹⁵Cuando ijodóna Jesús tí
ijísyajpa, jesic nic. Jáyan jém
pìxiñtam itúnjyyajpa. Icpis itumpiy
jém mimneyajwíip. ¹⁶Ipiímáy Jesús
iga odoy i inmadayyajiñ iapaap
icpísne. ¹⁷Iwat jempic iga cupacpa
juuts nim jém wiñicpic añañtciwiñ
jém Isaías:

¹⁸Yíbam jém acuyoxapaap, jém
añcupiñnewíip.

Tsam antoypa, tsam amaymay
con je.

Anchiiba ánAnama iga inisiiba.

Inmadáypa jém tungac pìxiñtam
jém dapic je de Israel iga:

Ich añwítsagáypa jém ífánca.

¹⁹Dá áñapa, dáñim pími jíyapa.
Dá i imatonpa iga najíyóyapa
calle.

²⁰Jém acuyoxapaap agui wiap.

Da iquípa tum xufu waycuy
jém quífpáppic,
pero más iwítsacpa.
Đařim icpíchpa jém mečaj jém
yaguĩñpic juctimatsne.
Pimi yoxap hasta que iconwı́ypa
jém ienemigoyaj.

²¹ Jém tunğac pixiñtam icuwiři yıp
naxyucmi tsam icupıcyajpa
iga jém acuyoxapaap wiap
iyoxpátyaj.

**Nımyajpa iga Jesús iniıř jém
Wocciwiñ ipimi**

(Mr. 3:20-30; Lc. 11:14-23; 12:10)

²² Jesic namıñayřa Jesús tum
pixiñ jém imatsnewııp tum mal
espıřitu. Cáchtı jém pixiñ, umaane.
Icpis Jesús. Jesic ixixóypam,
wiabam ijıy. ²³ İtumpıy jém
ıřıyawiıp jém agui ipooñanjamyaj
cuando iıxyaj řiawat Jesús. Nımyaj:
—¿Tananjıam yřbam jém rey David
iocmanic?

²⁴ Pero cuando jém fariseoyaj
imatoyaj řiawat jém Jesús, pımi
jıyñeyaj. Nımyaj:

—Yıp pixiñ wiap řıop jém mal
espıřitu porque iniıř jém Beelzebú
ipimi, jém mal espıřitu injagooyi.

²⁵ Pero ijodoñ Jesús ři sıp ijısyaj
jém pixiñtam. İñımáy:

—Siiga tum gobiernu nawécıyajtıap
y añayajpa entre jeeyaj, jesic
tienes que nayajyajtıap. Siiga
nawécıyajtıap tum atbetet y tsam
añayajpa jém pixiñtam, da jáypa
cuyajpařim. Siiga nawécıyajtıap
jém ıřıyawiıp tum ticciim, jesic
cuyajpařim. ²⁶ Jesaneřim siiga jém
Wocciwiñ natoptıap iyaac jém pixiñ
ıñamanjıom, jesic nawécıyajtıap iyaac
jém Wocciwiñ. Da jáyñe cuyajpa

jém ipimi. ²⁷ Michřtam miñımtámpa
iga ich antoppa jém mal espıřitu
con jém Beelzebú ipimi. Siiga numa
añwatpa jempic, ¿jesic ři ichiiba
ipimi mich inçcuyujciwiñ iga wiain
ıřıop jém mal espıřitu? Cuando
iwatpa jempic, jém inçcuyujciwiñ
miñquejáypa iga togoyñe injıxi.

²⁸ Pero siiga ich antoppa jém
mal espıřitu con Dios iAnama,
jesic quejpa iga numa núcneum
jém tiempo iga Dios injacpa yıp
naxyucmi. Mimichřtam wiapřim
impicřıota.

²⁹ Jém númpaap da wiap řıgıy
tum pımic pixiñ řııçjom iga
icunúmáypa siiga da wiñři ichenpa
jém tic iomi. Pero siiga wiñři
ichenpa, jesic wiap inúmáy řıumpıy
jém iniıřwiıp řııccıim.

³⁰ Jém đapic acuyoxap ři en
contra de aich. Jém đapic
ayoxpátpa iga anañtuumawatpa
jém pixiñtam, je iquepquebáypa.

³¹ Jeeyucmi mannımáypa iga Dios
iwadáypa perdón jém pixiñtam
řıumpıy jém řıañca. Wadayřapřim
perdón jém pixiñtam siiga icujıyapa
tanJatıñ Dios, pero siiga ři icujıyapa
jém Dios iAnama, da ři wiap iwadáy
perdón jém řıañca. ³² Dios acıtsat
yıp naxyucmi iga añcuyoxap Dios.
Siiga ři amalnımáypa aich, jesic
Dios wiap iwadáy perdón jém
řıañca. Pero siiga ři imalnımáypa
jém Dios iAnama, da ři wiap iwadáy
perdón jém řıañca ni yıp naxyucmi
ni jém tunğac jém miñpaap.

Jém wıbic cuy tánıxpıcpa por řıim

(Lc. 6:43-45)

³³ Siiga wıbic cuy, iwatpa wıbic
řıim. Siiga malopıç cuy, iwatpa

malopic ífím. Tánixpicpa jém cuy por ífím. ³⁴Michítam mijex juuts jém tsañ iga agui mimalo. ¿Jutsap inijmat jém wítampic cosa siiga tsam mimalotam? Jém aḡmafi jém inítoppáppic iníjijom, tsucumpa inínamanjom. ³⁵Jém wibic pixiñ inmatpa jém wítampic cosa porque comne ianamanjom con jém wibic jixi. Jém malopic pixiñ inmatpa jém malopic cosa porque comne ianamanjom con jém malopic jixi. ³⁶Siip mannímáypa mimichítam, cuando núcpa jém jama iga Dios iciipijpa ítumpiy jém pixiñtam, jesigam tségaytap ítumpiy jém malopic aḡmafi jém inmatnewiip aunque dá juchan. ³⁷Con jém inijmafi micijijitap, con jeetím inijmafi miñquejpa siiga mitáncaíy o dá mitáncaíy.

Jém malopic pixiñtam iwágayyajpa tum milagro

(Mr. 8:12; Lc. 11:29-32)

³⁸Jesic algunos jém fariseoyaj con jém escribaspic maestroyaj iwágayyaj tum milagro. Nímayta Jesús:

—Maestro, ánixfooba tum milagro, awadaytaami.

³⁹Jesic Jesús inímáy:

—Jém malopic pixiñtam, jém ityajwiip siip jém dápic icupicyajpa Dios, tsam awágáypa milagro. Pero no más tum milagro iwadáypa Dios, jém milagro juuts inasca jém Jonás. ⁴⁰Juuts jém Jonás oy iyaj tucunajama y tucunatsuu jém mijpic tiipi ipuujom, jesapím aich, jém aMiñnewiip Siñyucmi, acumtap, anyajpa tucunajama y tucunatsuu jém nasciim. ⁴¹Núcpa

jama iga jém ityajwiip jém atebet Nínive tsucumyajpa jém inajpigam jama iga miquejajwadaytámpa mimichítam, miíftanwiip cuando Dios iciipijpa ítumpiy jém pixiñtam. Porque jém ityajwiip Nínive icucacyaj ijixi cuando jém Jonás inmadáy jém Dios inmafi. Yiim íf con mimichítam tum pixiñ más wiap que jém Jonás. ⁴²Tsucumpaím jém yompic anjagooyi jém miñnewiip aḡtsapsaumi jém inajpigam jama cuando Dios iciipijpa ítumpiy jém pixiñtam. Miquejajwadaytámpaím porque juumi miñ jém yomo. Miñ imatoj jém Salomón ijixi, pero yiim íf con mimichítam tum más mijpic anjagooyi que jém Salomón.

Jém dá wibic espíritu jém setpáppic

(Lc. 11:24-26)

⁴³‘Cuando put jém mal espíritu tum pixiñ ianamanjom, jesic siiba icutum jém titsinaxyucmi. Imétspa tum lugar jut jejpa. Pero dá ipátpa. Jesic nimpa: ⁴⁴“Eybicím asetpa anticciim jut aput.” Jesic mu ixet, eybic ipát jém pixiñ juuts tum tic dá oomíy, petnetawum, wítsacnetawum. ⁴⁵Jesic inimiñ siete espíritu más pimi malo. Miñ itiyaj jém pixiñ ianamanjom. Wiñti jém pixiñ iniit idic nada más tum mal espíritu, pero ocmi más pimi malo jém pixiñ. Jempigam inascaaba jém malopic pixiñtam jém ityajwiip siip. Más pimi malojap.

Miñ jém Jesús iapa con itiwitam

(Mr. 3:31-35; Lc. 8:19-21)

⁴⁶Iganam síp inmat Jesús, núcyaj iapa con ijáyuctam. Tsíyyaj anjicmi.

Ijyypáttooba Jesús. ⁴⁷Tum p̄ixiñ
iñímáy Jesús:

—Miññe jém iñapa con iñíwítam,
ítyaj aṅsíc̄m̄i. Mijyypáttooba.

⁴⁸Jesic Jesús iñímáy jém p̄ixiñ
jém iṅmadayñewiip iga miññe iapa:
—¿Pero i jém ánapa? ¿I jém
antiwítam?

⁴⁹Jesús iquij iciimi jém
icuyujciwiñ, iñímáy:

—Mimichám jém mánapa y
mantiwítam. ⁵⁰Porque itumpiy jém
iwatpaap juuts ixunpa jém anJatuṅ
Dios jém itwiip siṅyucm̄i, jeam jém
antiwi, jém anyom̄tiwi y jém ánapa.

Jém iñippáppic jém trigo ipac

(Mr. 4:1-9; Lc. 8:4-8)

13 Jesic jeeñim jama put
Jesús jém ticjom. Nic
coñi jem laguna aṅṅaca. ²Tsam
jáyan p̄ixiñtam aṅtuumaneyaj
juñ it Jesús. Jeeyucm̄i tigiy tum
barcojom, jemum coñ. Itumpiy jém
miññeyajwiip tsíyyaj jém laguna
aṅṅaca. ³Jesic Jesús moj iṅquejáy
jáyan jém wibic j̄ixi por medio de
cuento. Nimpa:

—Tum p̄ixiñ nic ñipi. Nic iyin
jém trigo ipac icamjom. ⁴Mu iyin
jém pac, actiṅ uxaj jém tunjom.
Miññaj jém jon, icútquet jém pac.
⁵Actiñt̄im uxaj jém pac tsaanjom
juñ dá i jáyan nas. Jesic jicsciy nay
jém pac porque dá juchaj jém nas.
⁶Cuando pijpa jém jama, iñoonoca
jém xuxuñ planta. Yaj cutt̄saayiyaj
porque dá t̄ichigiy. ⁷Actiñt̄im uxaj
jém pac jém apidanjom. Jicsciy
yón jém apif, ixamsamca jém xuxuñ
planta. ⁸Pero actiñt̄im jém pac jém
wibic naxyucm̄i. Wit̄ima. Algunos
chióy cien, algunos chióy sesenta,

algunos chióy treinta. ⁹Siiga
miññesigiyta, amatonṅaami.

Nímayta icuyujciwiñ tiiga aṅquejaytap cuentujm̄i

(Mr. 4:10-12; Lc. 8:9-10)

¹⁰Jesic icunúcyaj Jesús jém
icuyujciwiñ, icwácayaj. Nímayta:
—¿Tiiga ininmadáypa jém
p̄ixiñtam por medio de cuento?

¹¹Jesic Jesús icutsoṅ. Iñímáy:
—Dios miyoxpáttampa mimichám
iga wiap iṅcutiñiyta jutsap injac
Dios ȳp naxyucm̄i. Mimichám
micjodónata jém j̄ixi aṅnécnewiip
idic, pero los demás dá wiap
icutiñiyayaj. ¹²Jém ipictsoṅpaap
jém Dios iṅm̄ati, más ichiiba Dios
jáyan wibic cosa. Pero jém dápic
iwipictsoṅpa jém Dios iṅm̄ati, dá
ti ichiiba Dios, más accáyaytap
jém cosa jém iṅspaap iga iniñ.
¹³Jeeyucm̄i anañquejáypa jém
p̄ixiñtam por medio de cuento.
Iixyaj, pero tsíyyaj juuts dá iixyaj.
Imatonyaj, pero tsíyyaj juuts dá
imatonyaj ni dátim icutiñiyayaj.
¹⁴Iñascayajpa juuts nimpa jém
wiñicpic aṅmatciwiñ jém Isaías:

Mimichám numa
immatonṅtampa, pero dá
iṅcutiñiyt̄ampa.
Numa iñixt̄ampa, pero dá
iṅcupictampa.

¹⁵Porque ȳpyaj p̄ixiñtam tsam
malo iṅnamayaj,
dá matónóypa jém ífatsic,
iṅmichñeyaj jém iixcuy.
Iwatyajpa jem̄pic porque dá
ixixoyt̄ooba,
dá matónoyt̄ooba,
dá iṅspa iṅnamanjom iga tsam
jáyan mal iwatneyaj iga

ichaguiñ jém malatuñ iga ich
aṇwitsagáyiñ jém ifañca.

¹⁶ Pero siip mimichfam agui
mimaymaytam porque miixixóypa
y mimatónóypa. ¹⁷ Numa
mannímáypa iga waṭi jém wiñicpic
aṇmatciwiñ y jém tuṅgac wibic
pixiñtam tsam iixyajtooba títam
íñixtámpa mimichfam, pero da
wia. Tsam imatonṇajtooba títam
immatonjtámpa, pero da wia.

**Jesús inmadáypa jém cuento de jém
iyinpaap jém trigo**

(Mr. 4:13-20; Lc. 8:11-15)

¹⁸ Nimpa Jesús:

—Matonṭaami tí nimtooba jém
cuento cuando jém pixiñ iyinpa jém
pac icamjom. ¹⁹ Jém imatonṇaap
jém wibic aṇmaṭi jutsap injac Dios
yíp naxyucmi, pero da icutiíyíyapa,
jex juuts jém pac jém actiñewiip
tuñjom. Miñpa jém Wocciwiñ,
iccáyáypa jém wibic jixi jém
ñipnetawiip jém pixiñ ianamanjom.
²⁰ Jém pac, jém actiñewiip jém
tsaanjom, jex juuts jém pixiñ
cuando imatonṇa jém wibic aṇmaṭi,
agui maymay mu ipictsoñ. ²¹ Pero
como da tíchigíy, da jáypa. Jesic
cuando cutítstap jém pixiñ, tsam
malwadayṭap jém wibic aṇmaṭi
icuyucmi, ichacpa jém wibic tuñ.
²² Jém pac, jém actiñewiip jém
apídanjom, jex juuts jém pixiñ jém
imatonṇaap jém wibic aṇmaṭi, pero
tsam iñispa jém cosa jém ítyajwiip
yíp naxyucmi. Jém riqueza tsam
imigóyáypa jém pixiñ. Ixamcaaba
jém wibic aṇmaṭi. Da tímap.

²³ Pero jém pac, jém actiñewiip
jém wibic naxyucmi, jex juuts
jém pixiñ imatonṇa jém wibic

aṇmaṭi, iwicutiíyíyapa tí nimtooba.
Jém pixiñ juuts jém wibic nas.
Ipictsoñpa jém wibic aṇmaṭi,
jáyanap jém wibic jixi ianamanjom.
Algunos chióy cien, algunos chióy
sesenta, algunos chióy treinta.

Jém malapim waganayñe con jém trigo

²⁴ Jesic Jesús inṇmat tuṅgac xufu
cuento. Nimpa:

—Jém wibic aṇmaṭi iga Dios injacpa
yíp naxyucmi jex juuts tum pixiñ
iñip jém wibic trigo icamjom. ²⁵ Pero
jesic tsuucim cuando moñyajpa
jém pixiñtam miñ tum enemigo.
Oy iñip jém malopic pim icamjom
juṭ ñipnetá jém wibic trigo. ²⁶ Ocmi
nay jém trigo, mijap, jesic moypam.
Jesigam quej jém malopic pim jém
ñipnetawiip ocmi. ²⁷ Jesic jém pixiñ
iyoxaciwiñ nic íamay jém iomi.
Iñímayyaj: “Mánomi, siiga wibic
pac iññip jém inṇcamjom, ¿jesic jutsa
mu iñay jém malapim?” ²⁸ Jesic jém
nas iomi iñímáy jém iyoxaciwiñ:
“Tum enemigo iwat jempic.” Jesic
acwáctá, nímayṭa: “¿Iñxunpa iga
nicpa aṇwixquímta jém malapim?”
²⁹ Pero jém nas iomi iñímáy: “Da
tañwixpa siip jém malapim porque
químnamotpa jém trigo. ³⁰ Tsactaami
jém malapim iga iwaganamijap jém
trigo hasta tampingpa jém cosecha.
Jesic annímáypa jém ipinpaap jém
cosecha iga wiñti iwixquímayiñ
jém malapim, ichenyajiñ iga
tannooquetpa. Jesic ocmi tanaccáypa
jém trigo jém graneroram.”

Jém cuento de jém mostaza ipac

(Mr. 4:30-32; Lc. 13:18-19)

³¹ Jesic Jesús inṇmat tuṅgac xufu
cuento. Nimpa Jesús:

—Jém wibic aḡmaṭi iga Dios injacpa yíp naxyucmi jex juuts tum mostaza ipac jém iñipnewiip tum pixiñ icamjom. ³²Jém mostaza ipac tsam xufu, pero cuando mijap jém planta más mij que itumpiy jém ñipñibooyi. Mijap juuts tum mijpic cuy hasta jém jon iwatyajpa ipeeñi jém mostaza iḡcisyucmi.

Jém cuento de jém levadura

(Lc. 13:20-21)

³³Jesic iḡmatpatim Jesús tuḡgac xufu cuento. Nimpa:

—Jém wibic aḡmaṭi iga Dios injacpa yíp naxyucmi jex juuts tum yomo inimotpa jém levadura con tucuten jepscuy de harina. Jesic p̄pa itumpiy jém jaapi.

Ṭiiga iḡmatpa Jesús jém xuxuf cuentoyaj

(Mr. 4:33-34)

³⁴Itumpiy yípyaj cosa iḡquejáypa Jesús jém pixiñtam con jém xuxuf cuentoyaj. Da ti iḡquejáypa sin cuento. ³⁵Jempigam cupacpa jém aḡmaṭi jém iḡmatnewiip jém wiñicpic aḡmatciwiñ cuando ijaychacne así:

Anaḡquejáypa jém pixiñtam con jém xuxuf cuentoyaj.

Anaḡmadáypa jém j̄xi jém aḡnécnēwiip dende wiñigam cuando moj iwat Dios yíp nas.

Iḡquejáypa Jesús ti nimtooba tum xufu cuento

³⁶Jesic Jesús iḡquím jém pixiñtam. Tigiy eybic jém ticjom. Icunúcyaj jém icuyujciwiñ. Iñimayyaj:

—Aḡmadaayi ti nimtooba jém xufu cuento cuando jém enemigo

iñip jém malapim jém pixiñ icamjom.

³⁷Jesic Jesús iñimáy:

—Ich, jém aMiñnewiip Siḡyucmi, ich mismo añippa jém wibic pac.

³⁸Jém cama nimtooba yíp naxyucmi.

Jém wibic pac jex juuts jém iwianjamyajpáppic iga injacpa Dios.

Jém malapim jex juuts jém pixiñtam jém Wocciwiñ imiichi. ³⁹Jém

enemigo iñippa jém malapim, je jém Wocciwiñ. Jesic cuando piḡtap

jém cosecha, yíp nimtooba cuando cuyajpa yíp nas. Jém ipiḡyajpaap

jém cosecha jeeyaj jém siḡyucmicpic pixiñtam. ⁴⁰Piḡtap jém malapim

iga iñooba juctjom, jempigam iñascayajpa jém malopic pixiñtam

cuando cuyajpa yíp nas. ⁴¹Jém Miñnewiip Siḡyucmi icutsatpa

jém siḡyucmicpic pixiñtam iga itopyajiñ jém Dios ipixiñtamajom

itumpiy jém malopic pixiñtam con itumpiy jém icmalwatneyajwiip

it̄iwitam. ⁴²Matsyajtap, cotyajtap jém juctjom juṭ da nunca pichpa, juṭ

ipictsonyajpa jém castigo. Jemigam tsam weyjajpa, tsam iñichyajpa it̄its.

⁴³Cuando yajpa itopyaj itumpiy jém malopic pixiñtam, jesic itumpiy

jém pixiñtam jém iwatyajpaap juuts ixunpa Dios, tsam tsocayajpa juuts

jém jama juṭ injacpa tanjatun Dios. Siiga miṭatsigiyta, amatoḡtaami.

Jém wibic riqueza jém aḡnécnēwiip

⁴⁴Jém wibic aḡmaṭi iga Dios injacpa yíp naxyucmi jex juuts tum

caja tumiñ nécneta juṭ í tum jaca nas. Cuando tum pixiñ ipat jém

tumiñ, jesic jemtim iñec eybic. Nic icumáyay t̄ifam iniif iga ijuypa jém

nas juṭ nécneta jém tumiñ.

Jém mijpic perla tsampic tsoowíy

⁴⁵Jém wibic aḡmaḡi iga Dios injacpa yíp naxyucmi jex juuts tum juyjúyoypaap. Ijuypa y imáypa jém wítampic xuxuḡ tsa jém perla.

⁴⁶Cuando ipát tum más wibic jém perla tsampic tsoowíy, jesic icumáyáypa ítumpiy jém iniítwiiḡ. Ijuypa jém wibic perla jém tsampic tsoowíy.

Jém red imats ítumpiy clase jém tiipi

⁴⁷También jém wibic aḡmaḡi iga injacpa Dios yíp naxyucmi jex juuts tum red, cuando ipatsyajpa lamar jém tiiptero, imatspa ítumpiy clase de tiipi. ⁴⁸Jesic cuando comne jém ired, jém tiiptero ijicputyajpa lamar aḡnaça. Coñajpa, mojpa icupíḡayyaj jém tiipi. Icotyajpa icooḡjom jém wítampic tiipi. Jém dapic wítam ipatsayyajpa.

⁴⁹Jempigam iñascayajpa jém pixiñtam cuando cuyajpa yíp nas. Miñyajpa jém siḡyucmipic pixiñtam iga icupíḡáypa jém malopic pixiñtam jém Dios ipixiñtamaḡjom.

⁵⁰Cotyajtap jém malopic pixiñtam jém juctjom juḡ ipictsoḡyajpa jém castigo. Jemigam tsam weyajpa, tsam iñichyajpa ítits.

Jém pecapic y jém jomipic tesoro

⁵¹Jesic Jesús icwácpa jém icuyujciwiñ. Nímayyajta:

—¿Incutiiyíyá tí nimtooba ítumpiy yíp xuxuḡ cuento?

Nimyajpa jeeyaj:

—Ji, aḡcutiiyíyá.

⁵²Jesic nim Jesús:

—Cuando tum jém escribaspic maestro icutiíyíypa jém wibic

aḡmaḡi iga Dios injacpa yíp naxyucmi, jesic jém pixiñ jex juuts tum pixiñ tsam rico. Iniítim jém pecapic tesoro y jém jomipic tesoro.

Nic Jesús Nazaret

(Mr. 6:1-6; Lc. 4:16-30)

⁵³Jesic cuando yaj inmat ítumpiy jém xuxuḡ cuento, nicum Jesús. ⁵⁴Nic íticmi. Moj inquejáy jém pixiñtam jém sinagoga juḡ icuyujcayajpa jém wiñicpic aḡquímayooyi. Jeeyaj tsam pimi ipooñanjamyajpa. Nímajaj:

—¿Yíp pixiñ juḡ icuyujca yíp jixi? ¿Jutsap iwat yíp milagroyaj? ⁵⁵Yíp pixiñ jém carpintero imaníc.

Iapa jém Malía. Tánixpigayátampa jém ítíwítam jém Jacobo, jém José, jém Ximój y jém Judas.

⁵⁶Jém iyomtiwítam ítíim yim con taichtam. ¿Juḡ ipic yíp pixiñ ítumpiy yíp jixi?

⁵⁷Jeeyucmi tsam ijóyixyajpa Jesús. Jesic Jesús iñímáy:

—Juḡquej wipictsoḡtap jém Dios inmatciwiñ. Pero jém ítíyajwiip íticmipic lugar con jém ítíyajwiip íticciim da iwianjamyaj.

⁵⁸Jesic da waḡi wibic milagro iwat Jesús íticmi, Nazaret, porque da icupicyajpa iga Dios imaníc.

Jutsap iccaatá jém Xiwan jém acchíḡoypaap

(Mr. 6:14-29; Lc. 9:7-9)

14 Jesic jeetim tiempo jém gobernador Herodes ijodóna tí iwatpa Jesús. ²Jesic jém Herodes iñímáy jém icuyoxapaap:

—Yíp pixiñ jém Xiwan jém acchíḡoypaap. Pisneum. Jeeyucmi wíap iwat jém mijpic milagroyaj.

³Da más pecam jém Herodes icám orde iga matstaiñ jém Xiwan. Tsenta, cotta cárcel. Matsta jém Xiwan porque iwogáy jém Herodes cuando ífobáyáy jém ífiwi Felipe iwichomo. Jém yomo inñiyi Herodías. ⁴Jém Xiwan inñímáy jém Herodes:

—Da wí iga impigayñe inñíwi iyomo.

⁵Jém Herodes tsam iccaatooba jém Xiwan, pero icínpa jém pixiñtam porque nímajpa iga jém Xiwan tum jém Dios inmatciwiñ.

⁶Cuando núc jém Herodes icumpleaño, iwatpa tum siñ. Miñ jém Herodías iyommanic. Moj echi jém pixiñtam iwiñjom. Tsam iwianjam jém Herodes. ⁷Jesic ijycámáy iga ichiiba jém woñi títam iwágáypa. ⁸Jém iapa inñímáy jém woñi iga iwágáyíñ jém Xiwan icobac. Jesic jém woñi inñímáy jém Herodes:

—Ansunpa iga yimti achiaayi jém Xiwan icobac, jém acchíoyopaap, tum mijpic chimajom.

⁹Jesic pimi anyácne jém rey. Pero como ijycámayñe iga ichiiba jém woñi títam iwágáypa y como imatoñneyaj itumpiy jém ityajwiip jém mesacim, jém Herodes ipimíy tum soldado iga ichiáyíñ jém Xiwan icobac jém woñi. ¹⁰Icutsat cárcel iga tinjucagaytañ jém Xiwan iisci. ¹¹Ocmi namíñayta jém icobac tum mijpic chimajom. Chiíta jém woñi. Jesic jém woñi ininigáy iapa.

¹²Jesic miñyaj jém Xiwan icuyujciwiñ, ipíñayyaj jém Xiwan imíjtay, nic icumyaj. Ocmi nic inmadayyaj Jesús tí inasca jém Xiwan.

Acwícta jém cinco mil pixiñtam

(Mr. 6:30-44; Lc. 9:10-17; Jn. 6:1-14)

¹³Cuando imatoñ Jesús tí inasca jém Xiwan, nic icuñtum tum lugar juñ da tí idíyíy. Nic barcojom. Jesic cuando ijodónayaj jém pixiñtam iga nic Jesús, jeeyaj tsucumyaj jém attebetyaj. Itúnjyyajpa puymi. ¹⁴Jesic put Jesús jém barcojom, iix iga tsam jáyay pixiñtam anjtuumaneyaj. Tsam pimi iyaachanjampa. Icpis jém mimneyajwiip jém ityajwiip jem. ¹⁵Jesic piichabam íti, miñyaj jém Jesús icuyujciwiñ. Inñimayyaj:

—Siip tsam tsuuyim. Yim da tí idíyíy. Anquimyají jém pixiñtam. Nímaayi iga nicyajíññam hasta juñ íf jém tiganjoj iga ijuyyajpa títam icútyajpa.

¹⁶Nimpa Jesús:
—¿Tiiga nicyajpa? Mimichítam acwíctami.

¹⁷Jesic nímaj jém Jesús icuyujciwiñ:
—Da ictsíypa. Anaitá cinco caxtánañi y wisten tiipi.

¹⁸Nimpa Jesús:
—Anamíñaaayi yim.

¹⁹Jesic inñímáy Jesús jém pixiñtam iga coñyajiñ naxyucmi jém múganjom. Jesic imatspac jém cinco caxtánañi con jém wisten tiipi. Amquim siñyucmi, moj inwejpát Dios. Iwenwenjac jém caxtánañi, ichi jém icuyujciwiñ. Jesic jeeyaj ichiyaj jém pixiñtam. ²⁰Jesic wícyaj itumpiy hasta cusyajum wiqui. Ocmi icucomyaj doce nacoñ con jém pedazo jém cutsíywiip. ²¹Wícyaj cinco mil pixiñtam. Jém yomtam y jém tsixítam da i imayñe.

Wítpa Jesús jém niíwiñpacyucmi*(Mr. 6:45-52; Jn. 6:16-21)*

²²Jesic jeefi rato Jesús ipiimíy jém icuyujciíwiñ iga tigiyyajiñ barcojom. Jacyajpa idíc jém laguna aṅwiñtuc wiñti que jém Jesús, iganam je inqúimpa jém pixiñtam. ²³Jesic cuando yaj mu inqúim jém pixiñtam, quim Jesús tum cotsicyucmi juṫ da ti idíyíy iga inwejpátpa Dios. Jesic piichawum íti Jesús icutum íf jém cotsicyucmi.

²⁴Pero juumi nic jém barco. Núc cucmi jém laguna, moj poyi jém sawa, tsam pooba jém ni. Tsam pimi ictsíyapa jém barco jém niípoa y jém sawa. Táñcaap iníc. ²⁵Jesic jeefim tsuu, cuquejtooba, núc Jesús juṫ íf icuyujciíwiñ. Wítpa iníc jém niíwiñpacyucmi. ²⁶Cuando iixyay jém icuyujciíwiñ iga wítpa jém niíwiñpacyucmi, tsam pimi ichiganjécya. Como tsam cñneyaj, pimi aṅweyjajpa. Nimyaj:

—iMiñpa tum poñ!

²⁷Pero jeefi rato ijíyáy Jesús, inímáy:

—iCamamwattaami inñanama!
iAicham! iOdoj cñtaami!

²⁸Jesic jém Peto inímáy:
—MánOmi, siiga numa mimich, ajígaayi iga awítpa jém niíwiñpacyucmi hasta juṫ miíf.

²⁹Jesic nimpa Jesús:
—Miñi.

Jesic cuando quet jém Peto jém barcojom, moj wítí jém niíwiñpacyucmi. Nicpa idíc hasta juṫ íf Jesús, ³⁰pero cuando iix iga tsam pimi jém sawa, cñpa jém Peto. Moj cumoñi jém niiciim, tsam pimi aṅwejpa. Nimpa:

—iMánOmi, aciacputi!

³¹Jesic jeefi rato jém Jesús imatsáy ici, inímáy:

—Tsam uxañ inçupicpa. ¿Tiiga inñispa iga da awiap?

³²Jesic cuando tigiyyaj jém barcojom, teñum jém sawa. ³³Jesic jém ifyajwiip jém barcojom costeñay jém Jesús iwiñjom.

Nimyaj:

—Numa mimich jém Dios miManic.

Jesús icpis jém ifyajwiip Genesaret*(Mr. 6:53-56)*

³⁴Cuando yaj jaquiyaj jém laguna, núcyaj jém naxyucmi de Genesaret. ³⁵Cuando jém Genesaretpic pixiñtam iixpicyaj iga Jesús, icutsat aṅmáti icuwíti jém naxyucmi iga inimiñyajiñ itumpiy jém mimneyajwiip iga icpispá Jesús. ³⁶Icunucsayyajpa Jesús iga ijígáyiñ iga ichigayyajpa jém iyooñi inñaca. Jesic cupisayyaj itumpiy jém ichigayñeyajwiip jém iyooñi.

Jém táñca tsucumpa jém pixiñ ianamanjom*(Mr. 7:1-23)*

15 Jesic miñ íamyaj Jesús jém escribaspic maestroyaj con jém fariseoyaj. Miñyaj Jerusalén. Icwácyaj jém Jesús. Nímayta:

²—Jém inçuyujciíwiñ, ¿tiiga da iwatyajpa jém costumbre jém ichacnewiip jém wiñicpic tantúmmítam? Da icheeyajpa ici juuts nimpa jém costumbre antes que wícpa.

³Jesic Jesús inímáy:
—¿Tiiga mimichgacti inwattámpa contra jém Dios inqúimayooyi

con mich inçostumbre? ⁴Porque nĩmpa Dios: “Wĩixtaami jém inĩjatuŋ y inĩapa.” Nĩmĩm: “Siiga i imalnĩmĩyapa jém ijatuŋ o iapa, jesic wĩ iga accaataĩn jexpic pĩxiĩn.”

⁵Pero mimichĩtam iniĩt tũm da wĩbĩc costumbre. Miĩnĩmtĩmpa: “Siiga i inĩmĩyapa ijatuŋ o iapa iga da wĩap manyoxpĩt porque itũmpiy jém anaitwĩip, jém manchiĩpĩppic idĩc, anjĩycĩmayĩne Dios iga anchiiba.” ⁶Jém nĩmpaap jempic da iyoxpĩtĩpa jém ijatuŋ o iapa. Jempĩgam inĩchactĩmpa jém Dios inçuímayooyi juuts tũm cosa da para tĩ wĩ iga inçupictĩmpa mimichĩtampic inçostumbre. ⁷Tsam minimĩgoyayĩtĩp inĩyaac. Inĩjĩstĩmpa iga inçwatpa juuts ixunpa Dios, pero mĩs immalwatpa. Wĩ nĩm jém wĩĩncpic anĩmatĩiwiĩn jém Isaĩas cuando inçmatpa de mimichĩtam. Nĩmpa:

⁸Yĩpyaj pĩxiĩntĩm tsam acujĩpyajpa con ijĩp.
Pero inçanamaŋjom da acupĩcneyaj.

⁹Xajatiĩm ajĩsyajpa.
Inçuejpa jém pĩxiĩntĩm jém ijĩxquĩmi juuts wĩbĩc ançuímayooyi.

¹⁰Jesic Jesũs pĩmi jĩyapa. Inĩmĩy los demĩs jém miĩñeyajwĩip:
—Matonçtaami. Cutĩiyĩyĩtaami.

¹¹Jém tĩgĩyapaap tũm pĩxiĩn ijĩpjom iga icĩtĩpa, da icmalwatpa. Pero jém malopĩc jĩxi y jém malopĩc anĩmĩtĩ jém putpaap ijĩpjom, je ictĩnçawatpa.

¹²Jesic icunũcyaj Jesũs jém icuyujĩiwiĩn. Nĩmyaj:

—¿Que inĩjodonç iga tsam pĩmi joyĩne jém fariseoyaj cuando imatonçyaj tĩ inĩnĩmĩy?

¹³Jesic Jesũs inĩmĩy:

—Itũmpiy jém planta jém ðapic je Dios inĩpi tienes que wixquĩmtap.

¹⁴Jesic odoy wadaayi caso jém maestroyaj de jém wĩĩncpic ançuímayooyi. Cĩchĩtĩyaj. Ijĩcneyaj tunçac cĩchĩtĩ. Siiga tũm cĩchĩtĩ ijĩcpa tunçac cĩchĩtĩ, jesic tsutpa icuĩstic jém pacusjom.

¹⁵Jesic jém Peto inĩmĩy jém Jesũs:

—Ançmadayĩtaami tĩ nĩmtooba yĩp xufũ cuento.

¹⁶Jesic nĩmpa Jesũs:
—¿Que mimichĩtam, ðatĩm inçcutĩiyĩyĩtĩmpa? ¹⁷¿Que da inçcutĩiyĩyĩpa iga itũmpiy cosa jém tĩgĩypĩppic inĩjĩpjom naspa impuujom y ocmi putpa? ¹⁸Pero itũmpiy jém malopĩc anĩmĩtĩ y jém malajĩxi jém putpaap inĩjĩpjom tsucumpa jém inĩanamaŋjom. Jexpic cosa mictĩnçawatpa. ¹⁹Porque jém pĩxiĩn inçanamaŋjom tsucumpa itũmpiy jém malopĩc jĩxi. Jemum tsucumpa jém jĩxi iga accaoypa, pejoypa, iwatyajpa jém da wĩtampic cosa, nũmpa, miçgoypa y cumiçgoyoypa. ²⁰Yĩpyaj malopĩc cosa ictĩnçawatpa jém pĩxiĩn. Pero siiga wĩcpa y da icheeba ici juuts nĩmpa jém wĩĩncpic costumbre, je da ictĩnçawatpa.

Tũm jém juumĩpic yomo icupic Jesũs

(Mr. 7:24-30)

²¹Jesic Jesũs put de jem, nic nocojom de jém atebet Tiro y Sidon. ²²Jemum miĩ tũm Cananeapic yomo. Jemĩm tsucum nocojom de jém Tiro y Sidon. Pĩmi jĩyapa jém yomo. Inĩmĩy Jesũs:
—Ayaachaŋjamĩ, mĩnOmi.
Mich jém David miocmanic. Jém

anyommanic imatsne tum mal espíritu. Tsam pimi súp iyaachwat.

²³Pero Jesús da icutsoj. Jesic jém icuyujciwiñ miñ inñmayyaj Jesús:

—Chijí tí ixunpa yíp yomo iga niguiniñam porque tsam tamoogíypa.

²⁴Jesic Jesús icutsoj, inñmá:y

—Dios acutsat iga anyoxpádiñ jém Israelpic borregoyaj jém togoyñewiip.

²⁵Pero miñ jém yomo, icosteeñáy jém Jesús iwiñjom. Nimpa jém yomo:

—MánOmi, ayoxpaati.

²⁶Nimpa Jesús:

—Da wí tantobáyáypa jém tsixítam icaxtánañi iga tanchiiba chimpa.

²⁷Jesic nimpa jém yomo:

—Numa, mánOmi, pero hasta jém chimpa icútyajpa jém ipaccanewiip jém iomi imesacucim.

²⁸Jesic Jesús inñmá:y jém yomo:

—Miyomo, tsam iñcupicpa iga Dios wiap miyoxpát. Siip Dios miwadáypa juuts mich inñunpa.

Jeeti rato pis jém iyommanic.

Jesús icpis tsam jáyan jém mimneyajwiip

²⁹Jesic Jesús put de jem. Nas jém laguna aññaca de Galilea. Quím Jesús tum cotsicyucmi. Jemum nic coñi. ³⁰Tsam jáyan pixiñtam núcyaj juí it jém Jesús. Inimiñayyaj jém cuxuj, jém cáchti, jém uma, jém dapic wiáne ici o ipuy, con jáyan tungac más mimneyajwiip. Oy ichacyaj jém Jesús ipuycim. Jesic Jesús icpis itumpiy. ³¹Jeeyucmi tsam ipooñanjamyaj jém añtuumaneyajwiip cuando iixyay iga jiypan jém uma, wiñsýñeum jém dapic wí ici o ipuy, wiñpan jém

cuxuj, ixixóypam jém cáchti. Jesic moj icujípyaj jém Dios de Israel.

Jesús icwíc jém cuatro mil pixiñtam

(Mr. 8:1-10)

³²Jesic Jesús inñejáy jém icuyujciwiñ. Inñmá:y

—Tsam anyaachanjampa jém miññeyajwiip yim. Porque tucunajama tanwaganait, siip da iniñyay titam icútyajpa. Da añcutsattooba iga nicyajiñ iticmi sin wiiqui porque wiap icupónaquetayaj, cutiñyajpa tunjom.

³³Jém icuyujciwiñ inñmayyaj Jesús:

—¿Juí tampicpa tsam jáyan caxtánañi iga tanacwícpa tsam jáyan pixiñtam? Porque yim da tí idíyí.

³⁴Jesic Jesús icwác:

—¿Juten caxtánañi iniñta?

Nimayaj jém icuyujciwiñ:

—Siete, con juten jém xuxut tiipi.

³⁵Jesic Jesús inñmá:y jém

añtuumaneyajwiip iga coñyajiñ naxyucmi. ³⁶Ipic Jesús jém siete caxtánañi con jém tiipi, moj inñejpát Dios. Ocmi iwenwenjac jém caxtánañi, ichi jém icuyujciwiñ. Iwégayyaj itumpiy jém pixiñtam. ³⁷Cusum wiiquiyaj itumpiy. Ocmi icucomyaj siete nacoñ jém caxtánañi con jém tiipi jém cutsýñewíppigam. ³⁸Wícyaj cuatro mil pixiñtam, da maycumne jém yomtam y jém tsixítam. ³⁹Ocmi Jesús inñquimayaj jém añtuumaneyajwiip, tigiy tum barcojom, nic jém laguna aññaca noco juí it jém attebet Magdala.

Jém fariseoyaj con jém saduceoyaj iwácyajpa tum milagro

(Mr. 8:11-13; Lc. 12:54-56)

16 Jém fariseoyaj con jém saduceoyaj miñ iámyaj Jesús

iga icutítস্যajpa. Iwágayyajpa Jesús iga inquejáyiñ tum sinyucmipic milagro. ²Jesic Jesús inímáy:

—Jesic tsuáñam cuando iníxtámpa iga agui tsabats jém ucsi, miñimtámpa iga wı́coomap. ³Jesic tsuuyítim cuando agui tsabats jém ucsi, agui ucsjom, miñimtámpa iga da wı́coomap. Mimichám tsam minimigóyaytáp inyaac porque incutiı́yıtámpa tí miñpa cuando iníxpa jém ucsi, pero da wı́ap incutiı́yıtámpa jém seña jém siı́pic iníxñeta iga miñpa jém inañpigam jama. ⁴Jém ityajwiı́p siı́p tsam imalwatyajpa, ichacneyaj jém Dios inquímayooı́, tsam iwágayyajpa tum milagro. Pero tum seña no más iwadáypa Dios, jém milagro juuts inasca jém wiñı́pic añmatciı́wiñ jém Jonás.

Jesic nic Jesús. Jemum ichac jém miññeyajwiı́p.

Jém fariseopı́c añquímayooı́i jex juuts jém levadura

(Mr. 8:14-21)

⁵Jesic núcyaj jém Jesús icuyujciı́wiñ jém laguna añwiñtuc. Jeeyaj ijaamañnotyaj jém caxtánañi.

⁶Jesic Jesús inímáy:

—İxi, nawattamtajı́ cuenta iga odoy mimalwadáyiñ jém levadura jém iniıtwiı́p jém fariseoyaj y jém saduceoyaj.

⁷Jesic jém icuyujciı́wiñ moj nanımayyajtajı́ entre jeeyaj:

—Tanímáy jempic porque da tanamiñ jém caxtánañi.

⁸Pero Jesús ijodoy tí sıp ijı́syajpa, inímáy:

—A que mimichám, tsam uxaj inı́cupı́pa iga Dios wı́ap

miyoxpát. İTı́iga inı́jstámpa iga da iniı́ jém caxtánañi? ⁹İQue da inı́cutiı́yıtı́pa, ni da inı́jı́spa jém cinco caxtánañi cuando tanacwı́ta jém cinco mil pı́xiñtam? İJuten cooy impiñ jém cutsı́ywiı́p? ¹⁰İQue daıtım inı́jı́spa jém siete caxtánañi cuando tanacwı́ta jém cuatro mil pı́xiñtam y juten cooy impiñ jém cutsı́ywiı́p? ¹¹İTı́iga michám da inı́cutiı́yıtı́pa iga da je caxtánañi sıp manımáy cuando manañmadáypa de jém levadura jém iniıtwiı́p jém fariseoyaj y jém saduceoyaj?

¹²Jesic icutiı́yı́yay iga da nimtooba Jesús iga cuidado con levadura jém iniıtwiı́p jém caxtánañi, pero nimtooba cuidado con jém fariseoyaj inquímayooı́i y con jém saduceoyaj inquímayooı́i.

Nimpa jém Peto iga Jesús je jém Cristo

(Mr. 8:27-30; Lc. 9:18-21)

¹³Cuando núc Jesús nocojom jém atebet Cesarea de Filipino, icwácyaj jém icuyujciı́wiñ, inímáy:

—İJunı́mpa jém pı́xiñtam iga aı́apaap aich, jém aMiññewı́p Sinyucmı́?

¹⁴Nı́myaj jém icuyujciı́wiñ:

—Algunos nı́myajpa iga mich miXiwan jém micchı́noypaap. Nı́myajpaıtım algunos iga mich miElías. Más tungac nı́myajpa iga mich miJeremías o tungac jém wiñı́pic añmatciı́wiñ.

¹⁵Eybic jı́ypa Jesús, inímáy:

—Pero mimichám, İmijunı́mtámpa, aı́apaap aich?

¹⁶Jesic jém Ximoy Peto inímáy:

—Mich miCristo jém vivopı́c Dios miManic.

¹⁷Jesic Jesús iníímáy jém Peto:
—Dios miwíwadáy miXimój
jém Jonás mimanic, porque yíp
jixi dá i miñmadáy, pero jém
anJatuj Dios jém itwiip siñyucmi
miñquejáy. ¹⁸Siip ich mannímáypa
iga mich miPeto. Ich anacteñpa
jém ammastic yíp tsaayucmi.
Jém Wocciwiñ ipimi dá wiap
icoñwíy. ¹⁹Manchiiba jém llave iga
tigíyyajíñ jém pixiñtam juť injacpa
Dios. Títam miñmpa iga dá wiap
yíp naxyucmi, jesic dátim wiap
iwatyaj siñyucmi. Títam iníjcpa yíp
naxyucmi, jesic wiaptim iwatyaj
siñyucmi.

²⁰Jesic iníímáy jém icuyujciwiñ
iga: “Odoy i anmadaayi iga ich
aCristo.”

Nimpa Jesús iga accaatap

(Mr. 8:31—9:1; Lc. 9:22-27)

²¹Dende jesigam moj inmadáy
Jesús jém icuyujciwiñ tí inñascaaba.
Nimpa:

—Anicpa jém atebet Jerusalén
juť pimi ayaachwattap. Tsam pimi
amalwadáypa jém wiđaytam, jém
cobacpic panijyaj, y jém escribaspic
maestroyaj. Ocmi accaatap y
jém tucunajama apispa. ²²Jesic
jém Peto inwejpud Jesús, iwogáy.
Nimpa:

—MánQmi, odoy jiiici iga
inñascaaba jempic.

²³Pero ámset Jesús, nímaytá jém
Peto:

—MiPeto, mich miwocciwiñ,
acupóyaayi. Mich
anactañcawattooba. Dá inii jém
Dios ijixi. Iniiť jém pixiñtam ijixi.

²⁴Jesic Jesús iníímáy jém
icuyujciwiñ:

—Siiga i atúñiytooba, wí iga
ichaguiñ iga iwatpa juuts je ixunpa,
wítim iga iyaachfyiñ cuando
yaachwattap juuts ich anyaachfypa,
jesic atúñiyi. ²⁵Siiga tum pixiñ tsam
ífoypa iverda iga ífpa yíp naxyucmi,
jesic togoypa jém iverda. Pero siiga
accaatap tum pixiñ ich añcuyucmi,
jesic jém pixiñ dá togoypa iverda, ífpa
para siempre. ²⁶Dá tí cuwacuy siiga
tum pixiñ iniiť itumpiy jém wibic
cosa jém itwiip yíp naxyucmi, pero
ocmi togoypa íanama. Tum pixiñ dá
wiap iyoj con tumiñ iga ipictsonpa
eybic jém íanama cuando caaneum.
²⁷Ich, jém aMiññewiip Siñyucmi,
eybic amiñpa con anJatuj Dios ipimi.
Añwaganamiñpa jém siñyucmicpic
pixiñtam. Anyojpa cada tumtum jém
pixiñ según juuts iwatne jém iyoxaji.
²⁸Numa, mannímáypa iga algunos
de mimichtam miitñanjwiip yíim
dá micaaba hasta que iníixtámpa
cuando ampictsonpa jém anJatuj
ipimi iga ananjacpa jém Dios
ipixiñtam.

Añcás jém Jesús íámooyi

(Mr. 9:2-13; Lc. 9:28-36)

17 Jesic cuando nasum seis
día, Jesús ininic jém Peto,
Jacobo y Xiwan, jém Jacobo itíwí,
tum mijpic cotsicyucmi. Icutum
nicyaj. ²Jemum iixyaj iga añcás
jém Jesús íámooyi. Agui pimi
tsocpa jém íámooyi juuts jém jama.
Pimi popo jém ipuctucu juuts tum
jucti ichoqa. ³Jesic jeetí rato iixyaj
wisten jém wiñcpcic pixiñ, jém
Moisés y jém Elías, añmatyajpa con
Jesús. ⁴Jesic jém Peto iníímáy Jesús:
—MánQmi, agui wí iga taifámpa
yíim. Siiga inwianjñam añwatpa

tucuten nacx̄fíc, tum para mimich,
tum para jém Moisés, tum para jém
Elías.

⁵Iganam jiȳpa jém Peto, actiñ
tum ucsi agui tsoepa. Inmon
ítumpiy. Jesic imatonyaj tum jiyi
jém ucsañjom. Nimpa:
—Yíp ich amManic, tsam antoypa.
Matónaytaami tí miñímáypa.

⁶Cuando imatonyaj jém jiyi,
jém icuyujcīwiñ tocsneactiñyaj
naxyucmi. Tsam p̄imi c̄iñyaj. ⁷Ocmi
Jesús icunúc jém icuyujcīwiñ,
ichicyaj, n̄imayyajt̄ap:

—Tsucumi. Odoy c̄iñtaami.

⁸Cuando ámquím̄yaj jém
icuyujcīwiñ, dam ī iixyaj. Ts̄iy
Jesús icutum.

⁹Iganam quetyajpa jém
cotsicyucmi, Jesús inquím̄pa jém
icuyujcīwiñ. In̄ímáy:

—Odoy ī añmadaayi tí in̄ix jém
cotsicyucmi hasta que accaat̄ap y
p̄ispa jém Miñ̄newiip Siñyucmi.

¹⁰Jesic jém icuyujcīwiñ
icwácyajpa Jesús. N̄imayt̄ap:

—¿Jesic tiiga nimpa jém
escribaspic maestroyaj iga miñpa
wiñti jém Elías?

¹¹Jesic Jesús icutson, n̄imayyajt̄a:
—N̄uma, wiñti miñpa jém
Elías iga iw̄tsacpa ítumpiy cosa.

¹²Siip mannímáypa iga oyñeum
jém Elías, pero jém it̄yajwiip
siip da iixp̄icyaj. Imalwadayyaj
juuts jeeyaj ixunyajpa. Jesap̄tim
imalwadayyajpatim jém Miñ̄newiip
Siñyucmi.

¹³Jesic jém icuyujcīwiñ
icut̄iyyiyaj iga cuando nimpa Jesús
iga núcneum jém Elías, nimtooba
iga jém Xiwan jém acch̄iñoypaap.

**Jesús icpis tum jaych̄ixi jém
imatsnewiip tum mal espíritu**

(Mr. 9:14-29; Lc. 9:37-43)

¹⁴Cuando núcacum Jesús jūf
añtuumaneyaj tsam Jáyan̄ pixiñfam,
tum p̄ixiñ icunúc Jesús, icosteeñáy
iwiñjom. In̄ímáy:

¹⁵—Maestro, yaachanjami jém
ammanic. Tsam imatspa jém ataque.
P̄imi iyaachwatpa. Wac̄iy actiñpa
juctjom y jém niicim. ¹⁶Anamíñáy
jém in̄cuyujcīwiñ iga icp̄isyajñ,
pero jeeyaj da wiap icp̄isyaj.

¹⁷Jesic Jesús in̄ímáy jém it̄yajwiip
jem:

—A que mimich̄tam, hasta siip
da in̄cupict̄ampa Dios. Jáyum
tawagāiti con mimich̄tam,
pero datim in̄cupicta. Tsam
anyaach̄iyum iga manañquejáypa
jém Dios in̄mat̄i, pero da
in̄cut̄iyyiyt̄ampa. Anamíñaayi jém
ts̄ixi.

¹⁸Jesús iwogáy jém mal espíritu,
jesic put jém jaych̄ixi in̄amanjom.
Jeēti rato pis.

¹⁹Más ocmi jém icuyujcīwiñ
iyamnímáy Jesús. Icwácyaj:
—¿Tiiga da wīa antopta jém mal
espíritu?

²⁰Jesic Jesús in̄ímáy:
—Da wiap in̄topta porque da
in̄w̄icupicpa iga Dios miyoxp̄atpa.
N̄uma mannímáypa siiga in̄cupicpa
uxaj juuts tum x̄utu mostaza ipac,
wiap in̄ímáy yíp cotsic: “Caayi
de yim, n̄ici jeexic.” Jesic cáypa
jém cotsic. Wiap in̄watta ítumpiy
cosa siiga n̄uma in̄cupicpa iga
Dios miyoxp̄atpa. ²¹Pero yicxp̄ic
mal espíritu wiap in̄topta siiga

iniñwejpátpa Dios y siiga inwatpa ayuno.

Eybic nimpa iga accaatap Jesús

(Mr. 9:30-32; Lc. 9:43-45)

²²Iganam wagasiyaypa Jesús con icuyujciwiñ jém naxyucmi de Galilea, moj inmadáy Jesús íi inascaaba. Nimpa iga jém Miññewiip Siñyucmi ciijucottap jém malopic pixiñtam icijjom.

²³Ocmi accaatap, pero jém tucunajama pispa. Jesic cuando imatonayaj jém icuyujciwiñ tsam pimi anyácayaj.

Tséctap impuesto para jém mijpic mastic

²⁴Cuando núcyaj jém attebet Capernaum jém Jesús con icuyujciwiñ, jesic miñ jém ichécyajpaap impuesto para jém mijpic mastic. Miñ íamayaj jém Peto. Icwácayajpa. Nímaytap:

—¿Que da iyojpa impuesto jém immaestro para jém mijpic mastic?

²⁵Icutsoñ jém Peto, nimpa:

—Jí, iyojpa.

Jesic cuando tigiy jém Peto jém ticjom juí íf Jesús, wiñti jiy jém Jesús, nímaytap jém Peto:

—MiPeto, ¿íi inñispa, jém reyyaj jém ityajwiip yíp naxyucmi, í ichégáypa jém impuesto? ¿Jém ífíwítam o jém tunçac pìxiñ jém ðapic jempic?

²⁶Icutsoñ jém Peto:

—Jém tunçac pìxiñ jém ðapic jempic.

Jesic Jesús inñímáy:

—Jesic jém ífíwítam da iyojpa.

²⁷Pero iga odoy tajóyixiñ jém ichécyajpaap jém impuesto, niçi

jém laguna, coti jém inaaawi. Topi jém tiipi jém mojpaaap inxuy. Impátpa ijiptom tum tumiñ. Ictsiypa jém tumiñ iga inyojpa jém impuesto para mimich y para aich. Jesic niçi yoji.

Í tsíypa jém más mijpic anjagooyi

(Mr. 9:33-37; Lc. 9:46-48)

18 Jeetim jama icunúcyaj Jesús jém icuyujciwiñ. Inñimayaj:

—Cuando núcpa jém tiempo iga Dios injacpa yíp naxyucmi, ¿í tsíypa más mijpic anjagooyi de aichfam?

²Jesic Jesús inwejay tum xutu tsixi. Inñímáy:

—Miñi miteñi yim jém ançuyujciwiñ iwiñjom.

³Jesic Jesús inñímáy jém icuyujciwiñ:

—Numa mannímáypa, siiga da inçucacpa jém inñixi y da michíypa juuts tum xutu tsixi, da wiap inñigiy juí injacpa Dios. ⁴Jém tsíypáppic juuts jém más mijpic anjagooyi, je jém nimpáppic iga da í wiap, tsíypa juuts yíp xutu tsixi. ⁵Siiga tum pìxiñ iwipictsonpa tum jém ammiichipic jém ðapic juchañ juuts yíp xutu tsixi, awipictsonpatim aich.

Wí iga tanawattap cuenta iga odoy tammalwadiñ

(Mr. 9:42-48; Lc. 17:1-2)

⁶Siiga í icwatpa tánca tum pìxiñ, jém yaguiñpic acupicpa aich, más wí iga cutsénaytáñ inçiyucmi tum mijpic molino icha iga jiccaiñ lamar juí tsam jojmi. ⁷Agui uuguayim jém ityajwiip yíp naxyucmi porque

siempre íf jém malopic p̄ixiñ jém icwatpáppic táŋca jém ífiwítam. Tienes que íñascaaba jem̄pic, pero agui uuguyt̄im jém p̄ixiñ jém icwatpáppic táŋca jém ífiwi.

⁸Siiga iŋci o impuy micwatpa táŋca, jesic jaci, patsaayi. Más w̄i iga mifigiypa juť íf jém vida micíŋŋaca o mipuyŋaca que iga micottap juctjom juť da nunca p̄ichpa con icuistic iŋci o icuistic impuy. ⁹Siiga íñixcuy micwatpa táŋca, jesic topi jém íñixcuy, patsaayi. Más w̄i iga mifigiypa juť íf jém vida con tum íñixcuy que iga micottap jém juctjom juť da nunca p̄ichpa con icuistic íñixcuy.

Jém p̄ixiñ iborrogo jém togoyñewiip

(Lc. 15:3-7)

¹⁰Odoj jóyixi jém tsixtam y jém yaguiñpic icupicyajpa ich anaŋm̄ati. Porque cada tumtum de jeeyaj iwatyajpa cuenta jém siŋyucm̄ipic p̄ixiñtam, jém it̄iyajwiip jém tanJatuj Dios iwíñjom. ¹¹Jeeyucmi amiñ siŋyucmi iga aŋciacpuđiñ jém togoyñeyajwiip.

¹²¿T̄i miñimpa mimich̄tam? Siiga tum p̄ixiñ iniit cien borrego y togoypa tum, ¿jesic t̄i iwatpa jém iomi? Tienes que ipoychacpa jém noventa y nueve. Nicpa iméts jém togoyñewiip cotsiganjoj. ¹³Siiga ipátpa jém togoyñewiip, más p̄imi maymáypa jém p̄ixiñ con jém tum jém ipátnewiip que con jém noventa y nueve jém dápic togoyñe. ¹⁴Jesap̄tim jém tanJatuj Dios, jém it̄wiip siŋyucmi, da ixunpa iga togoypa ni tum jém xufupic.

Juťpic tanwadáy perdón jém tant̄iwítam

(Lc. 17:3)

¹⁵Siiga tum íñfiwi mimalwadáy, jesic n̄igi aami iŋcufum, wogaayi iga mimalwadáy. Siiga mimatónj̄aypa, jesic da togoypa jém íñfiwi. ¹⁶Siiga da mimatónj̄aypa, jesic nan̄ici tungac jém íñfiwi o wisten iga con wisten o tucuten testigo wiquejiñ t̄i miñimayñe y t̄i íñfiwim̄ayt̄im jém p̄ixiñ jém mimalwadáyñewiip. ¹⁷Siiga dátim mimatónj̄aypa con jém testigo, jesic n̄igi n̄ímaayi it̄umpiy jém Dios ip̄ixiñtam juť aŋtuumayajpa. Pero siiga jém p̄ixiñ dátim imatónj̄aypa it̄umpiy jém Dios ip̄ixiñtam, jesic jém p̄ixiñ ts̄iy juuts tum malopic p̄ixiñ jém dápic icupicpa Dios, juuts tum jém ichécpáppic impuesto.

¹⁸Numa mannimáypa jém dápic iñj̄ctámpa iga wattap yíp naxyucmi, jesic dátim i ij̄icpa iga wattaiñ siŋyucmi. Jém iñj̄cpáppic iga wattaiñ yíp naxyucmi, j̄ctap̄tim iga wattap siŋyucmi.

¹⁹Mannimáypatim siiga wisten de mimich̄tam yíp naxyucmi miif̄ta de acuerdo iga iŋwágayt̄ampa Dios ítam iñxunpa, jesic michiif̄ampa jém anJatuj Dios jém it̄wiip siŋyucmi. ²⁰Porque juť aŋtuumaneyaj wisten o tucuten jém p̄ixiñ ich anniyimi jem̄tim aŋwaganait̄iyaj jém amp̄ixiñtam.

²¹Jesic miñ jém Peto. Icwácpa jém Jesús. Nimpa:

—MánOmi, ¿juna veces aŋwadáypa perdón tum jém ant̄iwi siiga amalwadáypa? ¿Hasta siete veces?

²²Jesic Jesús icutsoŋ. Nimpa:
—Ďa mannímáypa iga hasta siete
veces, pero mannímáypa hasta
setenta veces por siete.

**Jém ďapic iwadáypa
perdón jém iříwi**

²³Cuando injacpa Dios yíp
naxyucmi, iwatpa juuts tum rey
cuando itoppa icuenta con jém
icuyoxayajpaap. ²⁴Moj itop icuenta,
iŋwejáy tum jém icuyoxapaap jém
icnucsnewiip diez mil jém tumiñ
de plata inñyi talento. ²⁵Pero jém
píxiñ ďa wiap icseedáy jém rey
itumiñ. Jesic jém rey ipiimíy iga
máytaiñ jém píxiñ con iyomo con
ichixtam con itumpiy jém iniitwiip
iga icsetpa jém tumiñ. ²⁶Jesic jém
píxiñ icosteeñáy jém rey iwiñjom.
Icunucsáypa. Nimpa: “Mánomi,
apoyyaachiíyi. Manacseedáypa
jém inñtumiñ. Ich yajpa manyoj.”

²⁷Jesic jém rey tsam iyaachanjam
jém píxiñ. Icutsigáy, iwadáy
perdón iga ďa icseedáy jém itumiñ.

²⁸Cuando put de jem, ipát tum
icompañero, icuyoxaptim jém rey.
Icunucsne jém icompañero cien
tumiñ de plata. Jesic imats jém
píxiñ, inpenjagáypa iisci. Nimpa:
“Acseedayi jém antumiñ jém
manacnucsnewiip.” ²⁹Jesic jém
tunġac jém icuyoxapaap jém rey,
icosteeñáy jém píxiñ. Moj iwágáy
perdón. Nimpa: “Apyyaachiíyi.
Manacseedáypa jém inñtumiñ jém
mannucsayñewiip.” ³⁰Pero jém
píxiñ jém wadayñetawiip perdón
diez mil jém talento, ďa iwadáypa
perdón jém icompañero. Icot cárcel
hasta icsetpa jém tumiñ. ³¹Jesic
cuando iixyaj tí iwat jém píxiñ, los

demás jém icuyoxayajpaap jém rey,
tsam toy ianama, nic inmadayyaj
jém rey tí iwat jém píxiñ.

³²Jesic jém rey eybic inwejáy jém
icuyoxapaap. Inñímáy: “Agui mimalo.
Ich manwadáy perdón itumpiy
jém tumiñ jém manacnucsnewiip
iga ďa anáseedáypa porque tsam
anġcunucsáy iga manwadáyin
perdón. ³³¿Tiiiga ďa inyaachanjam
jém inġcompañero jém
inicnucsnewiip uxaj tumiñ juuts
ich manyaachanjam?” ³⁴Jesic tsam
pimi jóy jém rey. Iciġjunġot jém
policía iciġjom iga yaachwattaiñ
cárcel hasta que icsetpa itumpiy
jém tumiñ.

³⁵Jesic Jesús yaj inmat jém
cuento. Nimpa:

—Miwadáypatim jempic jém
anġatunġ Dios jém itwiip siñyucmi
siiga ďa inwadáypa perdón
inñanamanjom jém inñitwitam, jém
mimalwadayñewiip.

Ďa wi iga ichacpa iyomo tum píxiñ
(Mr. 10:1-12; Lc. 16:18)

19 Jesic cuando yaj inmat
Jesús, put jém naxyucmi
de Galilea, nic jém naxyucmi de
Judea. Jac jém ni anwiñtuc, jém
río Jordán. ²Tsam jáyan píxiñtam
itúnġiyajpa Jesús. Jemum icpis jém
mimneyajwiip.

³Jesic miñyaj algunos jém
fariseoyaj iga icutitsyajpa jém Jesús.
Nimyajpa:

—¿Que wiap ichac iyomo tum
píxiñ siiga ďa imalwatne?

⁴Icutsoŋ Jesús. Inñímáy:
—¿Que da immayñe tí nimpa jém
Dios inġmatí cuando moj ifi itumpiy
cosa: “Dios iwat tum píxiñ y tum

yomo”? ⁵Nimpaŕim jém Dios inŕaŕi: “Jeeyucmi tum p̄ixiñ ichacpa ijatuj con iapa iga iwaganaiŕpa jém iyomo. Icuistic ts̄iŕpa tumŕi m̄ijt̄aj.” ⁶Jesic jém p̄ixiñ con iyomo ðam wisten. Ts̄iŕ tumŕi m̄ijt̄aj. Jeeyucmi ða w̄i iga ichacpa iyomo jém Diospic iŕtuumawatne.

⁷Jesic jém fariseoyaj icwácyaj jém Jesús. Nímayŕa:

—¿Ŧiiga nim jém Moisés iga tum p̄ixiñ wiap iwadáy jém iyomo tum acta iga natsacyajŕap con iwíðaya?

⁸Jesús in̄ímáy:

—Mimichŕam, ts̄am malo in̄anama, jeeyucmi jém Moisés ij̄cpa iga in̄hactamiñ jém in̄yomo. Pero cuando moj it̄i it̄umpiy cosa, ða iwatyajpa jempic. ⁹Mannímáyŕatim siiga i ichobiychacpa jém iyomo jém ðapic pejoyñe iga ip̄cpa tuŕgac yomo, jesic pejóypa jém p̄ixiñ. Jém ip̄cpáppic jém yomo jém tsacnetaw̄iŕ, pejóyŕatim.

¹⁰Jesic jém icuyujciwiñ in̄ímáy Jesús:

—Siiga ts̄am t̄aŕca iga ichacpa iyomo tum p̄ixiñ, jesic más w̄i iga odoy yoomíyñ.

¹¹Jesús in̄ímáy jém icuyujciwiñ:

—Ða it̄umpiy p̄ixiñ wiap iit̄ sin yomo, nada más jém icupiñew̄iŕ Dios. ¹²Íf algunos jém p̄ixiñ ða wiap iyoomíy porque jempam nay. Íf̄im algunos ða wiap iyoomíy porque tuŕgac p̄ixiñ icapunne. Íf̄im algunos jém p̄ixiñ ða yoomíypa iga más w̄iañ iwat jém Dios iyoxacuy. Jém wiapaap iwat jempic w̄i iga iwadiñ.

Jesús ichiiba bendición jém ts̄ixŕam

(Mr. 10:13-16; Lc. 18:15-17)

¹³Jesic ocmi nam̄in̄ayyajŕa Jesús jém xuxuŕ ts̄ixŕam iga

ichiccunúgáyiñ icobac y iga in̄wejpádáyiñ Dios para jeeyaj. Pero jém icuyujciwiñ iwogayyaj jém inimiññeyajw̄iŕ jém ts̄ixŕam.

¹⁴Pero nimpa Jesús:

—Jígayŕaami iga míñiñ aámyaj jém xuxuŕ ts̄ixŕam, odoy an̄j̄yjac̄i. Porque jém in̄jacyajpáppic Dios jex juuts ȳip xuxuŕ ts̄ixŕam.

¹⁵Jesic Jesús ichiccunúgáy jém ts̄ixŕam icobac. Ocmi nic.

Tum ricopic p̄ixiñ an̄matpa con Jesús

(Mr. 10:17-31; Lc. 18:18-30)

¹⁶Jesic ocmi núc tum p̄ixiñ ðanam ts̄ami. Miñ iám jém Jesús. Nimpa jém p̄ixiñ:

—Agui wibic miMaestro, ¿Ŧi wiap an̄wat iga anaiŕpa jém vida jém ðapic cuyajpa?

¹⁷Jesic Jesús in̄ímáy:

—¿Ŧiiga miñimpa iga ich agui aw̄i? Íf no más tum jém wibic, je jém tanJatuj Dios. Siiga impictsoŕtooba jém vida jém ðapic cuyajpa, jesic w̄ati juuts nimpa jém Dios in̄químayooyi.

¹⁸Jesic nimpa jém p̄ixiñ jém ðapic ts̄ami:

—¿Juppic an̄químayooyi?

Nimpa Jesús:

—Odoy accaooyi, odoy pejooyi, odoy nuumi, odoy cumigóyooyi. ¹⁹Naiðaayi respeto jém in̄jatuj y jém in̄apa. Toyi jém in̄ŕiwi juuts minitoŕŕap in̄yaac.

²⁰Nimpa jém p̄ixiñ:

—Ich jempigam an̄watne dende ats̄ixiñam. ¿Ŧi más atogóyáy?

²¹In̄ímáy Jesús:

—Siiga caps̄pa in̄wat it̄umpiy juuts ixunpa Dios, cumáyaayi it̄umpiy

jém iniitwiip, chi jém tumiñ
jém yaachayajpaap. Jesic iniitpa
siñyucmi jáyan wibic riqueza. Jesic
miñi atúnñiyi.

²²Mu imatoñ í inñmáy Jesús, nic
jém pìxiñ. Tsam pìmi anyác porque
tsam pìmi rico.

²³Jesic Jesús inñmáy jém
icuyujciwiñ:

—Numa mannímáypa, tsam pìmi
tánca iga tigiypa tum ricopic jut
injacpa Dios. ²⁴Eybic mannímáypa.
Más da tánca iga naspá tum
cabello tum núncuypac ijosjom
que iga tigiypa tum rico jut injacpa
Dios.

²⁵Cuando imatoñyá jém
icuyujciwiñ, tsam pìmi
ichiganjécya. Nìmyaj:

—¿Jesic í wiap iciiput?

²⁶Jesic Jesús iámmats jém
icuyujciwiñ. Inñmáy:

—Numa, jém pìxiñtam da wiap
iwatya, pero Dios wiap iwat porque
Dios wiap iwat itumpiy cosa.

²⁷Jesic nim jém Peto:

—MánQmi, aichtám
antsacnetámum itumpiy jém
anaítwiip idic, mantúnñiyñetámum.
¿Jesic í ampictsonjtampa?

²⁸Jesic Jesús icutsonj. Inñmáy jém
icuyujciwiñ:

—Numa mannímáypa iga
mimichtám, jém antúnñiytampaap,
cuando joomasetpa yíp nas, ich jém
aMiñnewiip Siñyucmi acoñpa jém
mijpic coñcuyucmi con Dios ipìmi.
Jesic mimichtám miconñtampa jém
doce coñcuyucmi iga ininjactampa
jém doce grupo de jém Israelpic
pìxiñtam. ²⁹Itumpiy jém
ichacneyajwiip jém itic, o itiwitam,
ijatun, iapa, iyomo, ichixtam, o iñas

ich ançuyucmi, Dios icseedáypa
yíp naxyucmi cien veces más.
Ipictonyajpatim jém vida jém
dapic cuyajpa. ³⁰Jáyan jém
pìxiñtam, jém anjagoyñeyajwiip,
tsíyyajpa tuuñiançim. Jém
tuuñiançimpic, anjagoyajpa.

Jutsap iyoj Dios jém iyoxaciwiñ

20 Jém Dios iyoxacuy jex
juuts tum pìxiñ nasiywiip.
Tum jama, joccuquej, nic iméts
jém yoxaciwiñ iga icyoxayajpa
jém ifinca de uvas. ²Ipátya, iwat
trato con jeeyaj iga iwiyojpa jém
jama. Ocmi icutsat jém ifinca de
uvas. ³Jesic yucmim jama, como
las nueve, eybic nic jém pìxiñ
jém plaza. Jemum iix algunos
da iniyyaj yoxacuy. ⁴Inñmáy:
“Mimichtám nictaami miyoxajítam
jém amfinca. Mañwiyojpatim.”
Jesic jeeyaj nicyajpatim yoxaji.
⁵Eybic nic jém finca iomi jém
plaza cugapjama y a las tres de la
tarde. Jempictim iwat. ⁶Jesic a las
cinco de la tarde eybictim nic jém
plaza. Ipát algunos jém pìxiñtam
da iniyyaj yoxacuy. Inñmáy: “¿Tiiga
miífta yim? ¿Muma jama da síp
iñyoxata?” ⁷Nìmyajpa: “Da í oy
amétsta iga niñuñ ayoxajítam.”
Jesic nimpa jém finca iomi: “Jesic
niñi miyoxajítam jém amfinca.
Mañwiyojpatim.”

⁸Jesic cuando tigiñeum jama,
jém finca iomi inñmáy jém cabo
jém iwatpaap cuenta jém ifinca:
“Siip anwejayyaji jém anyoxaciwiñ,
yojyaji. Wiñti yoji jém ocmipic
núcyaj. Jesic ocmi yojítim jém
wiñtipic núcyaj.” ⁹Cuando núcyaj
jém miññeyajwiip a las cinco,

ítumpiy wiyoyajta juutsím yoxane muma jama. ¹⁰Ocmi cuando núcyaj jém mojnewiip miñi, ijisyajpa iga más jáyan yoyajtap. Pero jesañtim yoyajtap juuts jém tigiyñewiip a las cinco de la tarde. ¹¹Jesic yaj ipictsonyaj jém icoñwiyooyi, moj icujiyyaj jém finca iomi. ¹²Jesic iñímayyaj jém finca iomi: “Jém ocmipic núcyaj yoxayaj tum hora no más, pero jesañtim ipictsonyaj juuts aichám. Tsam pími ayoxata muma jama, anyaachiyta jém jampiji.” ¹³Jesic jém finca iomi icutson. Iñímáy tum jém pixiñ jém icujiñewiip: “Amigo, da mammalwaday ni uxan. ¿Que da manawat trato iga manyojpa tum jama icoñwiyooyi? ¹⁴Jesic píci jém iñcoñwiyooyi, nicsim. Ich anyojtooba jém ocmipic núc jutsañtim mich manyoj. ¹⁵¿Que da wiap aňwat juuts ich ansunpa con antumiñ? Tsam miñajajóypa porque ich aňwíwadáypa jém tungac anyoxaciwiñ.” ¹⁶Jém tuuñiañciimpic aňjagóypa. Jém aňjagoyñewiip tsýpa tuuñiañciim. Jáyan jém pixiñtam aňwejayajtap, pero da wati jém cupiñneyajtawíip.

Tucciy nimpa Jesús iga accaatap

(Mr. 10:32-34; Lc. 18:31-34)

¹⁷Cuando niqiyaj Jesús tunjom iga nicpa Jerusalén, iñwejay aparte jém icuyujciwiñ. Iñímáy:

¹⁸—Matonŕaami. Siip tanictámpa Jerusalén. Ich, jém aMiññewiip Siñyucmi, acijunçottap jém panij aňjagooyi iciñjom y jém escribaspic maestroyaj iciñjom. Jeeyaj acipiñpa, achiiba mijpic castigo. Ocmi ijisyajpa iga accaayajpa.

¹⁹Acijunçottap jém tungac pixiñ iciñjom iga axiccayajpa, acótsyajpa y acunúnyajpa cunusyucmi. Accaayajpa, pero jém tucunajama apispa de juñ íf jém caaneyajwiip.

Jém Jacobo y Xiwan iapa iwác tum favor

(Mr. 10:35-45)

²⁰Ocmi icunúcyaj Jesús wisten jém icuyujciwiñ jém Jacobo y Xiwan. Iwaganamiñyaj iapa, jém Zebedeo iyomo. Costeñ jém Jesús iwiñjom iga iwágáypa tum favor. ²¹Jesic Jesús icwácpa jém yomo. Nímayta:

—¿Ti iñxunpa?

Nimpa jém yomo:

—Cuando iniñjacpa yíp naxyucmi, ansunpa iga yíp wisten ammanic ipictsoniñ tum mijpic cargo. Tum coñpa mich iniñwimi y tum iniñnaymi.

²²Pero Jesús icutson, iñímáy:

—Mimichtam da iñjodontam ti iñwácpa. ¿Que mimichtam wiap iñyaachiy jém yaachaji jém ichpic ampictsonpa? ¿Wiap iñuc jém copa jém ichpic ánucca?

Nimpa jém wisten:

—Awiátampa.

²³Jesic Jesús iñímáy:

—Numa iñucpa jém copa jém ichpic ánucca y wiap impictson jém yaachaji juuts ampictsonpa aich. Ich da wiap manchi jém derecho iga nicpa micoñi anañwimi y anañnaymi. Ichiiba anJatun Dios jém icupiñnewiip.

²⁴Jesic cuando imatonayaj jém diez icuyujciwiñ, tsam ijóyixyay jém wisten. ²⁵Pero Jesús iñwejay los demás jém icuyujciwiñ iga iñmadáypa. Nimpa:

—Michám inñjodoj iga jém juumipic pixiñtam injagooyiyaj tsam ipiimáypa jém ipixiñtam. Jém más mijpic anjagooyi más pimi ipiimáypa jém ipixiñtam. ²⁶Pero mimichám da inwattámpa jempic. Siiga mijpic minjagooyi, jesic inçuyoxap jém inñiwitam. ²⁷Jém más mijpic anjagooyi entre mimichám micuyoxap juuts tum esclavo. ²⁸Inwattámpa tim juuts aich. Ich amiñ sinyucmi iga ançuyoxap jém ityajwiip yíp naxyucmi. Da amiñ iga acuyoxatap. Amiñ iga anchiiba amvida iga anyojáypa jáyan pixiñtam itánca.

Jesús icpis wisten cáchti

(Mr. 10:46-52; Lc. 18:35-43)

²⁹Jesic cuando putyaj jém attebet Jericó, tsam jáyan pixiñtam itúnjyaypa Jesús. ³⁰Wisten cáchti coñyaj jém tun aññaca. Cuando imatoñyaj iga naspa Jesús, jesic pimi jiyaypa jém cáchti. Nimyaj: —MánQmi, jém rey David mimanic, ayaachanjjami aichám.

³¹Pero jém itúnjyaypaap Jesús iwogayyaypa jém cáchti. Inñimayyaypa iga odoy jiyajiñ. Pero más pimi jiyaypa jém cáchti. Nimyaj: —MánQmi, mich jém rey David mimanic, ayaachanjjami.

³²Jesic teeñanjac Jesús. Inwejay jém wisten iga miñyajiñ. Cuando núc, inñimáy Jesús:

—¿Ti inñunpa iga manwadáypa?

³³Nimyaj jém cáchtiyaj:

—MánQmi, ansunpa iga aixixóyiñ.

³⁴Jesic iyaachanjampa Jesús.

Ichigáy iixcuy. Jeefi rato ixixóypam. Mojum itúnjyay jém Jesús.

Tigy Jerusalén jém Jesús

(Mr. 11:1-11; Lc. 19:28-40; Jn. 12:12-19)

21 Cuando núcyajtooba Jerusalén, núcyaj wiñti jém attebet Betfagé nocojom jém Olivos cotsic. Jesic icutsat wisten jém icuyujciwiñ tungac xufu tiganjoj. ²Inñimáy Jesús:

—Nictaami jém tiganjoj jexpic it. Cuando miñuctámpa impáttámpa tum burroapa tsenne con imanic. Wiji, anamíñaayi. ³Siiga i micwácpa iga: “¿Tiiga inwijpa?” jesic nímaayi iga jém tánQmi ixunpa y da jáypa micutsadáypa eybic.

⁴Jempigam iwatyaj iga cupacpa jém añmatí jém ijaychacnewiip jém wiñicpic añmatciwiñ. Nimpá:

⁵Nímaayi jém ityajwiip jém attebet Jerusalén:

“Ixtaami iga miñpa jém inñey.

Da malo, da nacujíptap.

Iquímcané tum burro.

Miñpa tum mañburroyucmi, tum burroapa imanic.”

⁶Jesic nicyaj jém wisten icuyujciwiñ. Iwatyaj juuts inñimáy Jesús. ⁷Inimiñyaj jém burroapa con imanic. Icutócyaj con iyootiyaj. Jesic iquímca Jesús jém mañburro.

⁸Miñyaj tsam jáyan pixiñtam y yomtám. Itócyajpa iyoofti tunjom jut naspa Jesús. Tungac itúnjyaypa jém cuy inçis y jém ay iga itócyajpatim tunjom. ⁹Algunos anjagoyñeyaj inñic y algunos miñyaypa jém Jesús ituññiançim. Pimi anwejaypa. Nimyaj:

—Tançujíptámpa jém rey David imanic. Agui wí yíp tananjagooyi

jém tacutsadayñewiip Dios. Agui wí jém tanJatuj Dios.

¹⁰Cuando tigiy Jesús jém attebet Jerusalén, tsam cujínayyajpa itumpiy jém pixiñtam. Nacwácyajta: —¿Iapaap yíp pixiñ?

¹¹Jesic nímuyajpa jém pixiñtam jém miññeyajwiip con Jesús:

—Yíp pixiñ Jesús jém Dios inmatciwiñ. Nazaretpic pixiñ de jém naxyucmi de Galilea.

Jesús iccuáy jém mijpic mastic

(Mr. 11:15-19; Lc. 19:45-48; Jn. 2:13-22)

¹²Ocmi tigiy Jesús jém mijpic masticjom. Moj iquebacput itumpiy jém máymáyoyyajpaap con itumpiy jém juyjúyoyyajpaap. Ichiputseedáy jém imesayaj jém icucacyajpaap tumiñ. Imutsmutsseedáy jém iconcuyaj jém imáyyajpaap cuucu.

¹³Inímáy Jesús jém ityajwiip jem:

—Nimpa jém Dios inmatí jém jayñewiip: “Antsac antic jut iwatyajpa oración jém pixiñtam.” Pero mimichtam inicsetneta jém Dios imastic juuts tum tic jut if jém númyajpaap.

¹⁴Jesic miñ iámyaj Jesús jém mijpic masticjom jém cáchtí y jém cuxujyaj. Icpis. ¹⁵Jém cobacpic panijyaj con jém escribaspic maestroyaj agui jóyñeyaj cuando iixyaj jém wibic milagro jém iwatnewiip Jesús y cuando imatonyaj iga pimi jyyajpa jém tsixtam masticjom, nímuyajpa: “Tanjucijptampa jém rey David imanic.” ¹⁶Jesic jém panijyaj inímayyaj jém Jesús:

—¿Que da immatonj tí nimpa yíp tsixtam?

Jesús icutsonj. Nimpa:

—Numa, ammatonj. ¿Que da immayñe jém Dios inmatí? Nimpa así:

Dios ichiiba jixi jém xuxuf tsixtam iga icujípyajiñ Dios juuts je iwianjam.

¹⁷Jesic moj niqui jém Jesús. Jemum ichac jém panij. Nic monj jém xuú tiganjoj jém Betania.

Jesús imalnímáy jém tsuj

(Mr. 11:12-14, 20-26)

¹⁸Jesic icuquejama, cuando setgacpa Jerusalén, tsam yuap jém Jesús. ¹⁹Iix tum tsuj tunanaca. Nic icuámáy jém tsuj itim, pero da ipadáy. Nada más if jém iay. Jesic Jesús inímáy jém tsuj:

—Da nunca miñmap eybic.

Jeeti rato tits jém tsuj. ²⁰Cuando iixyaj jém icuyujciwiñ, agui ipooñanjamyaj. Icwácyaj jém Jesús. Nímayta:

—¿Tiiga tsam jicsiy tits jém tsuj?

²¹Jesús icutsonj. Nimpa:

—Siiga tsam incupicpa iga Dios wiap iwat itumpiy cosa y siiga da inñjspa inñanamanjom iga da wiap, jesic da no más wiap inwat juuts ich anwadáy jém tsuj, pero wiaptim inñímáy yíp cotsic iga caayi de yiim, niñi miniccántaji lamar, jesic miwadáypa Dios juuts inwágáypa. ²²Siiga numa incupicpa iga Dios wiap miyoxpát, jesic impictsonja títam inwágáypa Dios.

Acwácta Jesús i icutsat

(Mr. 11:27-33; Lc. 20:1-8)

²³Jesic tigiy eybic Jesús jém mijpic masticjom. Iganam accuyujóypa Jesús, icunúcyaj jém

panij anjagooyiyaj con jém Israelpic wiđayfam. Icwácyajpa. Nímayfa Jesús:

—¿I michi jém pimi iga inwatpa juuts mich síp inwat? ¿I micutsat?

²⁴Jesús icutsoj. Inímáy:

—Ich manacwácpařim, siiga aņcutsoņpa, jesic mannímáypařim juř ampic jém pimi iga aņwatpa juuts síp aņwat. ²⁵Anímaayi: ¿I icutsat jém Xiwan iga acchíņóypa? ¿Que Dios icutsat, o jém pixińtam?

Jesic jém anjagooyiyaj nacwácyajta entre jeeyaj:

—Siiga tanińpa iga Dios icutsat jém Xiwan, jesic tanímáypa: “¿Tiiiga dá inćupicta?” ²⁶Pero siiga tannímáypa iga dá je Dios icutsat jém Xiwan, jesic tsam taņćiņpa jém pixińtam porque icupicyajpa iga Dios icutsat jém Xiwan.

²⁷Jesic icutsoņyajpa. Nímayřap Jesús:

—Aichřam dá anjodoņ i icutsat jém Xiwan.

Jesic Jesús inímáy:

—Ich dářim mannímáypa juř ampic jém autoridad iga aņwatpa juuts síp aņwat.

Jém cuento de jém pixiń con wisten imaníc

²⁸Jesic Jesús inmadáy tum xuřu cuento. Nińpa:

—¿Ti injisa? Iniř idíc tum pixiń wisten iřaymaníc. Nic inímáy jém tum: “Maníc, yíp jama niđi miyoxaji jém amfinca de uvas.”

²⁹Jém imaníc inímáy iřatuj: “Đa anicpa.” Pero ocmi icac ijxi, nic yoxaji. ³⁰Jesic ocmi jém řatunpic nic inímáy jém tungac imaníc: “Maníc, niđi miyoxaji yíp jama jém

amfinca de uvas.” Jesic jém tungac imaníc inímáy iřatuj: “Ich anicpa.” Pero ocmi dá nic. ³¹Jesic anímaayi: ¿Juppic de jém wisten iwat juuts ixunpa iřatuj?

Nimyajpa jém anjagooyiyaj:

—Jém wińřipic.

Nińpa Jesús:

—Numa mannímáypa iga jém malopic pixińtam jém ichécyajpaap impuesto y jém malopic yomtam tigiyaypa juř inřacpa Dios wińřitim antes que mimichřam. ³²Porque jém Xiwan jém acchíņoypaap miń iga miņquejajřamiń jutsap inřwatta juuts ixunpa Dios, pero dá inćupicta. Pero jém ichécyajpaap impuesto y jém malopic yomtam icupicyaj ři inímáy jém Xiwan. Aunque inixřeta iga jém malopic ichacyaj jém itaņca, mimichřam dá inřcacta jém injxi iga inćupictampa jém Xiwan inřmaři.

Jém cuento de jém malopic yoxaciwiń

(Mr. 12:1-12; Lc. 20:9-19)

³³Nimřim Jesús:

—Matonřaami tungac xuřu cuento: Íř idíc tum pixiń nasiywiř. Inřip tum finca de uvas. Icutánne. Iwat tum tsaajos juř itobáypa jém uvas inři iga iwatpa jém vino. Iwatřim tum torre juř iwatpa cuenta jém uvas.

’Cuando cupacneum, icnucs jém finca de uvas tungac pixińtam iga iyoxacaiń. Ocmi nic jém nas iōmi tungac naxyucmi juř tsam juumi. ³⁴Quando núc jém tiempo iga itúcyajpa jém uvas, jém finca iōmi icutsat jutē jém imozoyaj iga ipictsoņiń jém iōmi imiichi.

³⁵ Pero jém iñucsneyajwiip jém finca iga iyoxacaaba imatsyaj jém imozoyaj. Tũm tsam icótsyaj, tũm iccaayaj, tũm iñácscayaj tsaami.

³⁶ Jesic eybic jém nas iomi icutsat tungac más jém imozo, pero jém iñucsneyajwiip jém ifinca imalwadayyajpatim mex jeeyaj.

³⁷ Jesic ocmi jém nas iomi icutsat imaníc iga ipictsonpa jém ijatun imiichi. Nimpa: “Tienes que iwipictsonyajpa jém ammaníc.”

³⁸ Pero cuando jém iñucsneyajwiip jém finca iixyaj iga miñpa jém iomi imaníc, moj nanímayyajtaji: “Yíbam ipictsonpa itũmpiy jém ijatun imiichi. Tej tanacca, jesic taichám tamíchatámpa títam ichiiba jém ijatun.” ³⁹ Jesic imatsayaj jém pixiñ imaníc. Ítopyaj anjicmi, iccaayaj.

⁴⁰ Jesic Jesús icwác jém panijyaj. Nimpa:

—Siip anímaayi: Cuando miñpa jém nas iomi, ¿ti iniwatpa jém iwatyajpáppic cuenta jém iñas?

⁴¹ Jesic jém panijyaj icutsonyaj, ninyaj:

—Accaayajtap itũmpiy jém malopic pixiñtam. Da iyaachanjampa ni uxaj jém finca iomi. Jesic ocmi icnucspa tungac pixiñ, jém iwégaypaap jém cosecha cuando núcpa itiempo.

⁴² Jesic nimpa Jesús:

—¿Que da immayñeta jém Dios injmatí juí jayñe? Nimpa:

Jém ticwatpaap ipatsayítip tũm tsa.

Pero ocmi jeetim tsa pinjta.

Siip jeetim tsa icóppacne jém tic.

Jempam iwat jém tanjatun Dios.

Cuando tánixtámpa, agui tampooñanjamtámpa.

⁴³ Jeeyucmi mannímáypa iga miccáyaytap jém wibic anjmatí iga siip Dios injacpa yíp naxyucmi. Chiiítap jém tungac pixiñtam jém ichiipaap jém wibic cosecha juuts ixunpa Dios. ⁴⁴ Siiga michutpa yíp tsaayucmi, micusámáypa. Siiga yíp tsa micuchijquetpa, jesic michfya iga mipooíi.

⁴⁵ Jesic cuando jém panij anjagooyiyaj con jém fariseoyaj imatonyaj jém xuxut cuento, icutiíyiyaj iga jeeyaj icuyucmi injmatpa Jesús jém xuxut cuento.

⁴⁶ Tsam imatsyajtooba Jesús, pero da wiap imatsyaj. Jém anjagooyiyaj tsam icinjay jém pixiñtam porque jeeyaj icupicyajpa iga tũm Dios injmatciwiñ jém Jesús.

Jém cuento cuando anjoomíypa jém rey imaníc
(Lc. 14:15-24)

22 Jesic Jesús injmatpa tungac más cuento. Nimpa:

²—Jém tiempo cuando Dios injacpa jém pixiñtam jex juuts tũm rey cuando anjoomíypa ijaymaníc. Jém ijatun iwatpa tũm mijpic siñ. ³ Cuando yajum iwítsac itũmpiy cosa, icutsat jém icuyoxayajpaap iga injwejayyajpa jém pixiñtam jém itípnayajwiip. Pero jeeyaj da miñtooba. ⁴ Jesic eybic icutsat tungac más jém icuyoxayajpaap. Inímáy: “Nimayyají jém antípnayajwiip iga watneum jém wiccuy. Accaanetawum jém xix y jém borregoyaj jém anacpínewiip. Siip itum listo, miñyajiñ juí íf jém anjoomíyóycuy.”

⁵ Pero jeeyaj da iwadáy caso. Tum nic icamjom, tum nic máymáyooyi. ⁶ Tungac imats jém icutsatneyajwiip jém rey, moj imalwadayyaj hasta iccaayaj algunos. ⁷ Jesic cuando imatonj jém rey tí inasca jém icuyoxayajpaap, tsam pími jóy. Icutsat jém soldado iga accaayajtaiñ jém accaoyñeyajwiip y iga nooquettaiñtim jém atbetet jut íf jém malopic pixiñtam. ⁸ Jesic eybic jém rey inímáy jém icuyoxayajpaap: “Ítum listo jém aḡoomíyóycuy, pero jém mojnnewiip antíp da wí iga miñpa. ⁹ Jesic nictaami jut aḡwácne jém tunj jut nasyajpa jáyan jém pixiñtam. Nímayyaji ítumpiy jém impátráppic iga miñyajiñ jut íf jém aḡoomíyóycuy.” ¹⁰ Jesic nicyaj jém icuyoxayajpaap jut nasyajpa jáyan jém pixiñtam. Injtuumawatyajpa ítumpiy jém ipátneyajwiip, jém malopic y jém wibic. Jempigam com jém tic jut íf jém aḡoomíyóycuy.

¹¹ Jesic tigiy jém rey iga iámpa jém aḡtuumaneyajwiip. Iix tum píxiñ da ipictsoḡne jém wibic yooí jém iccámaypáppic jém rey icuyoxapaap para jém sinjom. ¹² Jesic jém rey inímáy jém píxiñ: “Amigo, ¿jutsa mu inítigiy yim y da i miccámáy jém wibic yooí para jém aḡoomíyóycuy?” Da jiy jém píxiñ. ¹³ Jesic jém rey inímáy jém icuyoxapaap: “Matstaami yíp píxiñ, tsénaytaami ici y ipuy. Cottaami jém piichciim jém ítwiip aḡsicmi, jut tsam weyjajpa, jut iníchyajpa ítits.” ¹⁴ Porque tsam jáyan aḡwejayajtap, pero da watí cupiḡneyajta.

I tanyojáypa jém impuesto

(Mr. 12:13-17; Lc. 20:20-26)

¹⁵ Jesic jém fariseoyaj moj ijisyaj jutsap iquejajwadáy jém Jesús

con jeetím inquímayooyi jém inquejayñewiip jém píxiñtam.

¹⁶ Jeeyucmi icutsatayaj algunos jém fariseoyaj icuyujciwiñ con algunos jém Herodes ipixiñtam iga iniḡmatyajiñ jém Jesús. Nímaytap:

—Maestro, anjodóḡata iga siempre iniḡmatpa jém numapic aḡmafi.

Iniḡquejpa parejo jém Dios inmafi, da i immigóyáypa. Da inwadap caso tí nímajpa jém píxiñtam. Da i inḡiḡpa. ¹⁷ Jesic anímaayi tí inḡispa: ¿Wí iga tanyojpa impuesto jém Romapic aḡjagooyi o da wí?

¹⁸ Pero Jesús icutiíyíypa iga tsam iniítyaj malopic jixi íanamanjom. Inímáy:

—Mimichíam miñmantaayap iga inwattooba juuts ixunpa Dios. ¿Tiiga aḡcutítspa? ¹⁹ Aḡquejaayi tum jém tumiñ jém inyojóycapaap jém impuesto.

Jesic namíñayta Jesús jém tumiñ.

²⁰ Jesic mu iix Jesús, icwácpa.

Nímayyajtap:

—¿I iwiñpac íf yíp tumiñyucmi? ¿I iníyí jaycámayñeta?

²¹ Nímajpa:

—Jém César jém Romapic aḡjagooyi.

Jesic nímpa Jesús:

—Chiiítaami jém César jém Césarpic imíchi. Chiiítaami Dios jém Diospic imíchi.

²² Cuando imatonjyaj tí inímáy Jesús, tsam ipooñanjamyajpa jém miñneyajwiip. Ichacyaj Jesús, nicyaj.

Jutsap icpisyajta jém caaneyajwiip

(Mr. 12:18-27; Lc. 20:27-40)

²³ Jesic jeetím jama miñ íamyaj Jesús algunos jém saduceoyaj, jém

đapic icupicyajpa iga pispa jém caaneyajwiip. Jeeyucmi miñ icwác Jesús. Nímyaj:

²⁴—Maestro, nímpa jém Moisés, siiga caaba tum pìxiñ y ichacpa iyomo, pero da ichac ni tum imaníc, jesic jém pìxiñ ífíwi ipigáyiñ jém iyomo iga inimanícwatpa. Jesic jém tsíxi tsíypa juuts jém caanewiip imaníc. ²⁵Íf ídic con aichtam siete pìxiñ tumti ijatuñ. Jesic yoomíy jém más achpic. Ocmi ca. Da ichac ni tum imaníc. Jesic jém ipiitsi ipic jém icapay. ²⁶Iñascatim jempic jém ipiitsi y jém tungac jém íjáyuc hasta que icusiete ipicyaj jém yomo. Caayaj ítumpíyyaj. ²⁷Ocmi caatim mex jém yomo. ²⁸Jesic cuando Dios icpísipa ítumpíy jém caaneyajwiip, ¿juppíc de jeeyaj tsíypa juuts jém yomo iwíđaya? Porque icusiete iniñcoomíyyaj jém yomo.

²⁹Jesic Jesús icutsoñ. Nímpa: —Mimichám tsam mijixítogoyñeta porque da iñcutiíyítámpa jém Dios iñmañi ni đatim iñcutiíyítámpa tí wiap iwat Dios con ipimi. ³⁰Cuando acpisyajtap jém caaneyajwiip, đam añcoomíyyajpa, đam napicyajtap jém pìxiñtam con jém yomtam. Tsíyyajpa juuts jém sinyucmipic pìxiñtam. ³¹Siip manañquejáypa iga numa acpisyajtap jém caaneyajwiip. ¿Que da immayñe jém Dios iñmañi tí miñímáy Dios? Nímpa: ³²“Ích jém Abraham aDios, jém Isaac aDios y jém Jacob aDios.” Jesic quejpa iga jém tanJatuñ Dios da je jém caanewiip iDios, je jém vivopic iDios.

³³Jesic jém miññeyajwiip jem agui ipooñanjamyajpa cuando imatoñyaj jém Jesús iñquímayooyi.

Jém más mijpic añquímayooyi

(Mr. 12:28-34)

³⁴Cuando jém fariseoyaj ijodónayaj iga Jesús da icjyyaj jém saduceoyaj, jesic eybic añtuumayaj juñ íf Jesús.

³⁵Tum de jeeyaj, jém maestro de jém wiñicpic añquímayooyi, tsam icutítstooba jém Jesús. Jesic iñímáy:

³⁶—Maestro, ¿juppíc jém más mijpic añquímayooyi de jém Moisés iñquímayooyi?

³⁷Jesús iñímáy: —“Toyí jém tanJatuñ Dios con ítumpíy iñanama y con ítumpíy iñjixi.” ³⁸Yfbam jém mijpic añquímayooyi jém wiñtipic. ³⁹Jém tungac añquímayooyi jextim. Nímpa: “Toyí jém iñíwi juuts minitoýtap iñyaac.” ⁴⁰Siiga iñwatpa juuts nímpa icuistic yíp añquímayooyi, jesic capsum iñwat ítumpíy jém añquímayooyi jém ichacnewiip jém Moisés y ítumpíy jém wiñicpic añmañciwiñ.

De i miñpa jém Cristo

(Mr. 12:35-37; Lc. 20:41-44)

⁴¹Iganam añtuumaneyaj jem jém fariseoyaj, Jesús icwác. ⁴²Iñímáy:

—Anímaayi tí iñjístámpa, ¿i imaníc jém Cristo?

Nímyaj jém fariseoyaj:

—Jém David imaníc.

⁴³Jesús iñímáy:

—Jém Dios iAnama ichi jixi jém David iga wiap iñmat, ¿jesic tíiga nímpa jém David iga jém Cristo je jém iQmi? Porque nímpa jém David:

⁴⁴Jém anJatuñ Dios iñímáy jém ánQmi Cristo:

“Coñi yim ananjwimi hasta que iñcoñwíypa jém mijóyixyajpaap.”

45 ¿Pero jutsap ichíy jém Cristo juuts jém David imaníc, siiga nimítm jém David iga jém Cristo iQmi?

46 Jesic dá i wiá icutsoḅ jém Jesús. Dende jém jama dáam i más icwác jém Jesús porque agui cḅnyajpa.

Jesús iwogáy jém fariseoyaj y jém escribaspic maestroyaj

(Mr. 12:38-40; Lc. 11:37-54; 20:45-47)

23 Jesic moj iḅmadáy Jesús itúmpiy jém aḅtuumaḅneyajwiḅ con jém icuyujciwiñ. Nimpa:

2—Jém escribaspic maestroyaj con jém fariseoyaj jexpicítm aḅquímayooyi iḅmatpa juuts jém Moisés. 3 Jesic cupictaami mimichám, wattaami itúmpiy juuts miñímaytámpa cuando miḅquejaytámpa jém Dios iḅmáti. Pero odoy wattaami juuts iwatyajpa jeeyaj. Porque iwianmatyajpa, pero dá iwíwatyajpa. 4 Tsam jáyan iḅquímayooyi iḅxquímajpa, tsam ictsiḅmayajpa jém itíwítam, pero jeeyaj dá iyoxpátpa con tum jém iwayci iga icuyagíyáypa ichimi.

5 Iwíwatyajpa iga ixtaíñ iga wibic píxiñ. Agui iwianjamyaj jém wítipic bolsa juí ininicpa jém Dios iḅmáti. Agui wí accuyajne jém iyagats yooí iḅḅaca. 6 Cuando wattap jém miḅpic siḅ, agui iwianjamyaj jém coḅcuy juí wícyajpa jém miḅtampic aḅjagooyiyaj. Agui icusúniyyajpa jém más wibic coḅcuy jém sinagoga. 7 Iwianjampatim iga tandioschiñ calle. Ixunpa iga jém píxiñtam iñíyíyíñ iga: “Rabí, Rabí”. Taichám tanaḅmatimi nimtooba: “Mammaestro”.

8 Odoy jiici iga i miñíyíyíñ iga miRabí, porque íf tum jém imMaestro, je jém Cristo. Mimichám miḅwítam. 9 Odoy nímaayi tum píxiñ iga “Manjatuj” iga miḅimíyypa yíḅ naxyucmi, porque íf tum jém tanJatuj jém itwíip siḅyucmi. 10 Dá wiap iñchíy juuts miḅjagooyi porque íf tum jém inijagooyi je jém Cristo. 11 Jém más miḅpic aḅjagooyi entre mimichám micuyoxatámpa. 12 Dios dá iwíixpa jém píxiñ jém tsampic nacujítpa. Pero wíixtpa tum píxiñ siiga da malo íanama.

13 Agui miuuguyítim, mimichám, miescribaspic y mifariseopíc. Tsam minimigóyaytáp. Dá nunca iḅwattámpa juuts inijquejáypa jém iḅcuyujciwiñ. Mimichám inijpajpa jém puerta juí tigíyyajpa jém píxiñtam juí iḅjacpa Dios. Da miḅigíyypa mimichám, ni dátim iñ iḅgáypa iga tigíyyajiñ jeeyaj.

14 Agui miuuguyítim mimichám, miescribaspic mimaestrotam y mifariseopíc. Tsam minimigóyaytáp. Dá nunca iḅwattámpa juuts inijquejáypa jém píxiñtam. Iñtobáypa pímiimi jém cunoya imiichi, jesic ocmi tsam yagatspic oración iḅwatpa iga immigóyáypa jém píxiñtam. Jeeyucmi tsam miḅpic castigo michiítamtáp.

15 Agui miuuguyítim, mimichám, miescribaspic mimaestrotam y mifariseopíc. Tsam minimigóyaytáp. Tsam iḅcuámpa icuwíti yíḅ naxyucmi hasta jém lamar aḅwiñtuc iga impátpa tum píxiñ iga inijquejáypa michpic inijquímayooyi. Cuando yaj inijmadáy, jesic jém píxiñ más

jáyaŋ ipictsoŋpa castigo que mimichám.

¹⁶'Agui miuuguyítim, mimichám, inñictámpa jém inñiwitam juuts cáchtiyaj, pero micáchítim mimichám. Porque miñimtámpa, siiga i ichacpa jém mijpic mástic juuts tum testigo iga iwatpa juuts ijycámáy, jesic da ti inascaaba siiga da iwatpa. Pero siiga i ichacpa jém oro jém itwip másticjom juuts tum testigo, jesic tienes que iwatpa juuts ijycámáyne. ¹⁷Mimichám da mijixiyá. Micáchítim. Jém mijpic mástic más wiap que jém oro porque jém mástic iwítsacpa jém oro jém itwip másticjom.

¹⁸'Miñimtámpatim: "Siiga i ichacpa juuts tum testigo jém altar iga iwatpa juuts ijycámáyne, jesic da ti inascaaba siiga da iccupacpa juuts ijycámáyne. Pero siiga ichacpa jém ofrenda jém itwip jém altaryucmi juuts tum testigo, jesic tienes que iwatpa juuts ijycámáyne." ¹⁹Michám da mijixiyá. Micáchítim. Jém altar más wiap que jém ofrenda porque jém altar iwítsacpa jém ofrenda jém itwip altaryucmi. ²⁰Siiga i ichacpa juuts tum testigo jém altar, jesic ichacpatim juuts tum testigo itumpiy jém itwip jém altaryucmi. ²¹Siiga i ichacpa juuts tum testigo jém mijpic mástic, jesic ichacpatim juuts tum testigo jém itwip másticjom porque jemtim it jém tanJatun Dios. ²²Siiga i ichacpa jém sin juuts tum testigo, ichacpatim juuts tum testigo jém tanJatun Dios jém itwip sinyucmi.

²³'Agui miuuguyítim, mimichám, miescribaspic mimaestrotam y

mifariseopic. Miñimantaayap iga incupicpa Dios. Inchiiba Dios jém décima parte jém menta, jém anís y jém comino, pero da inwadáypa caso jém más mijpic anquímayooyi. Más ixunpa Dios iga inwíwatpa y miyaachanjaamóypa y incupicpa iga Dios wiap miyoxpát. Numa wí iga inwattámpa juuts nimpá jém más mijpic anquímayooyi y da inñactámpa iga inwatpatim jém xufupic anquímayooyi.

²⁴'Mimichám minjagooyítim, pero micáchítim. Tsam inwadáypa caso jém xufupic asunto jém dapic juchaŋ. Pero jém asunto tsam mijpic da inwadáypa caso. Juuts nimyajpa, inñoppa tum xuúu usu jém imvasojom iga odoy inñuguiñ, pero ocmi impitquetpa tum camello.

²⁵'Agui miuuguyítim, mimichám, miescribaspic mimaestrotam y mifariseopic, da inwattámpa juuts ininquejáypa jém pixiñtam. Tsam inçujichaytámpa jém taza y jém chima iyucwiñ, pero jojmi da inçujichayñeta, tsam it jém nuumi y jém cusúniyooyi. ²⁶A que mifariseopic, agui micáchítim. Wiñti cujichaayi jém taza ijojmi y jém chima ijojmi, jesic ocmi cujichaytaptim jém iyucwiñ.

²⁷'Agui miuuguyítim miescribaspic mimaestrotam y mifariseopic, tsam minimigóyaytap inyaac. Mijexám juuts tum tsúts ijos tsam wíwatnetá, agui popo anscimi. Agui wí tánix. Pero jojmi tsam it jém tsúts ipac. Jáyaŋ it jém da wítampic cosa, tsam puwa. ²⁸Jesanelim mimichám, cuando miixyajpa jém pixiñtam, ijisyajpa iga wibic mipixiñ, pero inñanamaŋjom tsam it jém migooyi y jém malopic jixi.

²⁹Agui miuuguyítm miescribaspíc mimaestrotam y jém mifariseopic, dá inwattámpa juuts iniquejáypa jém pixiñtam. Inwatta jém mijpic monumento juí cumyajta jém wiñcpc Dios inmafciiwiñ. Tsam inwíaccuyajnetá jém monumento juí cumyajta jém wiñcpc aḡmafciiwiñ. ³⁰Ocmi miñimtámpa mimichám: “Meega aítta cuando íf jém wiñcpc antúmmítam, dá idic anyoxpát iga accaata jém Dios inmafciiwiñ.” ³¹Numa juuts mimichám miñimta iga jém wiñcpc pixiñtam mimichám injatunwewetam. Iccaayaj jém Dios inmafciiwiñ. Mimichám mijextim juuts jém injatunwewetam. ³²Jesic seguido wati jempic hasta que cupacpa inwat juuts ictsucumyaj jém injatunwewetam.

³³Tsam malo jém inwewetam. Mimichám tsam mimaloím juuts tum tsañ. Da wíap inçiiputta de jém castigo. Tienes que miñicpa jém juctjom juí dá nunca píchpa.

³⁴Jeeyucmi maḡcutsadáypa tunḡac aḡmafciiwiñ, y wibic pixiñtam jixiiywiip, y jém nunta escribaspíc maestroyaj. Pero algunos iniccaatámpa. Algunos inçunúntámpa cunusyucmi. Algunos inçóctstámpa jém sinagoga. Algunos inicpoytámpa de tum atebet hasta tunḡac atebet.

³⁵Michám impicsonḡtámpa tum mijpic castigo. Dios michégáypa icobac iga accaayajta ítumpiy jém wítampic pixiñtam, dende jém wiñtipic accaata jém Abel jém dápic íi watne, hasta jém Berequías imanic, jém Zacarías, jém accaatawiip masticjom

nocojom juí íf jém altar. ³⁶Numa mannímáypa iga ítumpiy yíp castigo ipicsonḡajpa jém ífajwiip siip.

Wejpa Jesús jém Jerusalén aḡḡaca
(Lc. 13:34-35)

³⁷Mimichám, miíftanwiip Jerusalén, iniccaata jém wiñcpc aḡmafciiwiñ. Inñáscata tsaami jém micutsadayñewiip Dios. Waćciy anaḡtuumawattip jém immanictam juuts jém piyuapa inḡtuumawatpa jém imanictam jém ixajcucim, pero dá inwianḡjamta. ³⁸Ixaami mimichám, yíp atebet tsíypa juuts tum tic dá oomáy. Icutum tsíypa. ³⁹Siip mannímáypa mimichám iga dá eybic ánixtámpa hasta núcpa jém tiempo cuando miñimtámpa iga: “Agui wí jém tananḡjagooyi jém tacutsadayñewiip tanḡatunḡ Dios.”

Nimpa Jesús iga cujegáypa jém mijpic mastic

(Mr. 13:1-2; Lc. 21:5-6)

24 Jesic put Jesús masticjom. Iganam nicpa, icunúcyaj jém icuyujciwiñ. Moj inquejayyaj Jesús jém wibic ticyaj jém mijpic mastic aḡḡaca, tsam wíwatne.

²Pero Jesús inímáy:

—Mimichám, ixáami yíp ticyaj. Numa mannímáypa iga yajpa imiswattá icutero yíp mastic, dá tatsneeba ichy ni tum tsa. Ítumpiy accujegayyajta.

Jém seña cuando miñpa jém inḡanḡpigam jama

(Mr. 13:3-23; Lc. 21:7-24; 17:22-24)

³Jesic nicyaj jém cotsicyucmi de Olivos. Cuando coñ Jesús, jém icuyujciwiñ iyamnímayajpa:

—Anímaayi jucha naspa ítumpiy yípyaj cosa. ¿Júp seña ánixtámpa cuando mimiñgacpa yíp naxyucmi iga inicucuyajpa yíp nas?

⁴Jesic Jesús icutsoj. Ínímáy:

—Nawattamtaji cuenta iga odoy i mimigóyayíñ. ⁵Miñyajpa waí jém migoypaap ich anniyimi. Nímyajpa iga: “Ich aCristo.” Imigóyayajpa tsam jáyan jém pixiñtam. ⁶Immatotámpa iga miñpa jém guerra. Wañpa iga tsam áñayajpa jém naciónyaj. Pero odoy cñtaami. Tienes que naspa ítumpiy yípyaj cosa, pero danam núcne jém íñanpigam jama. ⁷Tum nación áñayajpa con tunçac nación. Tum naxyucmi áñayajpa con tunçac naxyucmi. Miñpa jém mijpic yuu. Miñpa waí jém malopic caacuy. Miñpa jém nasyixi juí quej.

⁸Cuando miñpa ítumpiy yípyaj cosa, yaguiñ tsucumpa jém mijpic yaachaji.

⁹Jesic micijjuncottamtap jém malopic anjagooyi icijjom iga mimalwadaytamtap. Miccaatamtap. Icuwíti yíp naxyucmi tsam mijóyixyajpa ich ançuyucmi.

¹⁰Cuando núcpa jém tiempo, tsam jáyan pixiñtam ichacyajpa jém Dios íñmaí. Algunos iwadáypa atraición jém íñwi iga matstaíñ. Tsam najóyixyajtap. ¹¹Miñyajpa jáyan jém migoyajpaap, nímantaayap iga Dios íñmatciwiñ. Imigóyayajpa tsam jáyan jém pixiñtam. ¹²Tsam jáyanap jém malopic jixi jeeyucmi jáyan jém pixiñtam ichacyajpa iga ítoypa jém íñwítam. ¹³Pero ciacputtap jém iyaachiyapaap jém yaachaji, jém dapic ichacpa jém Dios íñmaí hasta jém íñanpigam

jama. ¹⁴Wiñti anmattap yíp wibic anmaí iga Dios injacpa jém ítyajwiip yíp naxyucmi. Núcpa juíquej iga jodónataíñ jém Dios íñmaí. Ocmi núcpa jém íñanpigam jama.

¹⁵Jém wiñcpcic anmatciwiñ jém Daniel íjaychac jém librojom iga miñpa tum anjagooyi tsam pími malo, íjóyixpa tanJatuj Dios. Miñpa iwat contra jém Dios íñquímayoooyi. Cuando íñix iga miñ íti jém anjagooyi juí da iwianjam Dios (el que imaypa yíp libro wí iga icutiíyíyíñ tí annímáypa), ¹⁶jesic miíttanwiip jém naxyucmi de Judea, poytaami, nictaami jém cotsiganjoj. ¹⁷Siiga miqúimne íñticyucmi jém tunçac piso, jesic odoy queti iga nicpa impic íñtraste, pero nicsim poyimi. ¹⁸Siiga miífta camjom cuando immatoj iga núcneum jém malopic anjagooyi, jesic odoy settaami íñticciim iga miñpa impic impuctucu. Jemigam tsucumtaami. ¹⁹Agui uuguayim jém yomtám jém manicomcanewiip y jém ictsútsápápic jém xuxut tsixtam. Porque tsam jáyan yaachaji miñpa. ²⁰Anwejpátaami Dios iga odoy mictsíyátamiñ jém tiempo de succuc ni jém jejcuy jama cuando mipoytámpa. ²¹Cuando núc yíp malopic anjagooyi, tsam pími miyaachatámpa. Da nunca oypa tánix jexpic yaachaji dende Dios iwat yíp nas. Ni ocmi da eybic tánixpa jexpic yaachaji. ²²Jém tanJatuj Dios da íjcpa iga jáypa jém malopic anjagooyi. Siiga jáypa, da i ciiputpa, cucaayajpa ítumpiy jém icupinneyajwiip Dios, jeeyucmi da íjcpa iga jáypa jém mijpic yaachaji.

²³Siiga i miñímáypa iga: “Miñi aami, yim it jem Cristo”, o tungac miñímáypa: “Nigi aami jeexic it jem Cristo”, jesic odooy cupictaami. ²⁴Porque miñaypa tsam jáyan jem migoyyajpaap. Nímanṭaayap iga: “Ich aCristo”, pero migóypa. Nímanṭaayap iga: “Ich awibic jem Dios inṭaṭciwiñ.” Iwataypa jem wítampic seña y jem milagroyaj iga imigóyayyaja jem icupiṇneyajwiip Dios meega wíap. ²⁵Mannímáyñeum wiñti ti miñpa antes que amiñgacpa. ²⁶Jeeyucmi siiga i miñímáypa iga: “Nigi aami jem Cristo jem titsinaxyucmi”, odooy nigi aami. Siiga nímajpa: “Miñi aami, yim it jem Cristo tum cuartojom aṇnécne”, odooy cupici. ²⁷Porque cuando ich, jem aMiñnewiip Siṇyucmi, amiñgacpa yíp naxyucmi, jesic i quej aixyajpa. Juuts quénpa jem majjywiñ dende aṇniisaumi hasta aṇyomsaumi, jesanétim tsam wíquejpa cuando amiñgacpa. ²⁸Juṭ caane tum cawaj jemum aṇtuumayajpa jem nuupu. Jesap̄tim tsam wíquejpa cuando núctooba jem inṭanpigam jama.

Jutsap imiñgac jem Dios iManic

(Mr. 13:24-37; Lc. 21:25-33; 17:26-30, 34-36)

²⁹Jeeti rato cuando naspa jem yaachaji, píchpa jem jama ichoca y jem poya dátim tsoepa. Jem matsa, jem itwiip siṇyucmi, cutiṇyajpa. Tsam tsigoyyajpa itumpiy jem ityajwiip jem matsaanjom. ³⁰Quejpa jem seña siṇyucmi iga miñpa jem icutsatnewiip Dios. Tsam weyjajpa itumpiy jem ityajwiip icuwiti yíp naxyucmi cuando iixyajpa iga miñgacpa jem

Miñnewiip Siṇyucmi jem ucsañjom con jem Dios ipimi juuts tum mijpic anjagooyi. ³¹Cutsadayyajtap jem siṇyucmicpic pixiñtam yíp naxyucmi. Sustap tum suscuy. Agui pimi aṇjiypa iga inṭuumawatpa itumpiy jem icupiṇneyajwiip Dios icuwoyo jem mundo dende siṇyucmi hasta naxyucmi.

³²Cutiṇyaytaami yíp ejemplo de jem tsuj. Cuando químpa jem inṭamaañay, jesic inṭjodoṇtam iga núctooba jem cutujci. ³³Jesap̄tim cuando inṭixtámpa iga naspa itumpiy jem mannímáyñewiip iga miñpa, jesic inṭjodoṇtam iga nocojom it jem jama cuando amiñgacpa yíp naxyucmi. ³⁴Numa mannímáypa, cupacpa itumpiy yípyaj cosa antes que caayajpa itumpiy jem pixiñtam jem ityajwiip jem tiempo. ³⁵Cuyajpa jem siṇ y jem nas, pero ich anaṇmāti da nunca cuyajpa.

³⁶Da i ijodoṇ jup jama ni juchis hora naspa itumpiy yípyaj cosa. Da ijodoṇyay ni jem siṇyucmicpic pixiñtam ni dátim ijodoṇ jem Dios iManic. Icuṭum ijodoṇ jem tanJatuj Dios.

³⁷Juustim jem tiempo cuando it idic jem Noé, jesap̄tim jem tiempo cuando amiñgacpa yíp naxyucmi. ³⁸Porque wiñigam cuando it idic jem Noé, cuando danam núcne jem diluvio, jem pixiñtam wícyajpaṭim y ucyajpaṭim. Aṇcoomíyoyajpaṭim y ichiiyajpaṭim iyommanictam iga aṇcoomíyayajpa hasta que núc jem jama cuando jem Noé tigiy jem mijpic barcojom. ³⁹Da icutiṇyay hasta que quim jem ni, inicuñgayyaj itumpiy jem

pixiñtam. Jempicim inascayajpa jem ityajwiip yip naxyucmi cuando ich, jem aMiññewiip Siñyucmi, amiñgacpa yip naxyucmi.

⁴⁰ Cuando núctooba jem inañpigam jama, wagayoxayajpa wisten pixiñ icamjom, tum nanictap, tum tsactap. ⁴¹ Wisten yomo widoyyajpa tum molinoyucmi, tum nanictap, tum tsactap.

⁴² Itáaami al tanto porque da inñjodoñtam juchis hora miñpa jem inñomi, odoy moñtaami mimichfam.

⁴³ Cutiyyiñtaami, siiga tum pixiñ ijodoñ juchis hora núcpa tsuucim jem númpaap, jesic da moñpa iga odoy ijedayiñ jem itic jem númpaap.

⁴⁴ Jeeyucmi mannímáypa, itáaami listo porque jem tiempo iga inñjspa iga ich, jem aMiññewiip Siñyucmi, da amiñgacpa, jesigam amiñpa.

Jém malopic cabo y jém wibic

(Lc. 12:41-48)

⁴⁵ Siip manañquejáypa iapaap jem wibic cabo jem icutiyyiypaap. Jém iomi ichacpa iga injaguñ jem ityajwiip iticciim iga icwícyajiñ.

⁴⁶ Agui maymay jem cabo siiga síp iwat juuts ipiimiyñe jem iomi cuando miñgacpa. ⁴⁷ Mannímáypa iga jem iomi iccámpa jem icabo juuts tum anjagooyi iga injacpa itumpiy jem inñas y jem icuyoxayajpaap. ⁴⁸ Pero siiga malo yip cabo, ijispa inamanjom iga da jobí miñgacpa jem iomi.

⁴⁹ Moypa imalwadáy tungac jem icuyoxapaap jem iomi. Tsam wícpa, tsam ucpa con jem tungac ucciwiñ. ⁵⁰ Miñgacpa jem cabo iomi tum jama cuando da inñjócne. Miñpa tum hora cuando da ijodoñ.

⁵¹ Chiifap mijpic castigo con jem malopic pixiñtam juñ tsam weyjajpa, juñ inichyajpa itíts.

Jém cuento de jém diez woñtam

25 Jesic jem tiempo cuando injacpa Dios yip naxyucmi jex juuts diez jem woñtam nicyaj juñ añcoomíyoyñimpa. Ipicay jem ijucti, nic ichoñyay jem añcoomiypaap.

² Cinco jem woñtam da jixiíy y cinco jem woñtam agui jixiíy. ³ Jém dapic jixiíy ipicyaj ijucti, pero da ininicyaj jem aceite iga icucómáypa eybic jem ijucti. ⁴ Pero jem jixiyywiip ininic jem aceite tum xanujom. Ininicpatim jem ijucti. ⁵ Tsam táñcaap inñuc jem yoomiypaap. Tsam moñtooba jem woñtam.

Ocmi moñyay. ⁶ Jesic cugaptsu imatoñyay tum mijpic jiyi. Nimpa: “Miñpa jem yoomiypaap. Nigi tsoñtaami.” ⁷ Tsucumyay itumpiy jem woñtam. Moj iwítsacyaj ijucti.

⁸ Jém cinco woñtam, jem dapic jixiíy, inñimayyajpa jem jixiyywiip: “Achiitaami uxañ aceite porque ich anjucti píchtoobam.” ⁹ Pero jem jixiyywiip icutsoñyay. Nimyay: “Da manchiiba porque wiip da actsíypa aich siiga manchiiba. Más wi nigi juytaami inñaac juñ mayfap.” ¹⁰ Pero iganam nic ijuyyay aceite jem cinco woñtam, jem dapic jixiíy, jesigam núc jem yoomiypaap. Y jem cinco jem woñtam jem jixiyywiip tigiyay jojmi juñ it jem añcoomíyóycuy. Añpajta jem puerta. ¹¹ Ocmi setyay jem woñtam jem nicnewiip ijuy aceite. Inñimayyajpa jem tic iomi: “Añaañi jem puerta.” ¹² Pero jem tic iomi inñímáy: “Núma mimichfam, da mánixpicpa.”

¹³Jesic Jesús inílmáy:

—Odoý monṭaami mimichfam, iftaami al tanto porque da inḡodoṇ júp jama ni juchis hora amiṅgacpa yíp naxyucmi jém aMiññewiip Sinyucmi.

Jém esclavoyaj iyoxacaaba jém iomi ifumiñ

(Lc. 19:11-27)

¹⁴Jém wibic aṇmaṭi iga Dios injacpa yíp naxyucmi jex juuts tum pìxiñ tsam tumiñý. Nicpa tunḡac naxyucmi. Jesic nicpa, inḡejáy jém iesclavoyaj iga ichi uxan tumiñ iga iyoxacayajiñ.

¹⁵Tum jém iesclavo ichi cinco talento (tum talento ivale seis mil tumiñ de plata). Tunḡac ichi wisten talento. Tunḡac ichi tum talento. Chiifá cada quien juuts wiap iyoxaca. Jesic ocmi nic jém pìxiñ. ¹⁶Tum jém esclavo, jém chiiñetawiip jém cinco talento, moj iyoxaca jém tumiñ. Icoñwý tunḡac cinco talento. ¹⁷Jempicim iwat jém tunḡac esclavo, jém chiiñetawiip wisten talento. Icoñwý con jém tumiñ tunḡac wisten talento.

¹⁸Pero jém tunḡac esclavo, jém chiiñetawiip tum talento, nic inḡegáy jém iomi ifumiñ. Ifaj tum jos, jemum icum nasciim.

¹⁹Jesic pecam nicne jém iomi, set eybic. Moj ifop cuenta con jém iesclavo. ²⁰Wiñí núc jém chiiñetawiip jém cinco talento. Iciijunḡodáy iomi tunḡac cinco talento jém icoñwýñewiip. Inílmáy: “Mánomi, anchi cinco talento, pero yim if tunḡac cinco talento aṇcoñwýñe.” ²¹Jém iomi inílmáy: “If wi. Mich tum wibic miesclavo, agui

wia inḡwat cuenta jém ammiichi. Como mánix iga wia miḡwat cuenta jém uxanpic, siip manaccámpa juuts tum anḡagooyi iga ininjacpa más jém jáyanpic. Siip tigiyi yim con aich juṭ if jém maymáaji.”

²²Ocmi núc jém tunḡac iesclavo jém chiiñetawiip wisten talento. Niimpa: “Mánomi, anchi wisten talento. Yim if tunḡac wisten aṇcoñwýñe.” ²³Jém iomi inílmáy: “Wibic miesclavo, wiap inḡwat cuenta jém ammiichi. Como mánix iga wia miḡwat cuenta jém uxanpic, siip manaccámpa juuts tum miḡagooyi iga ininjacpa jém más jáyanpic. Siip tigiyi yim con aich juṭ if jém maymáaji.”

²⁴Ocmi núctim jém tunḡac esclavo jém chiiñetawiip tum talento. Inílmáy: “Mánomi, ich anḡodoṇ iga tsam pimi mipimáyóypa. Impicṭsonḡa jém cosecha juṭ da oy inñip. Impinḡa jém cosecha juṭ da oy inyin. ²⁵Jeeyucmi tsam aciṇ. Oy mannegáy jém inṭtumiñ nasciim. Pero yim if jém inṭtumiñ jém immiichipic.” ²⁶Jém iomi inílmáy jém iesclavo: “Tsam mimalopic miesclavo, tsam micutiñ. Siiga inḡodoṇ iga ampicṭsonḡa jém cosecha juṭ da oy añip y ampinḡa jém cosecha juṭ da oy anyin, ²⁷¿jesic tiiga da inḡucom antumiñ jém banco? Jesic cuando asetpa, ampicṭsonḡa antumiñ con jém icoñwýyooyi.”

²⁸Jesic jém esclavo iomi inílmáy jém ityajwiip jem: “Accáyaayi jém talento yíp pìxiñ. Chi jém iniitwiip diez talento. ²⁹Porque jém iniitwiip, chiifap más iga odoý

ti ifogóyáyiñ. Pero jém ďapic inií, accáyayťap hasta jém uxanpic iniíf.
³⁰ Acníctaami yíp ďa wibic esclavo jém piichciim jém itwiip anšicmi, juť tsam wejyajpa, iñichyajpa ifíts.”

Ciipiňyajťap jém nacióňyaj

³¹ Cuando miňgacpa jém Miñnewiip Siňyucmi, miňpa juuts tum anjagooyi. Iwaganamiňyajpa itumpiy jém siňyucmicpic pixiñtam. Coñ jém anjagooyi iconcuyyucmi iga injacpa yíp nas con jém Dios ipimi. ³² Itumpiy jém pixiñtam, jém ityajwiip icuwiťi yíp naxyucmi, anťuumayajpa jém anjagooyi iwiňjom. Jém anjagooyi icupíňáypa jém tunjac pixiñtam juuts iwatpa jém borrego iomi. Itoppa jém chivo jém borregoanjom, ichacpa aparte. ³³ Jém borregoyaj tsacyajťap anwimi y jém chivoyaj tsacyajťap anňaymi.

³⁴ Jesic jém Rey iňímáypa jém ityajwiip inwimi: “Miñi mimichťam jém miwíwadayñewiip anJatun Dios. Miñi, pictsonťaami jém lugar jém miwítsagayñetawiiip dende iwat Dios yíp nas. ³⁵ Porque tsam ayuap y mimichťam anacwícta. Tsam anťitťspa y michťam anacnícta. Ich juuts juumipic apixiñ, pero mimichťam anacnúcsta tic.

³⁶ Ďa apuctugý, pero mimichťam anchiíťa. Amimne y mimichťam oy anámta. Apajťa cárcel, pero mimichťam oy anámta.”

³⁷ Jesic jém wibic pixiñtam, jém iwipictsonneyajwiip jém anjagooyi, nimyajpa: “MánOmi, ějuchá mánixťa iga miyuap y manacwícta? ěJuchá mánixťa iga miňťictťspa y manacnícta? ³⁸ ěJuchá

mánixťa juuts tum juumipic mipixiñ y manacnúcsta tic, o iga Ďa mipuctugý y manchiíťa?

³⁹ ěJuchá mánixťa mimimne o mipajnetá cárcel y oy mánámta?”

⁴⁰ Jém Rey icutsonj, iňímáy jém iwíwatneyajwiip: “Numa, mannímáypa, íťam inwadáy yíp antiwítam, jém ďapic juchan, jesic ich mismo anwíwadáy.”

⁴¹ Jesic jém Rey iňímáy jém ityajwiip inňaymi: “Mimichťam tsam mimalo, impictsonťampa jém castigo. Nicťaami jém juctjom juť Ďa nunca píchpa jém watnetawiiip para jém Wocciwiñ y jém mal espíritu. ⁴² Ich tsam ayuap y mimichťam Ďa anacwícta. Tsam anťitťspa y mimichťam Ďa anacnícta. ⁴³ Asiiba juuts tum juumipic apixiñ, pero

mimichťam Ďa anacnúcsta tic. Ďa apuctugý y mimichťam Ďa ti anchiíťa. Amimne y apajťa cárcel y mimichťam ďatim oy anámta.” ⁴⁴ Jesic nimyajpa jém malopic pixiñtam: “MánOmi, ějuchis mánixťa cuando miyuap, miňťitťspa, mixiiba juuts tum juumipic pixiñ, Ďa mipuctugý, mimimne, o mipajnetá cárcel y Ďa oy manyoxpátta?” ⁴⁵ Jesic jém Rey icutsonpa jém malopic pixiñtam. Nímayyajťa: “Numa mannímáypa, como Ďa inwíwadayťa jém antiwítam ďapic juchan, jesic ichťim mismo Ďa anwíwadáy.”

⁴⁶ Ocmi nicyajpa yíp malopic pixiñtam juť ipictsonyajpa jém castigo juť Ďa nunca yajpa iyoy. Pero jém wibic pixiñtam, jém iwíwatneyajwiip, ipictsonpa jém vida jém ďapic cuyajpa.

**Ijisyaj jém ienemigoyaj jutsap
imatsyaj Jesús**

(Mr. 14:1-2; Lc. 22:1-2; Jn. 11:45-53)

26 Cuando yaj inmat Jesús,
iñímáy jém icuyujciwiñ:

²—Mimichfam injodontam iga
wisna jama naspa jém pascuasij
y ich, jém aMiññewiip Siñyucmi,
aciijunçottap iga acunúntap
cunusyucmi.

³Jesic anjuumayajpa jém
cobacpic panijyaj con jém
escribaspic maestroyaj y con jém
Israelpic wiđaytam. Anjuumayajpa
jém cobacpic panij, jém Caifás,
ipalacio. ⁴Jemum moj ijisyaj
jutsap icumigoyaj jém Jesús iga
imatsyajpa iga iccaayajpa. ⁵Pero
nimyajpa jém anjagooyiyaj:
—Da tammatspa yíp siñjom, jesic
đa cujíñayajpa jém pixiñtam.

**Tum yomo iccámáypa jém perfume
Jesús icobacyucmi**

(Mr. 14:3-9; Jn. 12:1-8)

⁶Í Jesús jém atebet Betania,
núc jém Ximoy iticciim, jém
cupúgáyñewiip idic inñaca. ⁷Icunúc
tum yomo con tum tsaafiasco comne
jém aceite jém cinpáppic jém aguipic
tsoowíy. Cuando coñ Jesús jém
mesaciim, jém yomo icutegáy jém
aceite icobacyucmi. ⁸Cuando iixyaj
jém icuyujciwiñ agui jóyyaj. Nimyaj:
—¿Tiiga itecmichca yíp aceite?

⁹Meega tammáypa, tampictsonpa
jáyañ tumiñ. Wiap tanyoxpátta jém
yaachayajpáppic.

¹⁰Jesic Jesús icutiyyíy tí síp inimyaj
jém icuyujciwiñ. Inímáy:

—Odoy moogiiyi yíp
yomo. Síp awiwadáy.

¹¹Jém yaachayajpáppic siempre
inwaganaiñtámpa. Pero aich đa
siempre manwaganaiñtámpa.

¹²Acutegáy jém yomo jém aceite
ammijtayyucmi juuts cuando
cumtap tum tsúts. ¹³Numa
mannímáypa iga juñquej anmattap
jém wibic anmañi icuwiñi yíp
naxyucmi, anmattapím tí awadáy
yíp yomo iga jém pixiñtam ijisyajiñ
tí iwat yíp yomo.

Jém Judas iciijunçot jém Jesús

(Mr. 14:10-11; Lc. 22:3-6)

¹⁴Ocmi tum de jém docepic
icuyujciwiñ inñyi Judas Iscariote
nic ininmat jém panij anjagooyiyaj.

¹⁵Inímáy jém panijyaj:

—¿Jutsañ anyojpa siiga
añciijunçotpa jém Jesús?

Jesic jeeyaj iyojyaj treinta tumiñ
de plata. ¹⁶Dende jeeti rato moj
ijis jém Judas jutsap iciijunçot jém
Jesús.

**Wícmonpa jém tánQmi iwatpa jém
Santa Cena**

(Mr. 14:12-25; Lc. 22:7-23;

Jn. 13:21-30; 1 Co. 11:23-26)

¹⁷Núc jém siñ cuando cúttap
jém caxtánañi sin levadura. Jesic
jém wiñtipic jama jém Jesús
icuyujciwiñ icunúcyaj. Icwácayaj,
inímayyaj Jesús:

—¿Jut inxunpa iga anwitsacpa
itumpiy cosa iga tawictámpa jém
pascuasij?

¹⁸Jesús inímáy icuyujciwiñ:

—Nictaami jém atebet Jerusalén.
Cuando miñúctámpa tum ticciim,
impátpa tum pixiñ. Nímaayi:
“Nímpa jém amMaestro iga siip
núcum jém hora iga cupacpa

jém anyoxacuy. Anacnaspá jém pascuasij mich inñicciim con aņcuyujciwiñ.”

¹⁹Jesús icuyujciwiñ iwatyaj itumpiy cosa juuts ipimíy. Iwatyajpa jém wiccuy iga icnaspá jém pascuasij.

²⁰Jesic tsuuyawum íti, coņyay Jesús jém mesaciim con jém doce icuyujciwiñ. ²¹Iganam wícyajpa, nimpá Jesús:

—Numa mannímáypa, tum de mimichfam aņciņucotpa jém ánenemigo iciijom.

²²Jesic jém icuyujciwiñ tsam anyácyaj. Moj nacwácyajtaji entre jeeyaj. Cada tumtum nim:

—MánQmi, ¿que aicham?

²³Icutsoņ Jesús. Nimpá:

—Jém aņwaganasonpaap caxtánañi tumti chimajom, jeam jém aciņucotpaap ánenemigo iciijom. ²⁴Jém Miññewiip Siņyucmi tienes que inñascaaba juuts nimpá jém Dios iņmáti juť jayñeta, pero agui uuguytim jém pixiñtam jém aciņucotpáppic, wí idic meega dá nay.

²⁵Ocmi jiy jém Judas jém iciijucotpaap. Nimpá:

—MamMaestro, ¿que aicham?

Jesús inñímáy:

—Mimicham.

²⁶Iganam wícyajpa, Jesús imatspic jém caxtánañi. Cuando yaj iņwejpát Dios, iwéc jém caxtánañi, ichi icuyujciwiñ. Inñímáy:

—Yíp caxtánañi ich ammiťay, cúttaami.

²⁷Ocmi ipic tum copa jém uvas inñi, iņwejpát Dios. Ichi jeeyaj. Inñímáy:

—Uctaami inñumpiyfam. ²⁸Yíp ich anniipiñ jém antegaypáppic iga aņwatpa jém jomipic trato iga aņwítsagáypa jáyay jém pixiñtam itañca. ²⁹Mannímáy-támpa mimichfam iga dende siip dá ánućpa jém uvas inñi hasta que núćpa jém jama iga ánućpa eybić con mimichfam juť iņjacpa anJatun Dios.

³⁰Jesic yaj iwanyaj tum wañi, nicyaj jém cotsicyucmi.

Iņmatpa Jesús iga iņnéćpa jém Peto

(Mr. 14:26-31; Lc. 22:31-34; Jn. 13:36-38)

³¹Ocmi Jesús inñímáy icuyujciwiñ:

—Mimichfam inñumpiyfam tsam micitámpa y ampoychactámpa aņcuťum yiptim tsuu. Porque nimpá así jém Dios iņmáti juť jayñeta: “Accaatap jém iwatpáppic cuenta jém borregoyaj. Jém borregoyaj cupóyayajpa.” ³²Pero ocmi cuando apispa, aņjagoyñeeba annic jém naxyucmi de Galilea.

³³Jesic Peto inñímáy jém Jesús:

—Aunque itumpiy tsam ciņyajpa y michacyajpa iņcuťum, más aich dá aciņpa y dá maņcupóyáypa.

³⁴Jesic Jesús inñímáy:

—Numa mannímáypa iga yiptim tsuu antes que aņwejpa jém çayu mich anaņnéćpa tucciy.

³⁵Jém Peto inñímáy:

—Aunque tawagaaccaatañ con mimich, ich dá manaņnéćpa.

Itumpiy jém icuyujciwiñ nimaťtim jempic.

**Jesús inwejpát Dios jém lugar
Getsemaní**

(Mr. 14:32-42; Lc. 22:39-46)

³⁶Jesic nicyaj Jesús con jém icuyujciwiñ tum lugar inñiyi Getsemaní. Nímpa Jesús:

—Coñtaami yim iganam ich anicpa jemíc iga anañwejpátpa Dios.

³⁷Jesic Jesús ininic uxaj más juumi jém Peto y icuistic jém Zebedeo imanictam. Tsam pimi añyác Jesús, tsam ijispa tí inñascaaba. ³⁸Jesic Jesús inñímáy jém tucuten icuyujciwiñ:

—Ich agui pimi añyácne ánanamanjom hasta quénam acaatooba. Tsíyáami yim, odoy monjaami, nawattamtaji cuenta.

³⁹Jesic ocmi Jesús nic uxaj más juumi. Tocsneactij. Moj inwejpát Dios. Nímpa:

—ManJatuj, siiga inwianjam odoy jici iga annascaaba yíp mijpic yaachaji. Pero odoy wati juuts ich ansunpa. Wati juuts mich inwianjam.

⁴⁰Jesic set eybic Jesús juí ichac jém tucuten icuyujciwiñ. Monjaypa. Inñímáy jém Peto:

—¿Mimonja Peto? ¿Que da wiap imvivoja con aich ni tum hora?

⁴¹Odoy monjaami, nawattamtaji cuenta. Anwejpáttaami Dios iga odoy i wiañ micutítsta iga micmalwattampa. Numa, jém inñinama iwattooba juuts ixunpa Dios, pero jém immijtay da iwianjam.

⁴²Jesic eybicím nic Jesús inwejpát Dios. Nímpa:

—ManJatuj, siiga da wiap añciacput yíp mijpic yaachaji, jesic wati juuts mich inwianjam.

⁴³Ocmi eybic set Jesús juí íf icuyujciwiñ. Tsam monjaypa. Da tojtooba iixcuy porque tsam monjaoba. ⁴⁴Jemum ichac jém icuyujciwiñ. Eybicím nic inwejpát Dios tres vecesam. Nímpa jeéim añmáti. ⁴⁵Jesic set eybic juí íf jém icuyujciwiñ. Inñímáy:

—Siip numa monjaamim, jejaamim. Siip núcum jém hora iga ich, jém aMiñnewiip Sinyucmi, acijjucotap jém malopíc pixiñtam icijjom. ⁴⁶Tsucumtaamim, tanictámpam porque miñpam jém acijjucotpaap.

Matsta Jesús

(Mr. 14:43-50; Lc. 22:47-53; Jn. 18:2-11)

⁴⁷Iganam síp ijij Jesús, núc jém Judas jém itwiip idic con jém doce icuyujciwiñ. Iwaganamiñyaj tsam jáyaj jém pixiñtam. Inimiñyaj espada y jém cuy iga icótspa. Icutsadayyaj jém panij añjagooyi y jém wídaytam. ⁴⁸Jém Judas, jém icijjucotpaap Jesús, iwadáy jém pixiñtam tum seña. Inñímáy:

—Jém anaññacatsútspaap, jeam. Matstaami.

⁴⁹Jesic jém Judas icunúc jém Jesús. Inñímáy:

—MamMaestro, xutsóy.

Jesic inñacatsúts. ⁵⁰Jesús inñímáy:

—¿Amigo, tí miñ imméts?

Jesic icunúcyaj jém miñneyajwiip. Imatsyaj jém Jesús. Nanictawum preso.

⁵¹Pero tum jém iwaganaiñwiip Jesús, ífop tum espada, íñjquímáy

ífat̄sic jém cōbacpic panij imozo.

⁵²Jesic Jesús inílmáy:

—Coti jém espada iníacjom.

Porque ítumpiy jém añayajpáppic con espada, con espadatim accaatap.

⁵³¿Que da injodon iga ich wiap añwágáy Dios iga acutsadáyiñ doce legiones jém sinyucmipic pixiñtam y yípti rato acutsadáypa? ⁵⁴Pero siiga añwatpa jempic, ¿jutsap icupac jém añmat̄i jūt̄ jayñeta iga ayaachwattap?

⁵⁵Jesic Jesús inílmáy jém miññeyajwiip:

—¿Que miñ ammatsta con espada y jém cuy juuts tum anúmpaap? Ítumpiy jama accuyujóypa masticjom, da nunca ammatsta.

⁵⁶Ítumpiy yíp cosa iníascaaba Jesús iga cupacpa juuts ijaychacne jém wiñc̄pic añmat̄ciwiñ.

Jesic ítumpiy jém icuyujciwiñ jaj cupóyaayiyaj. Icutum tsíy jém Jesús.

Nanict̄a Jesús jém cōbacpic panijciim

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷Jesic jém imatsneyajwiip Jesús ininicyaj jém Caifás iwiñjom, jém cōbacpic panij añjagooyi. Jemum añtuumaneyaj wāti jém escribaspic maestroyaj y jém wiđaytam. ⁵⁸Jém Peto ijuumactúñiyñe hasta jém cōbacpic panij lan̄ciim. Jemum tigiy, coñañjac jém Peto con jém policia. Iixfooba tí nawattap jém Jesús.

⁵⁹Jém cōbacpic panijyaj con ítumpiy jém wiđaytam, jém Sanhedrín, imétsyajpa tum cumigoypaap iga accaat̄aiñ Jesús.

⁶⁰Pero da ipát̄yaj jém nimyajpáppic

iga imalwatne. Tsam jáyañ pixiñ icumigoyyajtooba idic jém Jesús, pero da wiap. Ocmi miñ wisten jém pixiñ jém icumigoypaap. ⁶¹Nimyaj:

—Yíp pixiñ nimpa iga: “Ich wiap ammiswat jém Dios imastic, jesic tucunajama eybic anactsucumpa.”

⁶²Jesic teñchucum jém cōbacpic panij, inílmáy Jesús:

—¿Que da in̄cutson̄pa? ¿Da immaton̄ tí s̄ip inímyaj contra mimich?

⁶³Pero Jesús da jiyja. Jém cōbacpic panij añjagooyi inílmáy: —Odoy amigóyaayi porque jém vivopic Dios taixpa. Anuntanímaayi siiga numa mimicham miCristo jém Dios miManic.

⁶⁴Jesic Jesús inílmáy: —Juuts mich miñim. Pero mannílmáypa iga dende siip ánixtámpa aich, jém aMiññewiip Sinyucmi, cuando acoñ jém tanJat̄uñ Dios in̄wimi, jém tsampic iniif ip̄imi. Ánixtámpatim cuando amiñgacpa sinyucmi jém ucsañjom.

⁶⁵Jesic jém cōbacpic panij ichicujac iyooti iga quejiñ iga icujiypa Dios. Nimpa:

—Yíp pixiñ icujiypa tanDios. ¿T̄iiga tammétstampa tungac testigo? Mimichám siip immaton̄neta iga tsam icujiypa tanDios. ⁶⁶¿T̄i in̄jistámpa?

Nimyajpa jém miññeyajwiip: —Iniif la culpa. Wī iga tanaccaaba.

⁶⁷Ocmi ichujcaayyaj iwiñpac. Ixonyaj. Tungac ifojáy iwiñpac.

⁶⁸Nimyaj:

—Siiga micham miCristo, anímaayi i micóts.

Jém Peto ignéc iga iixpic jém Jesús*(Mr. 14:66-72; Lc. 22:56-62;**Jn. 18:15-18, 25-27)*

⁶⁹Iganam coñ jém Peto aŋciim, miñ tum yomo jém icuyoxapaap jém panij. Iñímáy jém Peto:

—Mich iwaganasiibaŋim jém Jesús, jém Galileapic pìxiñ.

⁷⁰Pero jém Peto ignéc iga iwaganasiiba Jesús. Iñímáy jém yomo:

—Da anjodoŋ tí súp iññim.

⁷¹Cuando nic jém Peto jém corredor, tuŋgac jém yomo iixpicŋim, iñímáy jém ítyajwiip jem:

—Yíp pìxiñ iwaganasiiba jém Jesús jém Nazaretpic.

⁷²Eybicŋim ignéc jém Peto.

Nimpa:

—Wijodios, da ánixpicpa.

⁷³Tum rato más, algunos jém ítyajwiip jem, icunúcyaj jém Peto, iñímáy:

—Numa mich tum jeepicŋim mipìxiñ, tsam wiŋuejpa hasta inihmaŋi iga Nazaretpic mipìxiñ.

⁷⁴Jesic jém Peto moj malnìmi.

Nimpa:

—Wijodios, ich da ánixpicpa yíp pìxiñ.

Jeetì rato aŋwej jém çayu. ⁷⁵Jesic jém Peto ijis tí iñímáy Jesús cuando iñímáypa iga: “Mich anaŋnécpa tres veces antes que aŋwejpa jém çayu.” Jesic put aŋsicmi jém Peto. Pìmi wejpa porque agui anyácne.

Ciijuŋcotta Jesús jém Pilato iciijom*(Mr. 15:1; Lc. 23:1-2; Jn. 18:28-32)*

27 Jesic icuquejama aŋtuumayajpa ítumpiy jém panij anjagooyiyaj y jém

widayŋam iga iwatyajpa acuerdo jutsap iccaayaj Jesús. ²Tsenneta jém Jesús, nanicta jém gobernadorciim. Ciijuŋcotta jém Poncio Pilato iciijom.

Naccaata iyaac jém Judas

³Jém Judas, jém iwadayñewiip atraición, iix iga accaataŋ jém Jesús. Jesic icucac ijixi, ichacset jém treinta tumiñ de plata jém panij anjagooyi con jém widayŋam. ⁴Nimpa jém Judas:

—Ich tsam aŋwat taŋca iga aŋciijuŋcot tum pìxiñ ðapic tí iwatne iga accaataiñ.

Pero jeeyaj nimyaj:

—Ich da anticutigiyi. Je cuestión de mimich.

⁵Ocmi jém Judas ipatsquet jém tumiñ masticjom. Nic. Najúpcata iyaac.

⁶Jém panij anjagooyi ipiŋ jém tumiñ. Nimyajpa, yíp tumiñ da wiap taŋcot jém cajonjom juŋ accáyŋap jém ofrenda porque yíp tumiñ niipiñ ichowa.

⁷Ocmi iwatyaj acuerdo iga ijuyyajpa tum jaca nas con jém tumiñ. Jém lugar iñiyi jém suuŋnasciim. Ijuyyaj iga iniif lugar juŋ cumyajtŋap jém juumipic pìxiñŋam. ⁸Jeeyucmi hasta siip iñiyi jém nas, jém Niipiñ ichowa. ⁹Jempam cupacpa juuts nimpa jém wiñicpic aŋmatciwiñ jém Jeremías: “Jém treinta tumiñ de plata tum pìxiñ ichowa. Iccámáy jém precio jém Israelpic pìxiñŋam. Ipigayyaj jém pìxiñ ichowa.

¹⁰Con jém tumiñ ijuyyaj jém nas juŋ wataŋp suuŋ juuts anímáy jém tanJatun Dios.”

Nanicta Jesús jém Pilato iwiñjom*(Mr. 15:2-5; Lc. 23:3-5; Jn. 18:33-38)*

¹¹Jesic nanicta Jesús jém gobernadorciim. Jém gobernador icwác Jesús. Nímayŋa:

—¿Micham miRey de jém judfós?

Jesús inímáy jém gobernador:

—Aicham, juuts mich miñmpa.

¹²Jesic cuando jém panij anjagooyi con jém wiđaytam iquejajwadáy Jesús, da tí icutsoņ.

¹³Jesic jém Pilato inímáy Jesús:

—¿Que da immatoņ iga agui jáyaņ cosa sıp inímuyaj en contra de mimich?

¹⁴Pero Jesús dařim icutsoņ. Jesic jém gobernador agui ipooňanjampa.

Chiifá orde iga accaatap jém Jesús

(Mr. 15:6-20; Lc. 23:13-25; Jn. 18:38—19:16)

¹⁵Cada naspa jém pascuasij, iniif tum costumbre jém gobernador iga icutsigáypa tum preso para jém pixiňtam juuts jeeyaj icupiňyajpa.

¹⁶Pajnetá idic tum pixiň iniyi Barrabás. Jodóňaneta iga agui malo. ¹⁷Cuando aņtuumaneyaj itumpiy jém pixiňtam, jém Pilato icwácyajpa. Inímáy:

—¿I inxuntampa iga aņcutsigáypa, jém Barrabás o jém Jesús, iniyiřim Cristo?

¹⁸Porque ijodoņ jém Pilato iga jém Israelpic anjagooyiyaj agui ijóyixyajpa Jesús, agui icujóyiyajpa jeeyucmi icijũcodyaj.

¹⁹Iganam coň jém Pilato juř ciipíńóyapa, jém iyomo icutsadáy aņmaři. Nímayfa jém Pilato: “Odoy tiğycuumi con yıp wibic pixiň. Porque tsúmic agui amalmawíña yıbam pixiň icuyucmi.”

²⁰Pero jém panij anjagooyiyaj con jém wiđaytam inímayyajpa jém pixiňtam iga iwácyajiň iga cutsigayfaň jém Barrabás y accaataiň jém Jesús, hasta ijícya jém pixiňtam. ²¹Jesic eybic jém gobernador inímáy jeeyaj:

—¿Juppic de yıp wisten pixiň inwianjamta iga aņcutsigáypa?

Nímuyaj:

—Barrabás.

²²Jesic jém Pilato eybic icwácpa jém pixiňtam. Nímayyajta:

—¿Tí inwianjamta iga aņwadáypa yıp Jesús iniyiřim Cristo?

Itumpiy jém pixiňtam icutsoņyaj. Nímuyaj:

—iCunúntaami cunusyucmi!

²³Jesic Pilato inímáy jém pixiňtam:

—¿Tíiga? ¿Tí mal iwatne?

Pero más pimi jiyaypa jeeyaj. Nímuyaj:

—iCunúntaami cunusyucmi!

²⁴Cuando iix jém Pilato iga da tí wiap iwat iga sıp icujíňayyaj jém pixiňtam, iwác uxaņ ni, iche ici jém pixiňtam iwiňjom. Nímpa:

—Ich da anař la culpa iga accaatap yıp wibic pixiň. Da tí iwatne. Yıp cuestiń de mimichtam.

²⁵Nímuyaj itumpiy jém miňñeyajwiip:

—Aichtam con jém ammanictam anařfa la culpa iga accaatap yıp pixiň.

²⁶Jesic ocmi jém Pilato icutsigáy jém Barrabás. Ipiimáy jém soldado iga cótstaň Jesús. Icijũcodyaj jém soldado iga icunúnyajiň cunusyucmi.

²⁷Jesic jém gobernador isoldado ininic Jesús tum miřpic cuarto juř aņtuumaneyaj tsam jáyaņ jém soldado. Itumpiy icuteňxetyaj Jesús.

²⁸Tsodayfa jém yagatspic iyooři. Accamayfa jém tungac yooři jém tsabatspic. ²⁹Jém soldado itagayyaj tum apif corona, icamayyaj icobacyucmi. Ichiiyaj tum cuy iga

imatspa inwíciimi juuts tum rey. Icosteañayajpa jem Jesús iwiñjom. Ixaayiyajpa. Nimyaj:

—iXutsóy miRey de jem judíos!

³⁰Ichujcayajpa. Ifobayaj jem icuy iga iyígáyápa icobac. ³¹Cuando yaj ixaayiyaj, iccáyáy jem tsabats yooí, icámáy eybic jem iyooí jem imiichipic. Ocmi nanicta iga cunúntap cunusyucmi.

Cunúnta cunusyucmi jem Jesús

(Mr. 15:21-32; Lc. 23:26-43; Jn. 19:17-27)

³²Cuando niquiyaj tunjom, ipát tum Cirenepic pxiñ inñyi Ximoj. Jem soldado ipimíy jem Ximoj iga ininígayíñ jem Jesús icunus.

³³Jesic núcyaj tum lugar inñyi Gólgota. Nimtooba jem Tsútscozacpacicim. ³⁴Jemum ichiyaj jem vino namotneta con chuxñjwi. Cuando icutíts Jesús jem vino, da iuc.

³⁵Cuando yaj icunúnyaj cunusyucmi jem soldado, iwatyajpa sorteo entre jeeyaj i icoñwípa iga imiichap jem Jesús ipuctucu. Jempigam cupac juuts nimpa jem wiñcpic aḡmaćiwiñ: “Iwécyajpa ampuctucu entre jeeyaj. Iwatyajpa sorteo.” ³⁶Jesic coñyajpa jem soldado iga iwatyajpa cuenta. ³⁷Jem icobacancicmi accámayta tum letrero juť nimpa tiiga accaata: “Yíbam jem Jesús jem judíos iRey.”

³⁸Jesic cunúnyajtaťim wisten númyajpaap jeetim lugar juť cunúnta Jesús. Páñayta tum jem icunus jem Jesús inwimi y tum inñaymi. ³⁹Jem nasyajpápic jem inwíñóyayajpa con icobac, tsam imalmalmímayajpa. ⁴⁰Inímayaj:

—Mich miñimpa iga immiswatpa jem mijpic mastic y tucunajama inictsucumpa eybic. Siiga Dios miManic, naciacputtaj iñyaac. Nacunúnayťaji jem cunusyucmi, queti.

⁴¹Agui ixaayiyajpaťim jem panij anjagooyiyaj, jem escribaspic maestroyaj, jem fariseoyaj y jem wiđayťam. Nimyajťim jeeyaj:

⁴²—Yíp pxiñ iciacputpa tungac, pero iyaac da wiap iniciacputta. Siiga numa jem Israelpic iRey, nacunúnayťaiñ, jesic taḡcupictámpa. ⁴³Tsam icupicpa iga Dios wiap iyoxpát, jesic siip wí iga Dios iciacpuđiñ siiga numa itoypa; como tanímayñe iga Dios iManic.

⁴⁴Hasta jem númyajpaap, jem cunúntawiiip con Jesús, imalmalmíayťim.

Ca jem Jesús

(Mr. 15:33-41; Lc. 23:44-49; Jn. 19:28-30)

⁴⁵Jesic icuwíťi jem naxyucmi cupiichā dende cugapjama hasta las tres de la tarde. ⁴⁶Jesic jeetim hora pimi jiy jem Jesús. Nim:

—Elí Elí, ¿lama sabactani?

Yíp nimtooba: ManDios, manDios, ¿tiiga antsac aḡcuťum?

⁴⁷Algunos jem teññeyajwiip jem cuando imatonyaj, nimyajpa:

—Yíp pxiñ sip inwejay jem wiñcpic aḡmaćiwiñ jem Elías.

⁴⁸Jeetí rato nic poyimi tum de jeeyaj. Nic ipic tum esponja juuts tum puqui. Imuj con jem tampic vino. Iccám tum waycuyucmi iga igucpa Jesús. ⁴⁹Pero tungac nimyajpa:

—Tsaci, tánixpa siiga miñpa iciacput jém Elías.

⁵⁰Eybictim pimi jiy Jesús, jesic caum. ⁵¹Jeefi rato jém mijpic puctuctaañi jém itwiip jém mijpic masticjom teeñajsaj icucmi dende siñwiñ hasta naxwiñ. Tsam yis jém nas, pooyaj jém mijpic tsa. ⁵²Jém tsúts ijos ánáyayaj. Pisyaj jáyan jém pixiñtam jém icupicneyajwiip Dios, jém wiñcpcic caaneyaj. ⁵³Ocmi cuando acpista jém Jesús, putyaj ijosjom jém tsúts, nicyaj hasta jém atebet Jerusalén. Jemum tsam jáyan pixiñtam iixyaj.

⁵⁴Jesic jém capitán con jém iwatyajpáppic cuenta jém Jesús, cuando iixyaj iga pimi yis jém nas y iixtim ti naspajem, tsam pimi cñyaj. Nimyaj:

—Numa, yíj pixiñ jém Dios iManic.

⁵⁵Ítyajtim jem wati jém yomtám, juumi iixyajpa ti inasca jém Jesús. Yípyaj yomtám iwaganamiñyaj Jesús jém naxyucmi de Galilea, jém iyoxpátneyajwiip. ⁵⁶Entre jeeyaj ittim jém Malía Magdalena, jém Malía jém Jacobo y José iapa, ittim jém Zebedeo iyomo.

Cumtá jém Jesús

(Mr. 15:42-47; Lc. 23:50-56; Jn. 19:38-42)

⁵⁷Jesic tsuuyim miñ tum pixiñ tsam rico inñyi José. Tsucum jém atebet Arimatea, jém Jesús icuyujciwiñtim. ⁵⁸Jesic jém José nic iam jém Pilato, iwágáy jém Jesús imijtay. Jesic jém Pilato ipimíy jém soldado iga ichiáyiñ jém imijtay. ⁵⁹Jesic José ipigáy jém Jesús imijtay, inmónáy con tum wibic puctucu. ⁶⁰Icot jém tsaajosjom, jém José imiichi, jém

yaguiñpic iwatne. Ocmi injopnúc jém tsaajos con tum mijpic tsa. Yaj iwat jempic, setum. ⁶¹Íttim jem jém Malía Magdalena y jém tungac Malía. Coñyaj jém tsaajosajñaca.

Jém soldado iwatyajpa cuenta jém tsaajos

⁶²Ocmi cuyaj jém jama iga iwitsacyajpa itumpiy cosa para jém jejcuy jama. Cuando tigiy jama, añtuumayajpa jém panij añjagooyi y jém fariseoyaj, nic íamyaj jém Pilato. ⁶³Inñmayyaj:

—Manañjagooyi, añjista iga jém migoyapaap cuando danam caane, nimpaj iga: “Jém tucunajama ich apispa de juí cumneyajta jém caaneyajwiip.” ⁶⁴Jeeyucmi cutsati jém soldado iga iwatpa cuenta jém jos juí cumta hasta jém tucunajama. Wiap imiñyaj jém icuyujciwiñ tsuucim, ininigayyajpa jém imijtay. Ocmi nimyajpa iga: “Numa pisneum de juí cumnetajém caanewiip.” Siiga iwatyajpa jempic, jesic jém ocmipic migooyi más pimi malo que jém wiñtipic.

⁶⁵Jém Pilato inñmáy:

—Yim it jém soldado. Wagananici. Nigi wattaami cuenta jutspiyam miwiap.

⁶⁶Jesic ocmi nicyaj iga iwatyajpa cuenta jém tsaajos. Icámáy tum sello jém jos inñucuyucmi iga quejiñ siiga i ináypa. Jemum ichacyaj jém soldado iga iwatyajiñ cuenta.

Pis jém Jesús

(Mr. 16:1-8; Lc. 24:1-12; Jn. 20:1-10)

28 Cuando nasum jém jejcuyjama, tungagam cuqueja, joccuquej, jém wiñtipic jama

de jém semana, jém Malía Magdalena con jém tungac Malía nic iámyaj jém jos. ²Jeefi rato miñ tum mijpic nasyixi. Quet tum siñyucmipic pixiñ jém icutsatnewiip tanJatun Dios. Cuando núc jém tsaajosciim, iccáy jém tsa jém josañnúccuy, ocmi iconca. ³Tsam tsoepa juuts quénpa majiywiñ. Tsam pimi popo jém ipuctucu juuts nieve. ⁴Cuando jém soldado iixyaj, tsam pimi cinyaj, cuetsayajpa. Tsíyyaj juuts caane. ⁵Jesic jém siñyucmipic pixiñ inímáy jém yomtám:

—Odoj cįntaami. Ich anjodon iga miñ imméts jém Jesús jém cunúntawiip cunusyucmi. ⁶Dam i yim. Pisneum, cupac juuts nim. Miñi aami jut tsacneta idic jém tánOmi. ⁷Nici jobif, anmadaayi jém icuyujciwiñ iga pisneum de jut it jém caaneyajwiip. Siip anjagóypa inic jém naxyucmi de Galilea. Jemigam mictsíytampa. Jisi iga manñmayñeum.

⁸Jesic jém yomtám cáyyaj de jém tsaajosciim. Tsam pimi cinyaj, pero agui maymayaj. Póyanstucum, nic inmadáy jém icuyujciwiñ iga pisneum jém Jesús. ⁹Iganam niqiyaj jém yomtám, iwiñquejáy jém Jesús tunjom. Idioschi. Jesic jém yomtám icunúcyaj Jesús, icosteeñayaj, inuusayaj ipuy iga ijisyajpa. ¹⁰Jesic Jesús inímáy jém yomtám:

—Odoj cįntaami. Nigi námaayi jém antįwitám iga nicyajiñ jém naxyucmi de Galilea, jemigam aixyajpa.

Ŧi inímayyaj jém soldado jém anjagooyi

¹¹Iganam nicyajpa jém yomtám algunos jém soldado jém iwatnewiip cuenta jém tsaajos, nic

inmadayyaj jém panij anjagooyi Ŧi inascayaj. ¹²Jesic jém panij anjagooyiyaj nic ininmat jém wıdaytam iga iwatyajpa acuerdo. Jesic tsam jáyan tumiñ chiiyajta jém soldado. ¹³Nımayyajta jém soldado:

—Mimichfam nimtaami iga: “Tsuucim iganam amonıtampa, miñ jém Jesús icuyujciwiñ; inúmáy jém imıjtay.” ¹⁴Siiga ijodonap jém gobernador, ich mancupujpa iga odoj michiñ castigo.

¹⁵Jesic jém soldado ipictsonyay jém tumiñ, nic iwatyaj juuts ipimáy jém panij anjagooyi. Jempigam nımyajpa jém judíos hasta siip.

Jesús inquımpa jém icuyujciwiñ

(Mr. 16:14-18; Lc. 24:36-49; Jn. 20:19-23)

¹⁶Jesic jém once icuyujciwiñ nicyaj jém naxyucmi de Galilea. Quım jém cotsicyucmi juuts inímáyñe Jesús. ¹⁷Cuando iixyaj Jesús, icosteeñayaj. Aunque algunos ijispa iga migooyi, da iwıcupıcpa. ¹⁸Jesic Jesús icunúc jém icuyujciwiñ. Inímáy:

—Achiñetá jém pimi iga ananjacpa jém itıyajwiip siñyucmi y naxyucmi. ¹⁹Nigi anmadaayi Dios inmatı itımpıy jém pixiñtam icuwıti yıp naxyucmi. Anquejaayi jém wıbic anmatı iga tsıyyajiñ juuts ich ancupujciwiñ. Acchiñtaami jém acupicnewiip jém anJatun inıyimi, jém Dios iManic inıyimi y jém Dios iAnama inıyimi. ²⁰Anquejayyajı iga icupicyajiñ itımpıy jém ananjquımayooyi jém mananjmadayñewiip. Jodonjataami iga ich manwaganaitpa itımpıy jama hasta cuyajpa yıp nas.

Jemum cuyaj.